

Tjukurpa Palya Luke-alu Walkatjunkunytja Luke Nyangatja Ngañmanytju Nyakula Wangkanytjaku

Nyangatja Godaku tjukurpa wati ini Luke-alu walkatjunkunytja Jesunyatjara. Panya paluru wati nintipuka munu Jew wiya. Munu paluru nyiri nyangatja walkatjunu palumpa małpaku wati panya ini Tjiyapilatjaku. Munu paluru tjakultjunangi panya Jesunya wati palya mulapa kura wiya alatjiṭu, munu panya ilungu aŋangu ngura wikitja wankařunkunytjikitja Jew tjuṭa kutju wiya, panya Godanya aŋangu uwankaraku pułkara mukuringkupai. Munu Luke-alu tjukurpa kutjupa kutjupa tjuṭa walkatjunu Jesulu wangkanytja munu palyantja. Munu paluru nintiningi Godala tjukarurungku tjapintjaku munu tjukurpa Godaku kurunpatjara kuļu wangkangi.

Uwa, Luke-anya panya Paulala tjunguringkula ngura tjuṭangka para-pitjalinangi. Munu ngula paluru nyiri kutjupa kuļu walkatjunu panya yaaltji-yaaltji ngarangi Jesunya ilkarikutu ankunyangka małangka. Ka nyiri pala paluru panya ini Jesulu Iyantja Tjutangku Palyantja.

Tjukurpa nyanganpa ngarinyi:

1:1—2:52 John Baptistaŋa iti ngarinytja munu Jesunya iti ngarinytja

- 3:1-20 Johntu anangu tjutangka tjukurpa wangkara tjananya baptise-katinytja
- 3:21—4:13 Johntu Jesunya baptise-katinytja, ka Satantu Jesunya arkantja
- 4:14 —9:50 Jesulu anangu tjutangka wangkara nintintja munu pikatjara tjuta palyarunguntja
- 9:51 —19:27 Jesulu tjukurpa tjuta tjakultjunkunytja
- 19:28—21:4 Jesunya Jerusalemalakutu tangkiyingka tatira ankunytja, munu timpulangka tjarpala tjukurpa tjuta wangkanytja
- 21:5-38 Jesulu palumpa nintintja tjutangka tjakultjunkunytja ngula nyaaringkuku
- 22:1—22:46 Jesulu tjana mai malatja tjunguringkula ngalkuntja
- 22:47 —23:56 Jesunya witintja munu puñu katifikatjarangka wakara utitjunkunytja
- 24:1-53 Jesunya ilunytjatjanu wankaringkula pakantja

Ngañmanytju Tjakultjunkunytja

¹⁻² Malpa wiru Tjiyapilatja, lita nyangatjanä nyuntumpa walkatjunanyi nyuntu Jesunya mantangka nyinanytja tjukarurungku kulintjaku. Panya ngañmanytjuya tjutangku palula tjungu nyinaralpi palunya nyangangi paluru palyannyangka. Munuya paluru tjana nyakunytjatjanungku munu kulintjatjanungku kulu anangu tjutangka tjakultjunangi nganañala kulu. Kaya kutjupa tjarangku nyiringka walkatjunangi tjukurpa

palunyatjaratu. ³⁻⁴ Kana tjukurpa nyanga palunya tjananya nyakula, kutjupa tjutangka kulu tjapira kulira purkara nintiringangi tjukurpa uwankaraku. Mununa kuwari uti mulapa tjukurpa uwankara tjukarurungku walkatjunkunytjikitja mukuringanyi. Panya nyuntu tjukurpa tjuta nganmanyajulpi kuliningi, palu lita nyanga palulanguru nyuntu uwankara tjukarurungku nyakula kulira nintiringkuku.

Ka tjukurpa nyanga paluru nyiri nyangangka ngaranyi.

Angeltu Tjakarayala Tjakultjunkunytja

⁵ Nyara palula arangka, panya wati Iratanya manta Judeaku winkiku mayatja pulka nyinanyangka, wati ini Tjakarayanya tjukurtjara nyinangi. Wati nyara paluru panya Apitjanya tjamutjara nyinangi.* Ka palumpa kuri kulu nyinangi minyma ini Elizabethanya. Minyma nyara paluru panya wati Aaronta tjanalanguru.*
⁶ Munu nyanga paluru pula tjukaruru mulapa nyinangi Godala mirangka munu pula Godaku tjukurpa uwankara wanganarangku kulilpai.

* ^{1:5} Apitjanya tjukurtjara pulka iriti nyinangi Davidanya nyinanytja ara. Panya nyara palula ara Davidalu tjukurtjara tjuta tjarara tjunu tjana ngapartji-ngapartji timpulangka warkarinytjaku, munu paluru Apitjanya tjunu mayatja tjaru kutjupaku. (Nyawa 1 Chronicles 24:1-19.) Kaya wati Apitjakunu tjuta tjukurtjara tjuta nyinangi malatja malatja tjuta kulu. Ka wati panya Tjakarayanya Apitjakunu malatja malatja mulapa munu panya tjukurtjaratu nyinangi. * ^{1:5} Aaronnga panya wati tjukurtjara nganmanyapa mulapa nyinangi Godalu tjunkunytja. Paluru iriti mulapa nyinangi Moseku panya kuta.

⁷ Palu paluru pula kutjara alatjitu rawa nyinangi tjitji wiya munu pula tjilpiringkula pamparingu.

⁸ Ka tjintu kutjupa timpulangka Apitjakunu tjuṭangku ngapartji war̄ka palyantjaku ngarangi, ka wati panya Tjakarayanya tjukurtjara tjanala tjungu warkaringi Godala miṛangka. ⁹ Kaya wati nyanga palunya ngurkantanu timpulangka unngu tjarpara pitjilta nyalpi wiru tjunkula tilira puyu panti wiru palyantjaku. Nyanga paluru tjana alatjinkupai tjanampa arangka, munuya wati kutju ngurkantankupai tjukurtjarangku puyu panti wiru tilintjaku. ¹⁰ Ka tjintu wirkanu puyu panti wiru tilintjaku, kaya aŋangu tjuṭa mulapaṭu timpulangka urilta ngarala Godala tjapiningi.

¹¹ Ka wati panya paluru timpula unngu puyu panti wiru tilinnyangka Mayatjaku angelpa utiringu palula munu ngarangi pitjilpangka kampa wakungka wiru pantipaingka itingka.

¹² Ka Tjakarayalu angelpa nyakula urulyaranu munu pułkara nguluringu. ¹³ Ka angeltu palula wangkangu, “Tjakaraya, nguluringkunyta wiya. Godalunta kulinu nyuntu palula tjapinnyangka mununi witunu nyuntula tjakultjunkunyta panya nyuntumpa kuri Elizabethanya pakuringkuku, ka nyupali katjatjararingkuku. Ka iti wirkankunyangka nyuntu palunya inila Johnnga. ¹⁴ Munu nyupali pułkara pukulariku, kaya aŋangu kutjupa tjuṭa kułkułu nyakula pukulariku. ¹⁵ Panya paluru ngula pułkaringkula Godala miṛangka wati pułka alatjitu nyinaku Godaku tjukurtjara

pulkā mulapa. Munu paluru wama tjikintja wiya nyinaku. Ka paluru iti wirkankunyangka alatjiitu Kurunpa Milmilnga tjarpaku munu palula tjungu titutjara nyinaku. ¹⁶ Ka wati nyara paluru Israekunu tjutangka tjukurpa wangkara malakungku tjananya altira Godala tjungulku piruku palumpa walytja nyinanytjaku. ¹⁷ Munu paluru kuranyurira rapangku ngulu wiyangku wangkaku Godaku tjukurpa, panya wati panya Ilaitjalu iriti Godaku tjukurtjara pulkangku Godaku tjukurpa wangkangi, palu purunyntju. Kaya mama tjutangku palunya kulira kampa kutjuparira tjananku tjitji tjuṭa tjukarurungku mukulyangku aṭunymankuku. Munuya anangu kutjupa tjutangku kuļu Godala tungunpungkunytjatjanungku paluru wangkanyangka kulikku munuya ařuringkula Godala tjukarurungku kulikku. Uwa, wati nyara paluru anangu tjuṭa alatjirinytjaku palyalku tjana kulira Mayatjaku ala-alā patara nyinanytjaku.” Nyanga palunya angeltu wangkangu wati panya Tjakarayala.

¹⁸ Ka paluru angelta kulira puṭu mulamularingkula palula ngapartji wangkangu, “Wiya, ngali tjilpiringu munu pamparingu kuļu. Yaaltjingarali tjitji kanyilku? Wanyuni kutjupa kutjupa nintila kaña nyakula mulamulariwa nyuntu panya wangkanytja tjukaruru ngaranytjaku.”

¹⁹ Ka angeltu wangkangu palula, “Ngayuluna ini Gabrielnga panya Godala mirangka ngarapainya. Kanī Godalu witunu tjukurpa nyanga palunya nyuntula

tjakultjunkunytjaku. **20** Palu kulila, ngayulu nyanga nyuntula wangkanytjitjaku nyuntu putu mulamularingkulampa nyuntu tjaa patiringkuku munun putu wangkaku. Ka tjukurpa nyanga ngayulu wangkanytjanya nyuntula utiringkuku alatjitu, kan nyakuku tjintu nyara palula, munun iti wirkankunyangka kutju ngula tjaa alaringkuku munun wangkaku.” Alatji angeltu palula wangkangu.

21 Kaya aŋangu tjuta urilta ngarala pataningi watu panya Tjakarayaku munuya ngarala putu kuliningi wangkara, “Nyaaku paluru timpulangka unngu tjarpura rawaringu?” **22** Ka Tjakarayanya timpulanguru ngalya-pakanu munu putu wangkangi. Kaya mara kutju urinyangka nyakula kuliningi, “Munta, tjinguru kutjupa kutjupa palula utiringu timpula unngu, ka nyanga palulanguru tjaa patiringu.”

23 Ka tjintu maŋkurnguru Tjakarayalu timpulangka warka wiyara ngurakutu anu.

24 Ka nyara palula malangka palumpa kuri Elizabethanya pakuringu munu urilkutu pakantja wiya wali unngu kutju nyinangi titutjara pira maŋkurpa kutjara. **25** Munu paluru pukularira alatji wangkangu, “Ngangari, wiru mulapa nyangatja. Ngula-ngulanitju mulapatu Mayatjalu pukulmanu. Panya ngañmanytjunjtuya aŋangu tjutangku kurara pungkupai tjitji wiya nyinanyangka, kana kuntaringkupai. Palu kuwari nyanga Mayatjalu ngayuku kunta wiyanu alatjitu, kaya putulta ngayunya piruku nyanga purunyapa wangkanyi.”

Angeltu Mary-la Tjakultjunkunytja

²⁶⁻²⁷ Ka pira maŋkur-maŋkurpa wiyaringkunyangka Elizabethanya tjuni pulkaringu. Ka Godalu iyanu angelpa ini Gabrielnga kungkawara nyitayikutu ini Mary-lakutu. Kungkawara nyanga paluru ngura ini Nazarethala nyinangi uru Galileela wilurara munu paluru wati ini Josephalu ngañmanytju kalkuntja nyinangi altintytja wiyatū. Wati nyanga paluru mayatja Davidaku walytjapitinguru utiringkula nyinangi. Palu nyanga pula altintytja wiyatū kuwaripa nyinangi patara. ²⁸ Ka angelpa panya paluru wirkānu Mary-la munu pukultu tjakultjunu palula alatji, “Awa, Mayatjanyanku pulkara pukularinyi, mununta ilangku kanyira nyuntumpa wiru mulapa palyalku.”

²⁹ Ka Mary-lu wangkanyangka kulira pulkara urulyaraṇu munu kuliningi, “Nyaani nyangangku wangkangu?” ³⁰ Ka angeltu palula wangkangu, “Mary, nguluringkunytja wiya! Mayatjanya nyuntumpa pulkara pukularinyi mununta paluru nyuntunya ngurkantanu. ³¹ Kulila, nyuntu kuwari ititjararingkuku, munun katja kanyilku munun palunya inilku Jesunya. ³² Ka paluru pulka mulapa nyinaku Mayatja Katutja Pułkaku katja. Ka Godalu palunya tjunkuku Mayatja pulka nyinanytjaku wati panya palumpa tjamu Davidaku arangka. ³³ Ka paluru mayatja pulka mulapa rawa nyinaku Israelkunu tjutaku aŋangu kutjupa tjutaku kuļu titutjara alatjitu wiyaringkunytja wiya.” Nyanga palunya angeltu Mary-la wangkangu.

³⁴ Ka Mary-lu palula ngapartji wangkangu, “Palu nganalanguruṇa iti nyanga palunya kanyilku? Panya ngayulu watiku ngurpa munuṇa wati kutjupangka nyinanytja wiyaṭu.”

³⁵ Ka angeltu palula wangkangu, “Kulila, Kurunpa Milmilnga nyuntula tjarpaku munu Godaku witulya pulkatjarangku nyuntunya ititjararingkunytjaku palyalku. Ka nyara palulanguru nyuntu iti milmilpa kanyilku ‘Godaku Katja.’ ³⁶ Munu wanyu piṟuku kulila, nyuntumpa panya walytja Elizabethanya, Tjakarayaku panya kuri. Paluru pampa mulapa nyinanyi. Palu kuwari nyanga paluru ititjara nyinanyi. Munu panya piṟa maŋkur-maŋkurnguru tjitji kanyilku pampa panya mulatu. ³⁷ Ka nyangatja kulinma panya Godalu kutjupa kutjupa uwankara alatjiṭu paluru nintingku palyalpai.”

³⁸ Ka Mary-lu nyangatja kulira wangkangu, “Uwa palya, ngayuluṇatju mulapa Mayatjaku walytja nyinanyi paluru wangkanytja wangaṇarangku kulira palyantjikitja. Ka nyanga nyuntu wangkanytja palya ngayula utiringkuku.” Ka nyanga palulanguru angeltu palunya wantikatira anu.

Mary-nya Elizabethalakutu Ankunyta

³⁹ Ka palula małangka Mary-lu mapalku ulytja karpiṛa ma-pakaṇu ulparira palumpa walytja Elizabethanya nyakunyjtikitja. Panya paluru pula kuriṛara nyinangi Jerusalemala ulparira tawunu tjukutjukungka apu murpu tjutangka ngururpa. ⁴⁰ Palu Mary-nya

wala pulka nguwanpa ankula ankula tjintu maŋkurnguru ngura panya palula wirkanu munu pulampa walingka tjarpara Elizabethanya nyakula wangkara ampura pukularingu.

⁴¹ Ka Mary-lu wangkanyangka Elizabethalu kulinu palula tjuningka unngu iti pulkara urinyangka. Ka nyara palula arangka Kurunpa Milmilnga Elizabethala tjarpangu munu tjukarurungku nintinu wangkanytjaku, ⁴² ka pulkara pukularira mirara wangkangu alatji, “Mama God, wirungkun minyma nyanga Marynya ngurkantanu munun pukulmanu minyma kutjupa uwankarangka waintara, munun iti panya Mary-lu ngula kanyintjanya nyuntu pukulmara kanyilku. ⁴³ Ngayuluña minyma pulka wiya, tjukutjuku nyinanyi, ka nyangatja nyaaku Mayatjaku ngunytju ngayulakutu pitjangu pulkakutu-palku? Palu palya, pulkarana pukularinyi palumpa. ⁴⁴ Ka nyuntu panya kuwari wirkara wangkanyangka ngayulu kulinu ngayula unngu iti pukularira urinyangka. ⁴⁵ Ka palan nyuntu kulu pukulpa ngaranyi panya nyuntu Mayatjalu wangkanyangka kulira mulamularingu munu palan paṭani paluru wangkanyta utiringkunytyaku.” Alatji Elizabethalu Mary-la wangkara pukularingu.

Mary-lu Godanya Mirawaŋinytja

⁴⁶ Ka Mary-lu alatji wangkangu, “Ngayuluña kuwari pulkara alatjitu mirawaŋinyi Mayatjanya, ⁴⁷ Munuŋatju palumpa pulkara pukularinyi, nganampa God panya Wankarunkupaiku.

- 48 Panya paluru^{nitju} ngurkantanu tjukutjuku nyinanyangka
 munuⁿⁱ nyanga nyakunytjatjanungku puku^{lmanu}.
 Kaya nyanganguru aŋangu tjuṭangku ngayunya rawangku kulilku wangkara alatji, ‘Mulapa minyma nyanga palunya Godalu pulkara puku^{lmanu}.’
- 49 Panya Godalu witulya pulkangku ngayuku pulka mulapa palya^{nu}.
 Nyara paluru wiru mulapa.
- 50 Munu aŋangu tjuṭangku palunya rawangku kulinnyangka paluru tiṭutjarangku alatji^{tu} ngaltunytjungku kanyilpai aŋangu uwankara, munu aŋangu kutjupa palula tjanala malatja tjuṭa ku^{luku}lu.
- 51 Munu paluru kaŋany-kaŋanyaripai tjuṭa wililytjingalpai witulya pulkangku tjananku walytjangku kulira palyannyangka.
- 52 Munu paluru alatji^{tu} mayatja pulka tjuṭa pauntjingara tjarulpai,
 munu tjukutjuku tjuṭa katulpai pulka katu nyinanytjaku.
- 53 Munu paluru pałtjatjiratja tjuṭa pałtjalpai wiru tjuṭa ungkula,
 munu mani pulkatjara tjuṭa paira iyalpai maṛalpa ankunytjaku.
- 54-55 Paluru panya ngañmanytju kalkunu nganampa tjamu tjuṭa Aipuramanya tjananya, ngaltunytjungku kanyintjik-itjangku
 munu panyalanya tiṭutjarangku mukulyangku kanyini nganañanya,

Aipuramaku walytjapiti malatja uwankara kulukulu.
 Uwa, mulapa paluru nganananya Israelkunu tjuta palumpa walytjapiti ngaltunytjungku atunymara titutjarangku kanyilpai.”
 Alatji Mary-lu Godanya walkura wangkangi.

⁵⁶ Munu paluru palumpa walytjangka Elizabethala pira mankurpa nyinangi, munu nyinara wiyaringkula palulanguru małakulta anu alintjara ngura walytjakutu.

Johnnga Iti Wirkankunytja

⁵⁷⁻⁵⁸ Ka małangka Elizabethalu iti kanyintjaku ilaringu, ka paluru katja kanyinu. Munu paluru pułkara pukułaringu Godalu palunya wirungku ungkunyangka. Kaya malpa tjuta walytja tjuta kulukulu nyangatja kulira palula tjunguringkula pukularingu uwankara.

⁵⁹ Munuya palulanguru tjintu 7 ngarala wiyaringkunyangka małangka aŋangu tjuta piruku tjunguringu wati tjukurtjarangku iti palunya watintjaku*. Munuya palunya kuliningi mamangka iningka tjunkunytjikitjangku, Tjakarayala. ⁶⁰ Palu palumpa ngunytjungku wangkangu, “Wiya alatjitu, tjitji nyanga paluru ini Johnnga.”

⁶¹ Kaya aŋangu tjutangku wangkangu palula, “Palu nyuntumpa walytja kutjupa ini nyanga paluru nyinanyta wiyatū.” ⁶² Munuya palumpa

* ^{1:59} Panya tjakangkuya alatji palyalpai tjanampa arangka.

mamangka marangku tjapiningi, “Tjitji nyangatjan ini ngananya tjunkuku? Tjakultjuralanya kala kulila.”

⁶³ Ka Tjakarayalu marangku wangkangu nyiri unggunytjaku. Kaya mantjira palunya ungu. Ka paluru walkatjunu nyiri nyara palula alatji, “Paluru ini Johnnga.” Kaya uwankarangku nyakula urulyaraṇu. ⁶⁴ Ka palulanguru Tjakarayanya tjaa mapalku alaringu munu wangkapairingu, munu paluru Godanya pulkara mirawaningi. ⁶⁵ Kaya palumpa malpa tjutangku palunya nyakula urulyaraṇu. Ka tjukurpa nyanga paluru manta Judeala ngura winkingka lipiringu. ⁶⁶ Kaya ngura uwankarangka anangu tjutangku tjukurpa nyanga palunya kulinu munuya rawangku kuliningi, “Mulapa Godalu tjitji nyara palunya marangku kanyini. Ka yaaltji-yaaltji paluru nyinaku ngula pulkaringkula?” Alatji tjana wangkara kuliningi.

Tjakarayalu Godanya Walkuntja

⁶⁷ Ka Kurunpa Milmilnga tjarpangu wati panya Tjakarayala, iti panya Johnku mamangka munu palunya kuranyukutungku nintinu, ka paluru pukularira wangkangu alatji,

⁶⁸ “Walkunmala Godanya, Israelkunu tjuṭa kanyilpaina,
panya paluru pitjangu palumpa walytja tjuṭa
wankarunkunkunytjikitja.

⁶⁹ Godalulampa iyaṇu wankarunkupainya witulya pulkatjara.

Ka wankarunkupainya nyanga paluru wati panya Davidaku walytjapitinguru utiringu. Panya iriti mulapa nyinangi Davidanya Godaku waṛkaripai.

- 70-71** Panya Godalu iriti kalkunu nganananya wankarunkunytjikitjangku mirpaṇṭju tjutangku pungkunytjaku-tawara, ka panyaya palumpa wangkatjara tjutangku palula kulir̄a nyiringka walkatjunu paluru kalkuntjtja nganaña kulintjaku.
- 72** Munu panya wangkangu nganampa tjamu irititja tjutangka Aipuramala tjanala palunya tjananya ngaltunytjungku kanyintjikitjangku munu paluru kalkuntjatjanungku palyaṇu alatjiṇu munu kanyiningi tjananya.
- 73-75** Panya paluru iriti mulapa Aipuramala tjanala kalkunu alatji wangkara, ‘Nyurampa mirpaṇṭju tjutangku nyuranya pungkunytjikitjangku kulinnyangkanā nyuranya ngalkilku nyura wankaru nyinanytjaku munu ngayunya rapangku walkuntjaku tjanampa nguluringkunytja wiyangku.
- Nyara palulanguru nyura ngayula miṛangka palyanyku nyinaku titutjara.’”
- 76** Munu Tjakarayalu piruku katjaku tjukurpa ngapartji wangkangu alatji, “Nyuntu God Katutja Pul̄kaku wangkatjara nyinaku,

munun Mayatjanya pitjanytjaku paṭara ku-ranyurira ngañmanytju tamalmara wantiku aŋangu tjutangku kulira palumpa ala-alala paṭara nyinanytjaku.

⁷⁷ Nyuntu tjanala ngañmanytju tjakultjunkuku alatji, ‘Godalu nyuranya kura tjuta palyantitjanguru pungkuwiyangku kalypangku wantiku munu palulanguru nyuranya wankarunkuku.’

⁷⁸ Uwa, mulapa Godanya nganampa ngaltunytyju mukulya pułka mulapa nyinanyi.

Panya tjirirpingku mungawinki pakara manta uwankara utilpai,
palu purunytju ilkaringuru pitjanytjalu nganañanya kurunpa unngu utilku.

⁷⁹ Panya nganana mungawalurungka nyinanyi munula iwara palyangka ankunytjikitjangku pułtu kulira ilunytjikitja kutju ngaranyi.

Palu panya Godalu ilkaringuru tili pulka iyalku, ka nganañanya utilku iwara palyangka Godala tjungu pilunpa pukulpa ankunytjaku.”

Nyanga palunya Tjakarayalu Kurunpa Milmiltu nintinnyangka wangkangi.

⁸⁰ Ka palumpa katja Johnnga tjitji pulkaringu, munu Godanya kurunpa winkingku ̄kuliningi. Munu paluru ngula pułkaringkula anu ilytjikutu munu ilytjingka nyinangi kumpilpa, munu ngula utiringu Godaku tjukurpa wangkanytjikitja Israelkunu tjutangka.

*Jesunya Iti Ngarinytja
(Matthew-ku 1:18-25)*

¹ Ka nyara palula arangka wati ini Tjiitja Ukatjanya mayatja pulka nyinangi ngura panya ini Rome-ala munu ngura winki mulapa mayatjangku tjungura kanyiningi Israelnga kuлу. Wati nyanga paluru mayatja uwankarangka wangkappai, kaya wangañarangku kulilpai palula. Ka Johnnga iti nyinanyangka mayatja nyara paluru anangu winki kantamilantjikitja mukuringangi, munu tjananya uwankara wituningi ngura uwankaranguru ankula ngura walytjangka walytjangka ini nyiringka walkatjunkunytjaku. ² Ka nyara palula arangka wati panya ini Kuriniyatjanya ngura Tjiriyaku mayatja nyinangi. ³ Kaya ngura uwankaranguru anangu winki ngura walytjakutu walytjakutu anangi tjanampa tjamuku ngurakutu ini tjanampa nyiringka walkatjunkunytjikitja.

⁴ Ka Josephanya ngura Nazarethala nyinangi munu ulparira ma-pakaṇu tawunu walytjakutu ngura ini Bethlehemalakutu, panya nganmanypa mulapa palumpa tjamu Davidanya iti ngaringu ngura nyara palula, ka palulakutu paluru anu ini walkatjunkunytjikitja. ⁵ Munu katingu Mary-nya panya palunya kalkuntjatjanungku. Ka Mary-nya paku pulka nyinangi munu nganmanypa tjunı pulkaringu.

⁶ Munu paluru pula Bethlehemala wirkanu, ka Mary-ku iti wirkankunytjaku ilaringu. ⁷ Ka paluru iti katja kuvari kutju ngurpangku kanyinu, munu mantarangka karpira pantjapantjangka ngaritjunu piti ngatingka. Piti

nyara paluru panya puluka tjutaku munu tjiipi tjutaku mai tjunkupai ngalkuntjaku. Tjinguru pula walingka payamilara tjarpanyangka iti wirkanama, palu anangu winkingku nganmanypa tjarpara wali uwankara anganu, ka palulanguru pulampa ngura wiya ngarangi wali unngu ngarinytjaku, ka pula tjulypintja ngaringu pulukaku ngurangka.

Tjiipi Kanyilpai Tjutangka Angeltu Wangkanytja

⁸ Ka ngura nyara palula itingka tawunungka urilta wati tjapata tjutangku tjiipi tjuta atunymara kanyiningi mungangka. ⁹ Ka Mayatjaku angelpa utiringu tjanala munu pitalytfji pulka mulatu tjananya irnyara kanyiningi. Kaya urulyarara pulkara nguluringu. ¹⁰ Palu angeltu palula tjanala wangkangu, “Nguluringkunytja wiyangkuya kulinma. Ngayuluña pitjangu nyurala tjukurpa wiru mulapa tjakultjunkunytjikitja anangu uwankaraku, kaya kulira uwankara pulkara pukulariku. ¹¹ Kuwari nyanga Mayatja Davidaku ngurangka iti wirkanu nyuranya wankarunkunytjikitja panya Christanya Mayatjanya.* ¹² Ka nyura ankula ngurila munu nyawa iti nyara palunya mantarangka karpintja puluka tjutaku mai ngaripaingka ngarinyangka. Alatji ngarinyangka nyakula nyura kulikku, ‘Munta, nyangatja iti panya paluru.’ ”

* **2:11** Ini Christanya wangkanyi *Wankarunkupainya Godalu panya kalkuntjanya*.

¹³ Ka angelpa paluru wangkara wiyaringkunyaŋka maŋangka angelpa kutjupa tjuta mungiyi mulapa ilkařinguru ukalingkula palula tjunguringkula tjungungku inma inkara Godanya walkuningi alatji wangkara,

¹⁴ “Godanya wiru mulapa nyara ilkařingka nyinanytja panya.

Kayanku mantangka nyanga aŋangu Godala kulipai uwankara kurunpa pukulpa nyinama.”

¹⁵ Munuya angelpa tjuta inkara wiyaringkula malaku anu ilkarikutu, kayanku wati panya tjapata tjutangku wangkangu, “Ala, walala ara Bethlehemakutu munula nyawa nyanga palunya, panya Mayatjaku angeltulanya kuwari tjakultjunu.”

¹⁶ Munuya pakara warpungkula anu walikutu munuya walingka ma-wirkara nguriřa nyangu Mary-nya pulanya Josephanya pulukaku ngurangka nyinanyangka munuya iti kuļu pantja-pantjangka ngarinyangka nyangu pitingka pulukaku mai ngaripaingka.

¹⁷⁻¹⁸ Munuya wati panya tjapata tjutangku iti palunya nyakula Josephala pulala tjakultjunu tjukurpa panya angeltu tjanala tjakultjunkunytja iti nyanga palunyatjara, munuya iti nyakunytjatjanungku aŋangu tjutangkalta tjakultjunangi. Kaya kulira urulyaranu tjiipi kanyilpai tjutangku tjanala wangkanyangka. ¹⁹ Ka Mary-lu tjukurpa nyanganpa rawangku unngu kuliningi. ²⁰ Kaya palulanguru wati panya tjapata tjutangku Mary-nya pulanya wantikatira malaku anu

munuya iwarangka ankula inma inkara Godanya pulkaṛa wałkuṛa pukularingi wiru kulintjatjanungku munu nyakunytjatjanungku kuļu. Munuya wangkangi, “Mulapa angeltu nganañala tjukarurungku tjakultjunu.”

21 Ka tjintu 7 ngarala wiyaringkunyangka mungawinki iti panya palumpa tjintu wirkanu palunya watintjaku wati tjukurtjarangku.* Ka pula palunya ininu Jesunya, panya ini nyanga palunya ngañmanytju wangkangu angeltu Mary-la.

Jesunya Timpulakutu Katinytja

22-23 Ka ara panya irititja ngaranyi Godalu Mosela ngañmanytju wangkanytja nyanga alatji, “Utiya katja ngañmanyitja uwankara ngayunya ungama ngayukurinytjaku.” Ka Josephalu pula ara panya palunya kulinu munu piṛa kutju wiyaringkunyangka iti Jesunya Jerusalemalakutu katingu Godanya ungkunytjikitjangku. **24** Munu pula tjulpu kutjara kuļu katingu. Panya Godalu Mosela ara kutjupa minyma nguny়tu tjutaku ngañmanytju wangkangu nyanga alatji, “Minyma nguny়tjungku iti kanyintjatjanungku uti piṛa kutju wiyaringkula tjulpu kutjara katira wati tjukurtjara ungama tjinguru kuukuuku kutjara mutta aralapalpalpa kuļunypa kutjara, ka tjukurtjarangku tjulpu panya kutjara pungkula Godanya ungkuku, ka palulanguru minyma

* **2:21** Alatjiya tjakangku ara irititjanguru palyalpai iti tjukutjuku wati tjukurtjara katira ungkula, panya alatji Godalu wangkangu tjana alatjingantjaku.

paluru palyaringkuku munu para-ngaramalta.”* Ka pula ara nyanga kutjara kulinu munu pula Jesunya katingu timpulakutu tjulpu kutjara ku_{lu}.

25-26 Ka nyara palula arangka wati tjilpi kutju nyinangi Jerusalemala, wati ini Tjimiyannga. Nyanga paluru wiru mulapa tjukaruru nyinangi Kurunpa Milmilngatjara. Munu paluru Godaku mulamularingkula rawatu pa_{tan}ingi munu kuliningi panya ngula Godalu Israelkunu tjuta wankarunkuku. Panya nganmanytju Kurunpa Milmiltu tjilpi panya palula wangkangu alatji, “Panya Mayatja Godalu nganmanytju iriti mulapa kalkunu Wankarunkupainya nyuralakutu iyantjikitjangku. Kan nyuntu nyara palunya nyakunytjikitja wanka nyinaku munun nyakula kutju iluku.” Ka Tjimiyantu nyangatja kulira pa_{tan}ingi rawa alatjitu ala-ala panya paluru Wankarunkupainya pitjanytjaku.

27 Ka tjintu panya palula Jesunya ungkunytjikitjangku katinyangka Kurunpa Milmiltu wati panya palunya nintinu timpulakutu ankunytjaku. Ka paluru ankula tjarpara nyinangi timpula unngu munu mulapatu nyangu Mary-lu pula Josephalu iti Jesunya Godanya ungkunytjikitjangku ngalyakatinyangka. **28** Munu paluru iti panya palunya nyakula ampura pulkara pukularingu, munu Godanya walkuningi wangkara,

* **2:24** Iriti minymangku iti kanyintjatjanu pira kutju wali unngu kutju nyinapai. Munu palula malangka tjulpu kutjara timpulakutu katira Godanya ungkula kutju palya urulta pakara para-ngrapai.

29-31 “Uwa Mayatja God, kuwariŋatju ngayulu pukularingu alatjitu, panya nyuntu mulapa kuwari ngayula wirkakatingu Wankarunkupainya, panya nyanga palunyaŋ ngañmanytju kalkunu.

Kana kuwari nyanga palunyuŋ nyangu kurungku nyuntu panya kalkuntjanya,
panya nyuntu añaŋgu uwankara wankarunkunytjaku iyantjanya.
Kana palya ilunyi nyuntu panya kalkuntjtjangka.

32 Nyanga paluru tili pulka mulapa nyinaku añaŋgu Jew wiya tjutaku tjana manta winkingka Godanya uti nyakunytjaku.

Kaya paluru tjana tili palunyuŋ nyakula mulamularingkula Israelkunu tjuta pulkařa mিrawaŋiku nyuntumpa panya walijapiti.”

Alatji Tjimiyantu Godanya wangkara walkuningi munu pukularingu.

33 Ka tjilpi panya paluru alatji wangkanyangka iti panya palumpa mamangku ngunytjungku kulira urulyaranu. **34** Ka Tjimiyantu pulala ngapartji wangkangu alatji, “Godalu nyupalinya pukulmanama munu iti nyanga palunyuŋ kuļu.” Munu paluru piřuku wangkangi minyma panya ngunytjungka alatji, “Tjitji nyanga palunyuŋ Godalu iyanu Israelkunu tjutangka tjukurpa wangkanytjaku. Ka tjarangku kulira wankaringkuku, palu tjara kutjupangku kulira wantiku munu ilura kawankatiku. **35** Panya paluru utilku añaŋgungku unngu kulintja uwankara. Ka Mary, nyuntu nyakula tjituru-tjitururiku munun

tjuni katakatiku.” Alatji Tjimiyantu Mary-la wangkangu.

³⁶⁻³⁷ Ka minyma wanakala kutju ini Annanya nyinangi nyara palula munu timpu-langka unngutu ngarangi. Panya palumpa mama ini Panuwalnga nyinangi nganmanypa, ka palumpa walytja tjuta wati ini Atjalanguru nyinangi panya iriti mulapa Atjanya wati Jacobaku katja nyinangi, pala palumpa. Ka minyma panya palumpa kuri nganmanypa yiya 7 kutju palula tjungu nyinanytjatjanu ilungu. Ka nyara palulanguru minyma panya paluru rawa mulapa nyinangi munu pamparingkula yiya 84-ringu. Munu minyma panya paluru wangkatjara Godaku tjukurpa tjakultjunkupai nyinangi munu paluru timpulangka rawa nyinapai wantikatinjtja wiya munu Godala tjapilpai mungangka kalala kuлу, munu paluru kutjupara mai wantipai Godala pulkařa tjapintjikit-jangku.

³⁸ Ka nyara palula arangka Mary-nya pula timpulangka ngaranyangka minyma panya paluru wirkanu pulala munu iti Jesunya nyakula pukularira Godanya walkuningi. Panya anangu kutjupatjara rawa patanangi Israelkunu tjuta wankarunkunytjikitja pitjanyangka nyakunytjikitja. Ka minyma panya paluru anangu nyanga palula tjanala wangkangi alatji, “Nganana panya rawa mulapa patanangi Wankarunkupainya pitjanytjaku ngura nyanga Jerusalemalakutu. Kana nyurala kuwari tjakultjunanyi panya paluru pitjangu alatji Mary-ku pulampa katja.” Alatji

Annalu anangu tjuṭangka tjakultjunu paluru nyakunytjatjanungku.

Nazarethalakutu Małaku Ankunytja

³⁹ Ka nyara palulanguru Josephalu pula Marylu uwankara palyara wiyanu Moseku tjukurta ngaranytjitja. Munu pula palula małangka timpulangka warka wiyara anu małaku ngura Nazarethalakutu. ⁴⁰ Ka tjitji panya paluru pulkaringkula kūnpuringu munu ninti pulka mulararingu. Ka Godalu tiṭutjarangku palunya pulkarra mulapa pukułmanangi.

Jesunya Timpulangka Nyinanytja

⁴¹ Ka yiya kutjupa yiya kutjupa Jesuku ngunytju pula Josephanya rawa ankupai Jerusalemalakutu inma panya Katuwanu Ankunytja kulintjikitja.* ⁴² Ka Jesunya panya nguwanpa pulkaringu munu yiya 12-aringu, munuya paluru tjana kuļu inma nyara palulakutu anu Jerusalemalakutu. ⁴³ Munuya inmangka nyinara wiyaringkula ma-pakanu ngura waltyjakutu. Palu tjitji panya Jesunya Jerusalemala nyinangi ngunytjungka tjungu ankunytja wiya. Ka Josephanya pula watarku anu. ⁴⁴ Panya pula alatji kuliningi, “Tjinguru małpa kutjupa tjuṭangka anu.” Munu pula pitjalira mungartjirira ngura tjunu ngarinytjikitjangku munu pula puťu nyangangi. Munu pula waltyja tjuṭangka małpangka kuļu tjapiningi. ⁴⁵ Palu puťu alatjiu puła nguriningi

* **2:41** Ara nyanga Katuwanu Ankunytja kulintjikitjangku nyawa Exodus-ala chapter 12 munu verse 21-nguru.

munu pula ngarira tjinturingkula malaku anu Jerusalemalakutu Jesunya ngurintjikitja.

⁴⁶ Munu pula palulanguru piruku munga kutju ngaringu Jerusalemala wirkara, munu mungawinki pakara Jesunya piruku paranguriningi munu pula nyangu timpula unngu nyinara wangkanyangka wati tjlpi nintipuka tju tangka. Ka Jesulu tjana tjukurpa wangkanyangka kuliningi munu kulira tjanala tjapiningi. ⁴⁷ Kaya paluru wangkanyangka pulkara urulyaraningi, “Ai, tjitji nyangatja nintipuka mulapa, munulanya nintingu ngananganala tjapini.” ⁴⁸ Ka palumpa ngunytjungku nyakula urulyarañu munu wangkangu, “Katja, nyaakun kumpira nyinangi? Nyanga ngali nyuntunya puñu nguriña nguriña pulkara tjiturtjtitururingu.”

⁴⁹ Ka Jesulu nyangatja kulira urulyaraningi munu wangkangu, “Palu nyaaku nyupali wanyu ngayuku nguriningi? Nyupali kulintja wiyat panya ngayulu Mamaku walingka nyinanyangka?”
⁵⁰ Ka pula puñu kulinu alatji wangkanyangka.

⁵¹ Ka palulanguru Jesunya pulala tjunguringkula anu Nazarethalakutu munu paluru pula wangkanyangka wangañarangku kulilpai. Ka palumpa ngunytjungku unngu kuliningi kuruntu tjukurpa uwankara, paluru panya wangkanyatja tjuña kulu. ⁵² Ka Jesunya rawa ngurangka nyinangi munu wati pulkaringkula nintipuka mulararingu. Ka Godanya palumpa pulkara pukularingi munu añañgu tjuña kulu palumpa pukularingitu.

3

*Johntu Wangkanytja Anangu Tjuṭangka
 (Matthew-ku 3:1-12; Markaku 1:1-8; Johnku 1:19-28)*

¹ Ka nyara palulanguru wati ini Tjiitja Tapiriyanya Rome-aku mayatjaringu munu yiya tjuta nguwanpa mayatja nyinangi nampa 15. Munu palu purunypatu anangu ngura winkitja mayatja pulkangku kanyiningi Israelkunu tjuta kułukułu. Ka ngura tjuṭangka mayatja tjukutjuku tjuta kułu nyinangi anangu nguratja tjuta tjukarurungku kanyintjikitja Rome-aku panya mayatja pulkaku. Panya wati ini Pontius Pilate-anja mayatja tjukutjuku nyinangi manta ini Judeaku. Ka wati ini Iراتanya mayatja tjukutjuku nyinangi manta ini Galileeku. Ka palumpa kuła Philipanya manta kutjara kutjupaku mayatja tjukutjuku nyinangi manta ini Ituriyaku munu Turakanaitaku. Ka wati ini Latja-niyatjanya mayatja tjukutjuku nyinangi manta ini Apiliniku. ² Ka wati kutjara ini Anatjanya pula Kayapatjanya anangu Jew tjuṭaku tjukurtjara pulka nyinangi manta panya Judeala.

Ka nyara palula arangka wati Johnnga, Tjakarayaku panya katja, ilytjingka nyinangi, ka Godanya palula wirkanu munu palunya wituňu anangu tjuṭangka palumpa tjukurpa wangkanytjaku. ³ Ka Johntu Godalu wangkanyangka kulira anu munu karu urutjarangka ini Jordanta itingka ngura tjukutjuku tjuṭangka Godaku tjukurpa

para-wangkangi, munu tjanala wangkangi alatji, “Piiwiyariwaya kura nyinanytjatjanu munuya kampa kutjuparira kura piruku palyantja wiyangku wantima, kaña nyuranya urungka tjarpatjura baptise-katiku, ka Godalu nyuranya kura palyantjitjanguru kalypangku pungkuwiyangku wantiku.”

4-5 Panya iriti wangkatjara Aitjayalu nyiringka walkatjunu alatji,

“Kutjupangku ilytjingka aŋangu tjutangka mি-
rara wangkanyi alatji,
‘Mayatjakuya ngañmanypa ritiriwa paluru
pitjala tjukurpa wangkanyangka
wangañarangku kulintjikitja.

Panya watingku iwara tjukarurulpai mayatja
pułka maławanu pitjanytjaku,
palu purunypa nyura tjukarururingkula
patanma Mayatjalu pitjala
wangkanyangka wangañarangku
kulintjikitja.

6 Kaya aŋangu uwankarangku nyakuku
Godalu palyantja aŋangu tjuta
wankarunkunytjikitjangku.’ ” *

7 Kaya aŋangu winki mulapa pitjangu Johntakutu minangka baptise-katinytjaku. Ka paluru tjanala wangkangu alatji, “Nyaaku nyura baptise-katinytjaku pitjangu? Nyura wanyu mulapa kura wantira kampa kutjuparingu? Wiya, nyura uwankara liru tjuta aŋangu tjuta ngunti kuralpai! Nyura tjinguru ngunti kulini ngayulu nyuranya urungka

* **3:6** Aitjayaku 40:3-5

tjarpatjunkunytjitjanguru Godanya nyurampa kalyparingkunytja-palku. Palu wiya, Godanya nyurampa pulka mirpañarinyi. ⁸ Nyura uti mulamulangku kura wantira kampa kutjuparima munuya palyanyku nyinara wiru tjuta kutju palyanma, ka nyara palulanguru wiru tjuta palyannyangka nyakula Godanya nyurampa pukulariku. Palu nyura tjinguru kulini alatji, ‘Nganananya Godalu kura ngurkantankunytja wiyangku wantinyi panya ngananña Aipuramaku pakalipiti. Palulangurulanya pikantankuwiyangku wantiku.’ Palu wiya, nyura ngunti kulini. Palu puli tjuta nyanga nyawa! Tjinguru Godalu mukuringkula apu nyangannguru Aipuramaku pakali tjuta palyanma. ⁹ Kulilaya! Panya wati kaana kanyilpaingku puñu tjuta maitjararingkunytjaku pakaltjingalpai, palu puñu kutjupa tjuta kuraringkula titutjara mai wiya ngaranyangka nyakula paluru katara wanipai warungka, ka palu purunyapa Godalu anangu tjuta titutjara kura nyinanyangka nyakula tjananya paira iyalku warukutu. Ka pala palula-tawara nyura uti Godalawanu tjukaruru palyanyku nyinama.” Alatji Johntu anangu tjutangka wangkangi.

¹⁰ Kaya tjukurpa nyanga palunya kulintjatjanungku ngapartji palula tjinpinu, “Kala wanyu nyaalku?”

¹¹ Ka paluru wangkangu tjanala, “Nyura mantara kutjara kanyirampa uti kutju ungama anangu kutjupa panya mantara wiyatjaranya. Munu nyura mai pulka kanyirampa uti munyt-

jangku ungama aŋangu kutjupa tjuṭa kuļu panya mai wiyatjara tjuṭa.”

12 Kaya wati mani mantjilpai tjuṭangku kuļu pitjala palula kuliningi,* panya tjana kuļu mukuringangi baptise-katintjaku. Munuya tjukurpa nyangatja kulira palula tjapinu, “Nintilpai, kala ngananaŋampa nyaalku?”

13 Ka tjanala wangkangu, “Nyura piřuku tjanalanguру ngunti mani pulka waintara mantjilwiyangku wantima, munuya mayatjangku wituntjtja kutju palyanma.”

14 Kaya wati tjaultji tjuṭangku ngapartji palula tjapinu, “Ka nganana ngapartji nyaa palyalku?”

Ka tjanala wangkangu, “Aŋangu kutjupangka ngunti pauntjingara mani mantjilwiyangku wantima munu ngunti kuranmankuwiyangku wantima munu warkanguru mani ungkunyangka pukulṭu mantjinma, pulka-tjiratjangku waintara wangkanytja wiyangku.”

15 Nyanga alatji wangkanyangkaya aŋangu tjuṭangku kulinu palunya alatji, “Awa, nyanga paluru-manti wati panya kalkuntjtja palurumpa wirkanu Christanya panyampa, panya paluru pitjanytjaku ngarangi.”

16 Palu Johntu tjakultjunangi aŋangu uwankarangka alatji, “Ngayuluŋa nyuranya urungka baptise-katinyi palu kutjupa pitjanyi ngayula malangka. Nyara paluru pulka mulapa ngayula muŋkara waintara mulapa.

* **3:12** Wati mani mantjilpai tjuṭa Rome-aku mayatjaku warkaripai munuya palumpa aŋangu tjuṭangka tax mani mantjilpai. Kaya aŋangu tjuṭa tjanampa mukuringkupai wiya alatjtū.

Panya wati warkangku palumpa mayatjaku tjinatja araltjankupai, palu nyangatja mayatja pulka mulapa pitjanyi, kaña ngayulu kura nyinara pulkara kuntaringanyi palumpa tjinatja pupakatira araltjankunytjaku. Nyara paluru nyuranya baptise-katiku Kurunpa Milmilnga nyurala tjarpatjura ka warungku purunyntju nyuranya kampara tjukarurulku.

¹⁷ Panya paluru kuwari ila ngaranyi anangu uwankara tjarantjikitja, panya minymangku mai kanira maŋtalpa tjunkupai munu unytjunyntju ma-wanipai, palu purunypa paluru pitjala tjaralku munu palumpa walytja tjuta palumpa ngurangka tjunkuku munu kuralpai tjuta waru pulkangka wañiku waru tiutjara kampapaingka.”

¹⁸ Alatji Johntu tjukurpa wangkara utiningi tjana kulira piiwiyingkunytjaku. Munu tjukurpa kutjupa kutjupa tjutawanungku paluru tjanala rawangku wangkangi tjana kulintjaku, munu tjukurpa palya kulu tjakultjunangi panya Godanya pañani anangu tjuta wankarunkunytjikitja. ¹⁹ Munu paluru kutjupa-ara mayatja pulka Iratanya anangura tjukarurungku wangkangu alatji wangkara, “Nyuntu kurangku nyuntumpa inkani altingu nyuntumpa kuñaku kuri Iratiyanya.” Munu paluru kura kutjupa kutjupa tjuta kulu utira wangkangu Iratalu palyantja tjuta. ²⁰ Ka palulanguru Iratanya miilaranu munu piñuku kura pulka mulapa palyanu munu Johnnnga tjailangka witira tjarpatjunu.

*Johntu Jesunya Baptise-katinytja
(Matthew-ku 3:13-17; Markaku 1:9-11)*

²¹ Munu Johntu anangu tjuta urungka baptise-katira Jesunya kuļu baptise-katingu. Ka paluru Godala mamangka tjapinnyangka ilkari alaringu, ²² ka Kurunpa Milmilnga palulakutu ukalingu tjulpu kuukuuku purunypa. Ka ilkaringuru wangkangu alatji, “Nyuntu ngayuku katja wiru mulapa. Kana nyuntumpa pukulpa mulapa nyinanyi.”

*Jesuku Walytjapiti Nganmanyitja Tjuta
(Matthew-ku 1:1-17)*

²³ Ka nyara palula arangka Jesunya yiya 30-ringu munu warkalta ma-palyanu munu tjukurpa para-wangkangi anangu tjutangka. Kaya aŋangu uwankarangku kuliningi palunya Josephaku katja-palku nyinanyangka.

Palu Josephanya panya wati ini liliku katja, ²⁴ ka panya lilinya wati ini Matjataku katja, ka panya Matjatanya Leviku katja, ka Levinya Milkaiku katja, ka Milkainya Tjanaiku katja, ka Tjanainya Josephaku katja, ²⁵ ka Josephanya Matatjayaku katja, ka Matatjayanya Aimatjaku katja, ka Aimatjanya Nayamaku katja, ka Nayamanya Itjiliku katja, ka Itjilinya Nakaiku katja, ²⁶ ka Nakainya Maatjaku katja, ka Maatjanya Matatjaiku katja, ka Matatjainya Tjiminku katja, ka Tjiminnga Tjatjikaku katja, ka Tjatjikanya Tjautaku katja, ²⁷ ka Tjautanya Tjuwananku katja, ka Tjuwanannga Ritjaku katja, ka Ritjanya Tjirrapapilku katja, ka Tjirrapapilnga Tjiiltiilaku katja, ka Tjiiltiilanya Neřiku katja, ²⁸ ka

Nerinya Milkaiku katja, ka Milkainya Atiku katja, ka Atinya Katjamku katja, ka Katjamnга Ilmatamaku katja, ka Ilmatamanya Uurku katja,²⁹ ka Uurnga Tjatjuwaku katja, ka Tjatjuwanya Iliyatjaku katja, ka Iliyatjanya Tjarimku katja, ka Tjarimnга Matjataku katja, ka Matjatanya Leviku katja,³⁰ ka Levinya Tjimiyanku katja, ka Tjimiyannга Judah-ku katja, ka Judah-nya Josephaku katja, ka Josephanya Tjaunamaku katja, ka Tjaunamanya Iliya-kimaku katja,³¹ ka Iliya-kimanya Miliyaku katja, ka Miliyanya Minaku katja, ka Miinanya Matatjaku katja, ka Matatjanya Nathanku katja, ka Nathananya Davidaku katja,³² ka Davidanya Jesse-ku katja, ka Jesse-nya Uupitaku katja, ka Uupitanya Pawatjaku katja, ka Pawatjanya Tjamanku katja, ka Tjamanna Naatjanku katja,³³ ka Naatjananya Amina-tapaku katja, ka Amina-tapanya Adminku katja, ka Adminnга Arniku katja, ka Arninya Iitjiranku katja, ka Iitjarananya Piritjiku katja, ka Piritjinya Judah-ku katja,³⁴ ka Judah-nya panya wati ini Jacobaku katja, ka Jacobanya panya Isaacaku katja, ka panya Isaacanya Aipuramaku katja, ka Aipuramanya Taiรaku katja, ka Tairanya Nayaku katja,³⁵ ka Nayanya Tjirakaku katja, ka Tjirakanya Ruuku katja, ka Ruunya Pilikaku katja, ka Pilikanya Iipaku katja, ka Iipanya Tjiilaku katja,³⁶ ka Tjiilanya Kainanku katja, ka Kainananya Apakataku katja, ka Apakatanya Tjimaku katja, ka Tjimanya panya wati ini Noah-ku katja, ka panya Noah-nya Lamikaku katja,³⁷ ka Lamikanya Mitjutjilaku

katja, ka Mitjutjilanya Inakaku katja, ka Inakanya Tjaritaku katja, ka Tjaritanya Maalalilku katja, ka Maalalilnga Kinanku katja, ³⁸ ka Kinannga Inatjaku katja, ka Inatjanya wati ini Tjiitjiku katja, ka Tjiitjinya wati panya Adamaku katja, ka Adamanya panya Godaku katja nyinangi. Nyanga paluru tjana Josephaku walyt-japiti iritinguru nyinakatintyja wanapari wanapari ngarangi.

4

Jesunya Mamu Satantu Arkantja (Matthew-ku 4:1-11; Markaku 1:12-13)

¹ Ka Jesunya baptise-katinyangka malangka karu Jordantanguru malaku anu Kurunpa Milmilngatjara, ka Kurunpa Milmiltu palunya katingu ilytjikutu. ² Ka ilytjingka nyinanyangka palunya mamungku arkaningi kurantjikitjangku tjintu 40. Ka paluru mai ngalkuwiya alatjitu nyinangi tjintu nyara palula tjanala munu malangkalta pałtjatjiratjaringu.

³ Ka Satantu palula wangkangu alatji, “Mulapa nyuntu Godaku katja nyinanyi? Wanyu puli nyangangka wangka mairingkunytjaku.”

⁴ Palu Jesulu wangkangu, “Wiya, panya nyiringka walkatjunkunytja ngaranyi alatji, ‘Anangungku mai kutju rawangku ngalkula puťu wanka titutjara nyinaku Godala tjungu.’”
*

⁵ Ka piruku Satantu palunya ngura katutja kutjupakutu katingu munu katunguru

* ^{4:4} Deuteronomy 8:3

warpungkula nintinu ngura uwankara manta winkitja. ⁶ Munu wangkangu palula, “Nyuntu ngayunya pupakatira walkunyangkampa, ngayulu nyuntunya tjunkuku ngura nyanga uwankara mayatjarira kanyintjaku. Panya nyanganpa uwankara ngayuku, kaña ngayulu mukuringkula ngurkantara tjunkupai kutjupangku mayatjangku kanyintjaku. ⁷ Wanyuṇi ngayunya pupakatira walkunma, kaña ngura nyanganpa uwankara nyuntunya ungkuku.”

⁸ Ka Jesulu wangkangu, “Wiya, panya nyiringka walkatjunkunytja ngaranyi alatji,

‘Mayatja Godanya kutjuya walkunma munuya palula kutju wangaṇarangku kulinma.’” *

⁹⁻¹¹ Ka Satantu piruku palunya katingu Jerusalemalakutu, munu ngaratjunu timpula katu mulapa munu wangkangu alatji, “Mulapa nyuntu Godaku katja nyinanyi? Wanyu wararakati nyanganguru, panya nyiringka walkatjunkunytja alatji ngaranyi,

‘Godalu palumpa angelpa tjuta witulku nyuntunya atunymara kanyintjaku,

kaya nyuntunya marangku katura kanyilkku punkannyangka apungku tjina katantankunytjaku-tawara.’” *

Alatji mamungku palunya wangkangu arkantjik-itjangku.

¹² Palu Jesulu wangkangu, “Wiya, panya nyiringka walkatjunkunytja ngaranyi alatji,

* **4:8** Deuteronomy 6:13 * **4:9-11** Psalm 91:11-12

‘Nyura uti Mayatja Godala ngunti tjapintja wiyangku wantima paluru witulya pulkangku palyannyangka unytjungku nyakunytykitjangku.’” *

¹³ Ka Satantu palunya kutjupa kutjupa tjutawanungku arkara wiyareringkula unytjungku wantikatira anu ngula malaku pitjala piruku arkantjikitjangku.

*Jesulu Tjukurpa Wangkanytja Ngura Galileela
(Matthew-ku 4:12-17; Markaku 1:14-15)*

¹⁴ Nyara palula małangka Jesunya malaku anu Galileelakutu, ka Kurunpa Milmilnga palula tjunguṇu ngarangi munu witulyanangi palunya tjukurpa wangkanytjaku munu pikatjara palyarunguntjaku kulu. Kaya ngura winkitjangku kuliningi palunyatjara tjakultjunkunyangka. ¹⁵ Panya paluru ngura tjutangka wali inmatjangka tjarpara anangu tjutangka tjukurpa nintilpai. Kaya anangu uwankarangku pulkara pukularira palunya mirawañingi.

*Ngura Walytjangka Jesunya Wantinytja
(Matthew-ku 13:53-58; Markaku 6:1-6)*

¹⁶ Ka Jesunya Nazarethala malaku wirkanu ngura panya walytjangka. Paluru panya ngura nyara palula pulkaringu, munu paluru Saturday-ŋka, tjintu panya pakuwiyaringku-paingka, wali inmatjangka tjarpara nyinapai, anangu tjutangka tjungu. Munu Saturday kutjupangka paluru tjarpara nyinakatingu, ka kutjupangku palunya altingu, nyiringuru tjukurpa

* **4:12** Deuteronomy 6:16

nyakula wangkanytjaku. Ka paluru pakara ngarangu wangkanytjikitja. ¹⁷ Ka palunya nyiri ungu tjukurpa panya wangkatjara Aitjayalu iriti walkatjunkunytja, ka paluru alara tjukarurungku nguriра nyakula wangkangu alatji,

18 “Mayatjaku kurunpa ngayula tjungu alatjiу nyinanyi,

panya paluruни ngurkantanu tjukurpa wiru wangkanytjaku ngaltutjara tju tangka.

Munuни iyanu karpintja tju tangka wangkanytjaku kulu tjana palumpa tjukurpa kuliа araltjarinytjaku.

Munuни kuру pati tju takutu kulu iyanu tjana kulu kuру alaringkula nyakunytjaku. *

Nyara paluruни iyanu kurangka nyinanytja tju та kulu walatjunkunytjaku anangu kura tju tangku mayatjarira kanyira kurrannyangka. *

19 Munuни iyanu nyanga alatji kulu tjakultjunkunytjaku

panya tjintu nyangatja alatjiу wirkanu Mayatjalu palumpa anangu tju та pukulmara wankaru kanyintjaku.” *

20 Munu Jesulu wangkara wiyaringkula nyiri panya palunya malakungku ungu wati panya palunya munu nyinakatingu. Kaya anangu uwankarangku pulkara mulapa palunya nyan-gangi. ²¹ Ka paluru wangkangu tjanala,

* **4:18** Aitjayaku 61:1 * **4:18** Aitjayaku 58:6 * **4:19** Aitjayaku 61:2

“Tjukurpa nyangatja alatjiṭu kuwari utiringu, panya kuwariṇa wangkangi, ka nyura kulinu.”

²² Kayanku aŋangu tjutangku tjukurpa nyangatja kulira urulyaraṇu munuya pukułaringu, palu wangkaraya kulinigi, “Yaaltji-yaaltjingku nyangangku tjukurpa nyanga pulka wangkanyi? Nganaṇa ninti, nyanga paluru watı alatjiṭu Josephaku katja.”

²³ Ka Jesulu piruku wangkangu, “Nintingkuna nyuranya kulini panya nyura ngayunya wangkanytjikitja mukuringkunyangka nyanga alatji, ‘Wanyunkuwi nyangangku walytjangku-warara palyala.’ Munu nyura piruku mukuringanyi ngayulu ngura walytjangka palyannyangka nyakuntjikitja, panya ngayulu ngura Kapunimala palyantja purunypatu. ²⁴ Kaṇa nyurala tjukarurungku wangkanyi panya aŋangu tjutangku watı wangkatjara ngura kutjupitjangku wangkanyangka wanganarangku kulilpai, palu wangkatjara nguraritjangku wangkanyangkaya kulilwiyangku wantipai. ²⁵ Palu wanyuya kulila, panya iriti wanakala tjuṭa nyinangi wangkatjara ini Ilaitjanya nyinanytja arangka. Ka panya minangku puyintja wiya ngarangi yiya maŋkurpa nguwanpa. Kaya ailurungka mai wiya nyinangi manta winkingka. ²⁶ Ka Godalu Ilaitjanya wanakala walytjakutu iyantja wiyangku wantingu munu wanakala malikitjakutu iyanu ngura kutjupakutu ini Tjarapatjalakutu ngura pulka ini Tjaitanta itingka. ²⁷ Kaya ngura nyanga Israelta aŋangu tjuṭa mulapa miri pikatjara nyinangi Elishanya

nyinanytja arangka. Pika nyara paluru kura mulapa ngarangi miringka lipiringkupai, palu Elishalu tjananya palyarunguntja wiyat̄u ngarangi, munu wati malikitja ngura kutjupanguru pitjanyangka kutju palyarungunu wati ini Naimannga. Wati nyara paluru panya Tjiriyanya ngurara nyinangi, panya ngura kutjunguruya anangu waltyta tjuṭa wangkatjaraku mukuringkupai wiya ngura waltytjangka nyinanyangka waltyta tjuṭangka. Nyanganpa panya uwankara Godalu malikitja tjeta palyarunguningi.”

²⁸ Ka nyara palulanguru inmangka panya nyinanytja tjuṭangku nyangatja kulira pulkara mulapa mirpañaringu palumpa. ²⁹ Munuya pakara Jesunya inmanguru witira katingu urilkutu puli wararanguru untura wañinytjikitjangku, panya tjanampa ngura apu katu ngarangi. ³⁰ Palu Jesunya tjanala ngururwanu małaku anu, kaya anangu tjuṭangku puṭu witiningi.

Jesulu Mamu Paintja (Markaku 1:21-28)

³¹ Palula małangka Jesunya anu ngura Kapaniyamalakutu uru Galileela wilurara munu nyara palula tjintu pakuwiyaringkupaingka wal̄i inmatjangka tjarpangu munu anangu tjuṭangka nintiningi. ³² Munu paluru tjukurpa pulka tjuṭa nintingu rapangku alatjiṭu wangkangi, kaya anangu tjuṭangku kulira urulyaraṇu. ³³ Ka wal̄i nyara palula unngu wati kutjupa mamutjara nyinangi munu pulkara alatjiṭu mirara wangkangu Jesula, ³⁴ “Wati awa, nganañanya nyaantjikitjan

mukuringanyi. Nyuntun pitjangu nganañanya wiyanjtikitja? Wantimalanya. Ngayulu nyuntumpa ninti. Nyuntu panyan milmilpa alatjitu Godalangu魯 pitjanytja.”

³⁵ Ka Jesulu mamu panya paira wangkangu, “Pilunari! Wati pala palunya wantikati!” Ka mungku wati panya palunya mantangka antawañingu añañgu tjutangka ngurur-ngururupa munu pikantankunytja wiyangku wati panya palunya wantikatingu.

³⁶ Kaya añañgu tjutangku nyakula urulyarara wangkangu, “Wati wangka nyaa nyanga paluru? Panya paluru witulya pulkatjarangku mamu tjuta witulpai, kaya palula kuliña mapalku wantikatipai.” ³⁷ Ka tjukurpa Jesunyatjara lipiringu ngura winkingka.

*Jesulu Pikatjara Tjuta Palyarunguntja
(Matthew-ku 8:14-17; Markaku 1:29-34)*

³⁸ Munu Jesulu tjananya wantikatingu munu anu Simonku walikutu. Kaya paluru wirkankunyangka patara tjakultjunu Simonku umari pikatjara waruringkula ngarinyangka. ³⁹ Ka Jesunya ankula minyma panya palula itingka ngarangu munu pika panya palunya painu wantikatinytjaku. Ka mapalku alatjitu pika panya waru wiyaringkula minyma panya paluru tjananya pakara mai ngalkuntjaku palyara ungu.

⁴⁰ Ka tjintu tjarpanyangka tjintu panya milmilpa wiyaringu, kaya malpa tjutangku pikatjara tjuta ngalya-katingu Jesulakutu. Ka paluru tjanala mara tjunkula uwankara palyarungunu. ⁴¹ Kaya mamu tjuta añañgu

tjuṭanguru ngulu mirara pakaningi wangkara, “Nyuntun mulapa Godaku katja!” Ka Jesulu tjananya painu piruku wangkawiyangku wantintytjaku panya alatjituaya palumpa ninti nyinanyi panya paluru Christanya Wankarunkupainya.

42 Munu mungawinki mulapa Jesulu tawunu wantikatira anu kutju maunṭalpa pilunta nyinanytjikitja. Kaya anangu tjuṭangku nguriningi munuya nyakula palunya markuningi piruku tjananya wantikatira ankunytjaku-tawara. **43** Palu paluru tjanala wangkangu, “Wiya, utiña Godaku tjukurpa wiru para-wangkama ngura kutjupa tjuṭangka kulu mununa tjakultjunama Godalu anangu tjuṭa mayatjangku walytjanmara kanyintja. Panya alatjinkunytjakuni Godalu iyanu.” **44** Munu paluru walı inmatja tjuṭangka para-wangkarinangi ngura winkingka manta Judealawanu.

5

Jesulu Malpa Mankurpa Altintytja (Matthew-ku 4:18-22; Markaku 1:16-20)

1 Tjiṇtu kutjupa Jesunya urungka itingka ngarangi uru ini Kina-tjaratala. Munu tjukurpa wangkangi anangu tjuṭangka. Kaya tjuṭa mulatu utjura utjura ngarangi Godaku tjukurpa kulintjikitja. **2** Ka Jesulu nyangu pauta kutjara urungka itingka ngaranyangka panya antipina witilpai tjuṭangkuya wantikatira ankula net tjuṭa paltjiningi. **3** Ka Jesunya tatinu

pauta kutjungka panya Simonkungka munu palula wangkangu tjukutjuku ma-uŋtuntjaku urukutu munu Jesulu pauta katunguru nyinara wangkangi aŋangu tjuṭangka.

⁴ Munu wangkara wiyingkula Simonta wangkangu, “Pauta nyangatjaya ma-uŋtula ngatikutu nguwanpa munuya net pala waŋira kuka tjuṭa witila.”

⁵ Ka Simontu wangkangu, “Mayatja, puṭulirala tjinturingu munga waṛangka palu nyuntu wangkanyangkala palyaṭu arkara waŋinyi.”

⁶ Munuya ma-pitjala urungka net waŋingu munuya winki mulapa witiṇu munuya net panya puṭu ngalya-ilara pautangka tjarpatjunangi. Ka net nguwanpa alatjiṭu kaṭakatingi. ⁷ Kaya Simontu tjana malpa panya pauta kutjupitja altingu alpamilara ilantjaku. Kaya mulapatu pitjangu munuya tjarara pauta panya kutjupangguru tjanampa pautangka tjunangi. Ka tjaalyngaranyangka pauta panya kutjara nguwanpa urungka tjarpangi.

⁸ Ka Simontu ini kutjupa Peterlu nyangatja nyakula urulyarara kuntaringu, munu palula kuranyu tultjungarakatira wangkangu, “Mayatja! Nyuntun palya mulapa. Wantikatiṇi panya ngayulu palya wiya munuṇa kura kutju palyalpai.”

⁹ Munuya paluru tjana pulkara urulyaranu kuka pulka witintjatjanu. ¹⁰ Ka pula Simonku malpa kutjara panya Jamesanya Johnnga pula pulkaratu urulyaranu Tjipitiku panya katja kutjara. Ka Jesulu wangkangu Simonta, “Nguluringkunytja wiya. Nyanga palulanguru

nyuntu antipina wiyangku aŋangu tjuta witilku altira ngayuku walytjaringkunytjaku.”

11 Munuya pauta panya kutjara үүрүнгүүрү ма-ilarа үүрілтә tjunkula uwankara wantikatira Jesula tjunguringkula anu.

*Jesulu Wati Pikitjara Palyarunguntja
(Matthew-ku 8:1-4; Markaku 1:40-45)*

12 Kutjupa ara Jesunya tawunu kutjupangka nyinangi, ka ngura nyara palula wati kutju miri pika pulkatjara nyinangi.* Munu wati paluru Jesunya nyakula palula kuranyu punkara pulkarä ngatjinu alatji wangkara, “Mayatja nyuntu mukuringkulampaŋi palyala pika nyan-gatja wiyaringkunytjaku.”

13 Ka Jesulu marakatira palunya pampuŋu munu wangkangu, “Ngayulu mukuringanyi, ka palyariwa.” Ka mapalku alatjiŋu pika panya paluru wiyaringu wati panya palula puntungka. **14** Ka Jesulu wati panya palunya wangkangu kutjupangka nintintja wiyangku wantinytjaku. Munu palunya wangkangu, “Ankulanku wati tjukurtjarangka-warara nintila nyuntu nyanga palyaringkunytjatjanungku. Munu kuka katira uwa wati palunya pungkula Godanya ungkunytjaku. Panya aŋa nyan-gatja Moselu wangkangu pika palyaringkula alatjingantjaku. Kaya wati tjukurtjarangku,

* **5:12** Anangu kutjupa pika nyanga palunyatjara nyuntu pampurampa pika nyanga palunya mantjilku. Nyawa chapter 4 munu verse 27.

anangu tjutangku kułu nyakula mulamula-ringkuku nyuntu palyaringkunyangka.” Alatji Jesulu wangkangu wati panya palula.

¹⁵ Ka tjukurpa panya paluru lipiringu ngura winkingka. Kaya anangu winki mulapa palulakutu pitjangi tjukurpa kulintjikitja paluru wangkanyangka. Kaya pikatjara tjuta kulu rawa pitjangi palyarunguntjaku. ¹⁶ Ka tjuṭa ara paluru wangkara wiyingkula ankupai maunṭalpa ngura pilunta Godala tjapintjikitja.

*Jesulu Wati Wawanypa Palyarunguntja
(Matthew-ku 9:1-8; Markaku 2:1-12)*

¹⁷ Tjintu kutjupa Jesulu anangu tjutangka nintiningi wali unngu, kaya wati Paratji munu Moseku tjukurku ninti tjuṭa nyara palula tjungutu nyinangi. Wati nyanga paluru tjana ngura tjukutjuku tjutanguru pitjangu panya uru Galileela itingka ngura tjuta ngarala wañanangi. Kaya kutjupa tjuṭa ulpariranguru pitjangu Jerusalemalanguru munu ngura ititja tjutanguru kułukulu.

Ka panya Godaku witulya Jesula ngarangi alatjiu pikatjara tjuṭa palyarunguntjaku. ¹⁸ Kaya wati kutjupa tjutangku pikatjara wawanypa mantarangka ngaritjunkula katura katingu Jesulakutu. Munuya walingka wirkara kuliningi tjarpura Jesula kuranyu ngaritjunkunytjikitjangku. ¹⁹ Palu anangu tjuṭa mulapa alangka anga-ngařanyangka tjana puṭu tjarpangi. Munuya wali paranyakula wañara kuliningi, “Yaaltjingařala tjarpaku?” Munuya palulanguru wali katukutu

tati^{ra} wali katutja alaⁿ munuya wati panya pikatjara mantarangka ngarintjya walatjunkula Jesula tjinangka itingka tjunu. ²⁰ Ka Jesulu nyakula kulinu, “Mulapa nyanganpa ngayuku raparingkula mulamularingu wati nyangatja ngayulu palyarunguntjaku.” Munu wangkangu wati panya palula, “Wati ngana, Godalu nyuntunya kura tju^{ta} palyantjitjanguru kalypangku wantinyi pungkunyta wiyangku.”

²¹ Kayanku wati panya Moseku tjukurpa nintilpai tju^{ta}ngku munu Paratji tju^{ta}ngku ku^{lu} alatji unngu kuliningi, “Ai! Wati yaalitja nyangatja? Tjingurunku nyangangku walytjangku Godanya-palku kulini munu kura palyantjitjanguru kalyparingkunykitjangku wangkanyi. Wati kurangku nyangangku ngunti wangkanyi. Panyatjampal Godalu kutjungkumpa kura palyannyangkampal wangkapai kalypangku pungkuwiyangku wantintjikitjangku.”

²²⁻²⁴ Ka Jesulu tjana unngu kulintja nintingku kulinu munu wangkangu, “Nyaaku nyura alatji unngu kulini? Nyura kuwari nyangangi ngayulu wati nyanga palula wangkanyangka munu nyura kutjupa kutjupa nyakunyta wiya. Palulanguru nyura tjinguru kulini ngayunya ngurpa-palku, munu nyura ngayuku mulamularingu kuwiyangku wantinyi. Palu kuwari nyangan^a wati nyanga wawanypa wangkara palyarungunuⁱ. Ka nyanga nyura nyakuku kuwari pakannyangka, munu nyura palulanguru mulamularingu kuku, ngayulu panya ngañmany^{ta} wangkanytjitzaku, panya ngayulu

Watiku Katjangku mantangka nyanga nyinara, anangu kutjupa kura tjuta palyantjitjanguru kalypangku wantintytjaku ngaranyi alatjtutu.” Munu palulanguru piruku wangkangu wati panya pikatjarangka, “Wati awa, pakaranku mantara mantjira ngurakutu ara.”

²⁵ Ka mulapatu wati panya paluru pakara mantara mantjinu anangu winkingka mirangka, munu ngurakutu ankula iwarangka Godanya pulkara walkurinangi. ²⁶ Kaya anangu tjutangku nyakula pulkara urulyarara wangkangi, “Ai, wiru mulapala kuvari kutju ngurpangku nyangu witulya pulkangku palyannyangka.” Munuya tjana kulu Godanya pukularira walkuningi.

*Jesulu Wati Levinya Altinytja
(Matthew-ku 9:9-13; Markaku 2:13-17)*

²⁷ Nyanga palula malangka Jesunya walinguru pakara anu munu nyangu wati ini Levinya wati panya anangu tjutangka kamantaku mani mantjilpai. Munu paluru nyinangi wiltjangka iwarangka itingka. Ka Jesulu palunya wangkara altingu, “Pitjalani ngayunya wañala!” ²⁸ Ka Levilu pakara uwankara wantikatingu munu palunya wañanu nintintja tjutangka tjunguringkula.

²⁹ Munu Levilu palumpa ngurangka mai pulka palyara mani mantjilpai tjuta, anangu kutjupa tjuta kulu, altingu tjunguringkula ngalkuntjaku, anangu winki mulapa. ³⁰ Kaya Paratji tjutangku munu wati Moseku tjukurku ninti tjutangku nyakula Jesuku nintintja tjutangka wangkangi,

“Nyaaku nyura mani mantjilpai tjutangka wati kura kutjupa tjutangka kulu tjunguringkula mai ngalkuṇi? Uti nyura tjanala tjunguringkuwiyangku wantira wati palya tjutangka kutju tjunguringama.”

31-32 Ka Jesulu wangkangu tjanala, “Anangu palya tjuta ngangkariku mukuringkupai wiya, palu pikatjara tjuta kutjuya mukuringanyi. Ka ngayulu pitjangu anangu Moseku tjukurwanu nyinapai tjuta altintytjikitja wiya, palu anangu nyanga nyura nyakula wantipai tjuta altintytjikitjana pitjangu tjana piiwiyyaringkula kura wantira kampa kutjuparinytjaku.”

*Paratji Tjutangku Jesunya Tjapintja
(Matthew-ku 9:14-17; Markaku 2:18-22)*

33 Kaya anangu panya paluru tjana piruku Jesula wangkangu, “Kulila, panya Johnku nintintja tjutangku munu Paratji tjutaku nintintja tjutangku kułukuluya ilału-ilału mai wantipai Godala tjapintjikitjangku, palu nyuntumpa nintintja tjutangkuya kutjupara Godala tjapintjikitjangku mai wantintja wiyangku titutjarangku ngalkuṇi.”

34-35 Ka Jesulu wangkangu, “Wiya, nyura panya Moseku tjukurwanu nyinapai tjuta, palu ngayuku nintintja tjutaya ara kutjupawanu nyinanyi ara kuwaritjangka ngayulu nintintjiangka, ka ara nyanga paluru pula titutitu ngaranyi tjungu wiya. Wanyuya kulila ara panya watingku kuri altintytja, panya nyara palula ara kuri altintyangka wati panya palumpa malpa tjutangku tjunguringkula pukularira mai

ngalkupai wantinytja wiyangku. Palu ngula wati panya palunya kutjupa tjutangku witira katinyangka malpa tjutangku palumpa tjituru-tjitururiku munuya nyara palulanguru kutju mai wantira nyinaku.”*

³⁶ Munu Jesulu tjanala tjukurpa aña kutjupat-jara wangkangi nyanga alatji, “Kulilaya aña manta ratjara! Panya aña angungku palumpa upukuta irititja alaringkunyangka, aña angatjunkun-ytikitjangku upukuta kuwaritjanguru, manta ra tjukutjuku kañara, upukuta panya irititjangka tjungura wakantja wiyangku wantipai, paltjinnyangka kañakatinnytjaku-tawara. Panya upukuta palunya paltjinnyangka manta ra panya tjungura wakantjanya tjukutjukuringkupai, munu upukuta panya irititja ilara kañantankupai, ka aña pulkaringkupai. Ka paluru panya upukuta kuwaritjangka kulu puþu tjarpanyi, panya paluru mantara tjukutjuku palulanguru kañara mantjinu, ka upukuta paluru kulu kuraringkupai.

³⁷ “Munuya piruku aña kutjupa kulu kulila palu purunypatu wainaku yakutjatjara. Panya watingku kukaku miringuru yakutja palyal-pai waina kuwaritja tjutira kanyintjikitjangku. Palu paluru yakutja irititjangka waina kuwaritja tjutilpai wiya, panya waina kuwaritja tjutinnyangka wainaku panya wiña yakutja un-

* **5:34-35** Nyanga alatji Jesulu palurunku wangkangi panya ngulaya palumpa mirpantju tjutangku palunya witira katingu munuya pungu, kaya palumpa nintintja tjuña pulkara tji-turu-tjitururingu munuya mai ngalkuwiya wantira nyinangi.

ngu lipiringkupai, ka kukaku miři irititja pilti ngaranytjatjanu tjilpiraralpai, ka waina mantangka tjutira wiyaringkupai. ³⁸ Pala palulatawara paluru waina kuwaritja yakutja miři kuwaritjangka tjutilpai tjulangka, ka wainaku wiřa lipiringkunyangka yakutja kuļu lipiringkupai tjilpirarantja wiya.

³⁹ “Ka aŋangu waina irititja tjikilpai tjutaya waina kuwaritjaku putu mukuringkupai, panya tjana wangkapai, ‘Waina nyanga irititja mayu wiru mulapa, ka kuwaritja mayu wiya, nyampa nguwanpa.’” Alatji Jesulu tjanala wangkangi tjana palumpa tjukurpa munu Moseku tjukurpa ngunti tjunguntjaku-tawara.

6

Tjintu Milmiltा Wangkanytja (Matthew-ku 12:1-8; Markaku 2:23-28)

¹ Kutjupa-ařa Saturday-ngka tjintu panya pakuwiyaringkupaingka Jesunya tjana kaanawanu anangi mai wiita tjutangka unnguwanu. Kaya palumpa nintintja tjutangku unŋinypa marangku mantjira runyura ngalkukatingi. ² Palu Paratji tjutangku tjananya nyakula wangkangu alatji, “Nyura nyaaku tjintu nyanga pakuwiyaringkupaingka mai unŋinypa urani? Panya alatji palyařa nyura warkarinyi munuya nganampa ařa kuranji, panya tjukurpa ngaranyi tjintu nyanga milmiltा warkarinytja wiyangku wantinyytjaku.”

³⁻⁴ Ka Jesulu wangkangu tjanala, “Palu nyura wanyu nyiringka nyakunytja wiyatū

panya iriti mayatja Davidalu paltjatjiratjarira Godaku tiinta milmilta tjarpa mai panya milmilmarra tjunkunytja ngalkunu munu palumpa tjungutja tjuṭa kuļu ungu ngalkula paltjaringkunytjaku. Palu panya tjukurpa ara ngaranyi tjukurtjara tjutangku kutju mai nyara palunya ngalkuntjaku. Ka paluru tjana tjukurpa ara nyanga palunya kuliṛa wantingu munuya mai ngalkunu, palu kutjupa tjutangku tjananya paintja wiyangku wantingi paltjatjiratjarira ngalkunnyangka.”

⁵ Munu Jesulu piruku wangkangu alatji, “Uwa, nyura uti kulinma panya ngayulu Watiku Kat-janya mayatja pulka mulapa nyinanyi, mununa ngayulu alatjiṭu wangkapai kutjupa kutjupa tjuta tjintu panya pakuwiyaringkupaingka palyant-jaku.”

Wati Mara Wawanypa Palyantja
(Matthew-ku 12:9-14; Markaku 3:1-6)

⁶ Munu Saturday kutjupangka tjintu panya pakuwiyaringkupaingka Jesulu wali inmatjangka tjarpa aŋangu tjutangka nintiningi. Ka wati kutju nyara palula nyinangi miña waku nyuti-nyuti tiwilpa. ⁷ Kaya wati Moseku tjukurpa nintilpai tjutangku Paratji tjutangku kuļu ilangku nyangangi tjintu panya pakuwiyaringkupaingka pikatjara palyarungunnyangka nyakula palunya kuranmankunytjikitjangku. Munuya kuliningi, “Tjinguru kuwari wati nyanga paluru wati nyanga miña tiwilpa palyarungulku tjintu nyanga pakuwiyaringkupaingka.”

8 Ka Jesulu nintingku kuliningi tjana unngu kulinnyangka munu wangkangu wati panya pikatjarangka, “Pakala munu pitjala nyangangka ngururpa ngara.” Ka wati panya paluru mulapatu pakanu munu pitjala ngarangu tjanala ngururpa. **9-10** Ka Jesulu tjapinu tjanala, “Nyaalkula wanyu tjintu pakuwiyingkupaingka? Palyaringkunytjakula palyalku munta kuraringkunytjakula wantiku? Anangula alpamilalku munta iluntankukula?” Munu alatji wangkara tjananya para-nyakula wanara wati panya miña tiwilpangka wangkangu, “Miña pala warariwa!” Ka mulapatu ngalya-wararingu munu miña panya paluru palyaringu alatji.

11 Kaya Paratji tjutangku Moseku tjukurpa nintilpai tjutangku kuлу nyakula pulkara mirpañaringu munuyanku wangkara kuliningi, “Yaaltjingalkula wati nyanga palunya? Panya nyanga paluru kutjupa kutjupa tjuta tjintu pakuwiyingkupaingka palyara Moseku tjukurpa kurañi.”

*Jesulu Nintintja 12 Ngurkantankunytja
(Matthew-ku 10:1-4; Markaku 3:13-19)*

12 Tjintru kutjupa Jesunya anu pulikutu Godala tjapintjikitja munu tjapira tjinturingu.

13 Munu tjinturingkula palumpa panya malpa tjuta altingu munu tjanalanguru wati **12** ngurkantanu palumpa nintintja tjuta nyinanytjaku munu tjananya ininu *Iyantja Tjuta*. **14-16** Paluru ngurkantanu Simonnga,

munu palunya ini kutjupa tjunu Peternya,* munu palumpa małanypa kułu ngurkantanu Andrew-nya. Munu palulanguru ini nyanga palunya tjananya kułu ngurkantanu Jamesanya, Johnnga, Philipanya, Patjalamunya, Matthew-nya, Thomasanya, munu James kutjupa panya Alpi-yatjaku katja, munu Simon kutjupa kułu ngurkantanu, panya paluru Rome-anyा ngurara tjuta Israeltanguru paira iyantjikitja pulkara mukuringkupai. Munu Jesulu ngurkantanu Jude-nya Jamesaku katja, munu panya pungkunytjaku nintlpainya kulu ngurkantanu wati Judasanya ini kutjupa Kariyatanya.

*Jesulu Wangkanytja Munu Palyarunguntja
(Matthew-ku 4:23-25)*

¹⁷ Munu palulanguru Jesunya pulinguru ukalingu palumpa iyantja tjuṭa kułu munuya mantangka wirkara ngarangi. Kaya anangu winki mulapa palunya wañalpai kutjupa tjuṭa kułu Jesula tjanala tjunguringu ngura tjuṭanguru Jerusalemalanguru munu Tayala Tjaitanta tjanalanguru kulu. ¹⁸ Nyara paluru tjanaya pitjangu Jesulu tjukurpa wangkanyangka kulintjikitja kaya tjanala tjungu pitjangu pikatjara tjuṭa munu mamutjara tjuṭa kułu paluru palyarunguntjaku. Ka paluru tjananya pikatjara uwankara palyarungunu munu mamu tjuṭa kułu tjanalanguru painu. ¹⁹ Uwa, Jesulu witulya pułkangku tjananya pampura palyarunguningi pikatjara uwankara. Kaya

* **6:14-16** Ini nyanga Peternya wangkanyi “apu walu.”

añangu winkingku mara katuningi palunya pampura palyaringkunytjikitjangku.

*Pukulmankunytja Munu Ngulutjunkunytja
(Matthew-ku 5:1-12)*

20 Ka Jesulu palumpa nintintja tjuta nyakula tjanala wangkangi alatji,
“Nyura kutjupa tjuta ngaltutjara nyinanyi ulytja tjuta kanyintja wiya.

Palu nyuranya Godalu mayatja pulkangku walytjanmaña kanyini, ka palulanguru nyura pukulpa nyinaku.

21 Nyura kutjupa tjuta pałtjatjiratja nyinanyi mai wiya.

Palu nyuranya Godalu alatjitu pałtjalku pukulpa nyinanytjaku, ka palulanguru nyura pukulpa nyinaku.

Nyura kutjupa tjuta tjituru-tjituru nyinara ulanyi.

Palu nyuranya Godalu ikaringkunytjaku palyalku, ka palulanguru nyura pukulpa nyinaku.

22-23 “Ngayulu panya Watiku Katjanya Godalu panya iyantja, ka nyura ngayunya wañannyangka añangu kutjupa tjuta tjinguru nyurampa kuraringkuku munuya nyuranya pařa iyalku. Tjinguruya nyuranya warkira kurara pungkuku munuya nyuranya ngunti kuranmankuku tjukurpa ngunti tjuta tjungura wangkara. Palu tjana alatjingannyangka nyura wantima munu nyara palulanguru nyura pukulpa nyinaku. Panya iriti tjanampa walytjapitingku palu purunytyjuťu Godaku

wangkatjara tjuta kuraningi. Ka tjana kuwari nyuranya palu purunytyju kurannyangka nyura uti Godaku pul̄kāra pukularira wāarakatima, panya paluru nyurampa wīru mulapa ungkunytykitjangku pātāra kanyini ngura nyara ikaringga." Alatji Jesulu tjanala wangkangi palumpa nintintja tjutangka.

24 Munu palulanguru paluru anangu kutjupa tjutangka wangkangi alatji,

"Kulilaya mani ulytja pul̄katjara tjuta! Panya nyurampa tjituru-tjituru pul̄ka ngula ngaraku.

Panya nyura mantangka nyanga pul̄katjara pukulpa nyinanytjatjanu ngula pika pulkangka nyinaku tjituru-tjituru.

25 Kaya pāltja nyinanytja tjuta kūlu kulila! Panya nyurampa tjituru-tjituru pul̄ka ngula ngaraku.

Panya nyura mantangka nyanga pāltja nyinanytjatjanu ngula pāltjatjiratja pul̄ka nyinaku.

Kaya ikaringkupai tjuta ngapartji kulila! Panya nyurampa tjituru-tjituru pul̄ka ngula ngaraku.

Panya nyura mantangka nyanga ikaringkula pukulpa nyinanytjatjanu ngula tjituru-tjituru pul̄ka nyinara ulaku.

26 "Uwa, nyura pukularipai anangu uwankarangku nyuranya mirawañira walkunyangka. Palu nyurampa tjituru-tjituru pul̄ka ngula ngaraku. Panya iritiya nyurampa walytjapiti tjutangku palu purunytyju watı

wangkatjara ngunti tjuta mirawaŋgi tjukurpa ngunti wangkanyangka.”

Alatji Jesulu aŋangu kutjupa tjutangka wangkangi.

Nyurampa Mirpaŋtu Tjutaku Mukuringkun-ytaku

(Matthew-ku 5:38-48; 7:12)

27-30 “Palu nyuralana wangkanyi ngayula kulilpai tjutangka nyanga alatji nyurampa mirpaŋtu tjutaku pulkara mukuringama munuya wiru palyanma nyurampa kuraringkupai tjutaku kuļu. Pukulmanamaya nyuranya kurannyangka munuya tjanampa Godala tjinpinma nyuranya kurara pungkunyangka. Tjinguru kutjupangku nyuntunya anařa mita-mita pungkunyangkampa mita-mita kampa kutjupa nintila piruku pungkunytjaku. Tjinguru kutjupangku nyuntumpa upukuta pauntjingara nyuntulanguru tjulyannyangkampa mantara nyuntu kanyintja kutjupa kuļu ungama palunya. Munu aŋangungku ngatjinnyangka ngalturingkula ungama munu kutjupangku nyuntumpa kutjupa kutjupa katinyangkampa wantima waŋara malakungku tjulyalwiyangku.

31 “Uwa, panya nyura mukuringanyi aŋangu kutjupa tjutangku nyurampa wirura palyantjaku. Palu wanyu nyura alatjitu tjanampa mukulyangku wirura palyanma wantintjya wiyangku.

32-33 “Tjinguru nyura aŋangu kutjupaku mukuringanyi paluru nyurampa mukuringkunyangka kutju. Ka Godalu nyakula

nyurampa pulkara pukulariku? Wiya, panya anangu kura tjuta palu purunypaṭu nyinanyi munuya ngapartji mukuringkunyaŋka kutju mukuringkupai. Palu nyura uti nyurampa kuraringkupai tjuṭaku mukuringama alatjiṭu munu tjanampa wiru palyanma.

34 “Tjinguru nyura anangu kutjupa wiru kutju ungkupai kulira paluru ngula ngapartji wirungku ungkunytjaku. Ka Godalu nyakula nyurampa pulkara pukularipai? Wiya, panya anangu kura tjuṭangku kulu palu purunyṭju ungkupai ngapartji ngula ungkunytjaku.

35 Palu wanyu Godanya kulinma panya paluru mukuringanyi nyura mirpaṇṭju tjuṭaku mukulya pulka nyinanytjaku munu tjanampa wiru palyantjaku, munu intjanungku ungkunytjaku ngapartji kulintja wiyakitjangku. Ka nyura palulanguru ngula pulka mulapalta mantjilku Godalu ungkunyangka munu nyura God Katutja Pułkaku katja unṭalpa mulapa nyinaku, panya paluru anangu kuralpai tjuṭaku mukuringkupai alatjiṭu munu kulira wantipai tjuṭaku kulu.

36 Uwa, ngaltunyṭjuya nyinama Mama Godanya purunypa panya paluru uwankaraku ngaltunyṭju nyinanyi.”

*Nyakula Kuranmankuwiyangku Wantinytjaku
(Matthew-ku 7:1-5)*

37 Munu Jesulu piruku wangkangi alatji, “Anangu kutjupaya nyakula ngurkantara kuranmankuwiyangku wantima. Panya nyura nyanga alatjingannyangka Godalu nyuranya kulu ngula palu purunypaṭu

ngurkantara kuranmankuku. Munuya palu purunytytu aŋangu kutjupa nyakula ngukantja wiyangku wantima. Panya nyura nyanga alatjingannyangka Godalu nyuranya kuŋu ngula palu purunypatu kuranmankuku. Munuya aŋangu kutjupangku nyuranya kurannyaangkampa palunya kalypangku kuralwiyangku wantima, ka Godalu nyuranya palu purunypatu kura palyannyangka nyakula kalypangkuwantiku. ³⁸ Munuya ngaltingkula munytjangku ungama, ka Godalu palu purunypatu nyuranya ngapartji ngaltingkula pulka mulapalta ungkuku nyura ungkunytytjangka waintara mulapa. Palu nyura kutjupa tjuṭa tjukutjuku ungkunyangka paluru palu purunypatu nyuranya ngapartji tjukutjukuwantiku ungkuku.”

³⁹ Munu paluru piŋku tjukurpa ara kutjupatjara tjanala wangkangi alatji, “Kulilaya! Wati kuřu patingku wanyu wati kuřu pati kutjupa katirinkupai? Wiya. Paluru pula kutjaratu piṭi ngatingka punkalku. ⁴⁰ Munu wanyu piŋku kulinma. Aŋangu nintiringkupai wanyu palumpa nintilpaingka waintaripai? Wiya. Paluru pulkara nintiringkunytytatjanu kutju palumpa nintilpaingka tjungu ngaraku.

⁴¹⁻⁴² “Palu nyaaku nyura aŋangu kutjupa tjuṭa wangkara kuranmankupai? Tjinguru nyura nyanganyi Godaku walytja kutjupangka kurungka puŋu tjilpirpa tjukutjuku ngarinyangka. Palu nyurampa kurungka tjinguru puŋu pulka ngarinyi. Ka nyura kuřu palyangku-palku wangkaku palula alatji,

‘Wanyu kañanta puñu pala tjilpirpa tjukutjuku mantjira wañi.’ Palu wiya, nyura ngunti kuru palyangku-palku kañany-kañanytju watarku wangkanyi. Utı nyura nyurampa kurunguru-warara puñu pala pulkanya mantjira wañima, munu palulanguru kuru palyaringkula utilta nyakuku, anangu nyara kutjupaku kurunguru tjilpirpa tjukutjuku mantjira wañintjikitjangku.” Alatji Jesulu tjanala wangkangi tjana kura walytjangku-warara tjukarurungku ngurkantankunytjaku munu palulanguru kutju anangu Godaku walytja kutjupa kura nyakula wangkanytjaku.

*Puñunguru Anangu Wangkanytja
(Matthew-ku 7:15-20; 12:33-35)*

⁴³ Munu piruku Jesulu wangkangu tjukurpa kutjupa alatji, “Panya puñu wirungka mai kura pakalpai wiya. Ka palu purunypatu puñu kurakurangka mai wiru pakalpai wiyatı. ⁴⁴ Panya mai uwankara pakalpai puñu walytjangka kutju. Nyura puñu ili mantjilpai puñu tjilkatjaranguru munu nyura puñu kiripitji mantjilpai puñu wakalpukanguru. ⁴⁵ Ka palu purunypa anangu palyangku palya tjuta palyalpai, kurunpa palya ngarala. Ka anangu kurangku kura tjuta kutju palyalpai, kurunpa kura ngarala. Panya tjaangku wangkapai unnungunguru. Ka kurunpa wiru ngaranyangka, tjaangku wiru kutju wangkapai, palu kurunpa kura ngaranyangka, tjaangku kura kutju wangkapai.”

*Wali Kutjaranguru Tjukurpa Wangkanytja
(Matthew-ku 7:24-27)*

46 Munu piruku Jesulu tjukurpa kutjupa wangkangu nyanga alatji, “Nyaakuṇi nyura ngayunya mayatjanmananyi munu nyura kulira wantinyi ngayulu wangkanytjitja uwankara? **47** Kulilaya, aŋangu ngayulakutu pitjala munu ngayulu wangkanytjitja wangaŋarangku kulira palyannyangkampaŋa nyuranya nintilku yaaltji-yaaltji paluru nyinanytja. **48** Alatji paluru nyinanyi wati nyanga purunypa, panya paluru wali palyantjikitjangku piti-warara tjawaŋa ar-intanangi, munu apu tjiwa pulka tjuŋa ungu tjunkula waŋanu, munu wituwitu palula tjanala purkaŋangku wali palyaningi, kuŋpu ngaranytjaku. Ka ngula mina pulkangku pitjala puyinu. Ka uru pulkaringkula katuringu, munu wali panya putu unŋuningi. Ka witu alatjiŋu ngarangi urinytja wiya. **49** Palu aŋangungku ngayuku tjukurpa kulira wantirampa paluru panya wati nyanga purunypa nyinanyi. Panya paluru wali mantangka warpungkula palyanu, apu tjiwa pulka tjuŋa-warara tjunkunytja wiyangku munu mapalku palyara wiyanu. Ka ngula mina pulkangku pitjala puyinu munu uru pulkaringkula katuringu munu wali panya unŋunu. Ka mapalku alatjiŋu pilukatingu.”

7

Wati Rome-anyा Ngurara Mulamularingkun-ytja

(Matthew-ku 8:5-13; Johnku 4:43-54)

¹ Munu Jesulu tjanala tjukurpa wangkara wiyaringkula anu ngura Kapunimalakutu.

² Ka ngura nyara palula wati Rome-anyangura nyinangi. Wati paluru tjaultji tjutaku mayatja. Ka wati nyara palumpa warka palyalpai pika pulka ngaringi ilunytjikitja. Ka wati nyanga paluru wati nyara pikatjaraku pulkarra mulapa mukuringcupai.

³ Munu paluru kulinu Jesunya ila nyinanytja munu wati Jew tjutaku mayatja mankurpa altira witunu Jesunya ankula altintytjaku pitjala palumpa panya warkaripai pika palyarunguntjaku.

⁴ Kaya mulapatu ankula Jesula wirkara pulkarra tjapiningi palula wangkara, “Nyuntula wangkanytjikitjala pitjangu. Wati nyaratjanku nyuntumpa mukuringanyi nyuntu pitjala alpamilantjaku.

⁵ Wati nyara paluru nganampa Jew uwankarakutu pulkarra mukuringcupai munulanya paluru nganañanya mani ungu mungañu nganaña walî inmatja palyantjaku. Wati wirunya mulapa nyaratja.”

⁶ Ka Jesunya tjanala tjunguringkula anu wati nyara palunya nyakunytjikitja, kaya anangu tjutangku ku lu tjunguringkula wanangu palunya. Ka tjana nguwanpa ngurangka ilaringkunyangka wati mayatjangku piruku kulinu munu malpa kutjupa mankurpa witunu ngaparikatira Jesula wangkanytjaku. Kaya mulapatu ngaparikatira wangkangu palula alatji, “Awa, wanyu kulila! Wati nyara mayatjangkulanya witunu nyuntumpa, panya nyuntu mayatja pulka, ka paluru kuntaringanyi nyuntu palumpa walingka pitjala

tjarpanytjaku. ⁷ Munu paluru kunṭaringanyitu nyuntulakutu pakaṛa pitjanytjaku, panya paluru mayatja tjukutjuku, ka nyuntu mayatja pulka mulapa nyinanyi. Kalanya witunu paluru nyuntula wangkanytjaku, ka kunyu palya nyuntu nyanganguru wangka, ka wati panya pikatjara palyariwa nyuntu nyanga paṭunguru mayatjangku wangkanyangka. ⁸ Paluru kunyu ninti nyuntu Godaku war̄karipai munu panyan paluru witunnyangka wangañarangku kulira palyalpai. Ka nganampa panya malpa palu purunypatu Rome-aku mayatjangku witunnyangka wangañarangku kulira palyalpai. Munu paluru ngapartji mayatjangkutu tjaultji tjuṭa wangkara witulpai, kaya palula wangañarangku kulilpai. Ka panya paluru tjananya al̄tipai, kaya mapalku pitjapai. Munu tjananya wangkapai palyantjaku, kaya mapalku palyalpai paluru witunnyangka. Ka paluru kulini panya nyuntu palu purunypa mayatjaṭu nyinanyi munun panya nyanganguru wangkaku, ka paluru palyaringkuku wati panya palumpa war̄ka nyuntu nyanga paṭunguru wangkanyangka.” Alatjiya tjakultjunu Jesula tjanampa mayatjangku wangkanytja.

⁹ Ka Jesulu nyangatja kulira pulkara urulyaranu munu malakukutura wangkangu anangu tjuṭangka, “Kuvariṇa nyurala tjukarurungku wangkanyi, panya wati nyanga tjaultji tjuṭaku mayatja wati Jew wiya, munu paluru ngayuku mulamularinganyi pulkara alatjiṭu anangu Jew tjuṭangka waintara. Panya ngura nyanga Israelta ngayulu anangu Jew

kutjupa wati nyangatja purunyapa pulkara mulamularingkunyangka nyakunytja wiyatu.”

¹⁰ Ka wati panya tjakulpa ngaparikatintja maŋkurpa malaku anu tjanampa malpaku walikutu munuya nyangu wati panya pikat-jara ngarinintjatjanu pakara palyaringkula nyinanyangka.

Jesulu Wanakalaku Katja Wankantja

¹¹ Munu nyanga palula małangka tjukutjuku nyinara, Jesunya anu tawunu ini Naintakutu palumpa nintintja tjuṭatjara. Kaya anangu kutjupa tjuṭa kuļu palula tjunguringkula anu. ¹² Munuya nguwanpa tawunu panya Nainta kaitangka miliaringkula nyangu, anangu nguratja tjuṭangku wati ilunytja puṇu pakutjangka tjunkula tjalira ngalya-pakaltjingannyangka, urilkutu tjuṇutjunkunytjikitjangku. Ka wati nyara ilunytjanya panya minyma wanakalaku katja kutju alatjitu. Kaya anangu tjuṭa minyma palula tjunguṭu ngalya-ulara pakaṇu urilkutu.

¹³ Ka Mayatjalu minyma palunya nyakula pulkara ngalturingu panya paluru kurunpa winki tjituru-tjitururira katakatingu palumpa katja kutju-tjiratja. Ka wangkangu palula, “Ulanytja wiya.” ¹⁴ Munu ankula wati panya ilunytja pampunu. Kaya wati panya tjuṭa palunya tjalira katinytjatjanu ngarakatingu. Ka wangkangu, “Wati awa! Wangkanyiṇanta, pakala!” ¹⁵ Ka wati panya ilunytja mapalku pakaṇu munu nyinara wangkangi. Ka Jesulu miṇara katira palumpa ngunytju ungu.

¹⁶ Kaya aŋangu tjuṭangku nyangatja nyakula nguluringu munuya Godanya wal̄kuningi. Munuya alatji wangkangi, “Awari! Wangkatjara pułka mulapa Godalanguru nganaŋala wirkanu. Tjinguru Godanya nyangatja pitjangu nganaŋanya wankarunkunytjikitja.” ¹⁷ Ka tjukurpa nyanga Jesunyatjara lipiringu ngura winkingka.

*Johntu Wituntja Jesula Tjapintjaku
(Matthew-ku 11:1-19)*

¹⁸ Kaya Johnku nintintja tjuṭangku ankula Johnta tjakultjunu tjailangka nyinanyangka tjana uwankara nyakunytjatjanungku munu kulintjatjanungku Jesulu palyantja munu wangkanytja. ¹⁹ Ka paluru wati kutjara witunu ankula Jesula tjapintjaku alatji wangkara, “Mulapan nyuntu panya paluru, panya Johntu tjakultjunangi ngula wankarunkupainya pitjanytjaku? Munta tjinguru nyuntu kutjupa, kantila kuwaripatu paṭanma.”

²⁰ Kaya mulapatu ankula Jesula wirkanu munuya wangkangu, “Johntu panya baptise-katipaingkulanya witunu nyuntula tjapintjaku alatji, ‘Mulapan nyuntu panya paluru, panya Johntu tjakultjunangi ngula wankarunkupainya pitjanytjaku? Munta tjinguru nyuntu kutjupa, kantila kuwaripatu paṭanma.’”

²¹ Ka tjintu nyara palula Jesulu pikatjara tjuṭa palyarunguningi pika kutjupa kutjupa tjuṭatjara munu mamu tjuṭa kuļu painingi aŋangu tjuṭanguru, ka wati panya kutjarangku nyangangi. ²²⁻²³ Ka palulanguru wangkangu

pulala, “Ankula pula Johnta tjakultjura kuwari nyanga kulira nyakunytjatjanungku, panya kurutjara tjutangku nyanganyi, nyumpu tjuta pakañu, miri pikatjara tjuta palyaringu, pina pati tjutangku kulini, munu anangu ilunytja tjuta kulu wankaringkula pakañu. Kaya ngaltutjara tjutangku kulu Tjukurpa Palya ngayulu tjakultjunkunyangka kulini. Uwa, ankula pula Johnta wangka ngayunya tjukarurungku kulintjaku, panya paluruna ngayulu. Panya anangumpa ngayuku pulkara mulamularingkunyangka Godalu palunya pukulmankupai.”

²⁴ Ka wati panya kutjara Johntakutu malaku ankunyangka Jesulu anangu tjutangka wangkangi tjukurpa Johnngatjara alatji, “Nyura panya mungatu ilytjikutu anu wati panya Johnnga nyakunytjikitja. Palu nyaaku nyura palunya nyakunytjikitja anu? Paluru wanyu wati upa, panya nyalpi walpangku uritjingannyangka uripai, palu purunupa? Wiya, wati paluru ngulunytju wiya rapangku alatjiwu wangkapai. ²⁵ Palu nyaaku nyura palunya nyakunytjikitja anu? Tjinguru nyura anu mantara wirutjara ngaranyangka nyakunytjikitja. Palu wiya, Johnnga palu purunupa wiya, panya wati mantara wirutjara mayatja pulkaku walingka kutju nyinapai ilytjingka wiya. ²⁶ Tjakultjuraniya! Nyaaku nyura palunya nyakunytjikitja panyatja anu? Wiya, Godaku wangkatjarangku wangkanyangka kulintjikitja nyura anu, panya paluru Godaku wangkatjara pulka mulapa

nyinanyi kutjupa uwankarangka muñkara.
²⁷ Panya tjukurpa palunyatjaraya nyiringka iriti walkatjunu Godalu wangkanytja nyanga alatji,
 'Ngayuluñatju tjakulpa wituña iyalku nyuntula kuranyu.

Ka nyara paluru ankula kuranyungku nyuntumpa iwarankuku mayatja pulka pit-janytjaku.' ” *

²⁸ Munu Jesulu piruku wangkangu tjanala, "Wati nyanga Johnnga pulka mulapa nyinangi, ka nyanga palu purunypa aŋangu kutjupa ngañmanyapa nyinanytja wiya alatjitu. Palu nyanga palulanguru kuvari aña kutjupa ngarakatinyi, panya Godalu aŋangu tjuña walytjanmara mayatjangku kanyini tjitji tjukutjuku tjuña kułukulu, kaya paluru tjana uwankara Johnta waintara pulka mulapa nyinanyi tjitji tjukutjuku tjuña kułu." Alatji Jesulu tjanala wangkangi Johnngatjara.

²⁹ Panya aŋangu nyanga paluru tjana uwankarangku ngañmanytju kuliningi Johntu wangkanyangka ilytjingka, wati kamantaku mani mantjilpai tjuṭangku kułu panya nyara paluru tjana kulira mulamularingu, "Munta mulapa Godaku tjukurpa tjukaruru alatjitu." Munuya wanganara mukuringu Johntu baptise-katinytjaku kuranguru piiwiyingkula. ³⁰ Palu Paratji tjuṭangku munu Moseku tjukurku ninti tjuṭangku kułuya paluru wangkanyangka kulira wantingi, munuya wantingi alatjitu

* ^{7:27} Malakaiku 3:1

piiwiyaringkula mukuringkunytja wiyangku Johntu ḫṛungka baptise-katinytjaku.

³¹ Munu Jesulu piruku wangkangu tjanala, ‘Palu nyura kutjupa tjuta wanyu nyaa purunypa nyinanyi? ³² Wiya, nyura tjitji tjuta purunypa kulira wantipai, panya tjitji utulu kutju nyinara mirara ngaparku wangkapai alatji, ‘Inma wirula inkara wangkatjinganingi, ka panya nyura pitjala nyaŋpinytja wiyangku wantingi.’ Kaya utulu kutjupangku ngapartji wangkapai, ‘Uwa, ka panya nganana ngapartji ulara inma tjituru-tjituru inkangi, ka nyura kulira tjunguringkula ulanytja wiyangku wantingi.’

³³ Nyanga palu purunypa panya nyura Johnnga ngalinya kulira wantingi. Panya Johnnga pitjangu munu paluru mai waina kuļu tjikintja wiyangku wantingi Godaku warka palyantjik-itjangku. Ka panya nyura palunya alatji nyinanyangka nyakula mamutjaranmanangi. ³⁴ Ka ngayulu Watiku Katjanya pitjangu mununa mai pulka nguwanpa ngalkula waina kuļu tjikiningi Johnnga purunypa nyinanytja wiyangku, ka nyura ngayunya nyakula palu purunypa kuřanmanangi alatji wangkara, ‘Palatja wati maiku manyu, wainaku kuļu, munu aŋangu kura tjutangka malparingkula tjungu nyinapai, panya wati mani mantjilpai tjutangka munu anangu kura kutjupa tjutangka kuļu.’

³⁵ “Palya nyura alatji kaŋany-kaŋanytju wangkapai palya-palku nyinara. Palu nyangatjaya kulila, panya Godanya ninti pulka nyinanyi munu iwara tjukařuru palyaŋu aŋangu tjutangku waŋantjaku, ka iwara nyara palunya

waŋalpai tjuŋangku kulilpai, ‘Munta-uwa, iwara nyangatja Godalu kuliŋa palyanu, aŋangungku wiya.’”

Minyma Jesulakutu Pitjanytja

³⁶ Ka wati Paratjingku ini Simontu Jesunya altingu palumpa ngurangka mai ngalkuntjaku munuya tjunguringkula ngalkuningi palumpa walingka. ³⁷ Ka tawunu nyara palula nyinangi minyma kura mulapa munu paluru kulinu Jesunya Simonku walingka nyinanyangka munu uwila wiru paŋtipai mantjira pitjangu Jesulakutu. ³⁸ Munu wirkara nyangu tjana taipulangka antangku para-ngarira arintara mai ngalkunyangka, munu tjarparsa Jesula małarku ngarala ulangi. Ka ilanypa palula tjinangka punkaningi, ka pupakatira mangkangka muŋira tjina nyunyjtuningi munu uwila panya wiru paŋtipai tjutiningi palula tjinangka.

³⁹ Ka wati panya Simontu nyangatja nyakula unngu kuliningi alatji, “Ai! Wati wangkatjara-palkuna nyangatja kulinu. Utu nyangangku wangkatjarangkumpa ngurkantanama minyma nyanga kurangku pampunyangka. Palu nyaaku nyangangku pailwiyangku wantinyi.” ⁴⁰ Ka Jesulu Simonta wangkangu, “Ngayulu nyuntula wangkanytjikitja mukuringanyi.”

Ka wangkangu, “Palya nintilpai, wangkanı kaŋa kulila.”

⁴¹ Ka Jesulu wangkangu, “Wati kutjara nyinangi munu pula ngatjelu wati mani kanyilpaingka. Kutjungku ngatjelu \$25,000-ku, ka kutjungku ngatjelu \$2,500-ku, ka pulanya tjarara

ungu ngula ngapartji malakungku ungkunytjaku. ⁴² Palu wati panya kutjarangku putu kuliningi malakungku ungkunytjikitjangku. Ka pulanya wati panya mani kanyilpaingku kalypangku palyanmanu munu pulanya wantir'iyanu." Munu wangkara wiyingkula tjapinu Simonta ngapartji, "Ala, wangkan! Yaaltji pulkaṛa mukuringu wati mani kanyilpaiku?"

⁴³ Ka paluru wangkangu, "Wati panya pulka mantjintjanya."

Ka Jesulu wangkangu, "Tjukarurungku wangkangu." ⁴⁴ Munu Jesulu minyma panya nyakula Simonta wangkangu, "Nyuntu wanyu minyma nyangatja nyanganyi? Ngayulu nyuntumpa ngurakutu pitjangu, kan ngayunya mina ungkunytja wiyangku wantingi tjina paltjintjaku, palu nyanga paluruni paltjini palumpa ilanypangka mununi mangkangka muṇinu. ⁴⁵ Nyuntu ngayunya nguku kutjara nyunytjura pukułmankunytja wiyangku wantingi, palu nyanga paluruni tjina rawangku nyunytjuningi wantintyja wiyangku. ⁴⁶ Ka nyuntu ngayula katangka uwila tjutintja wiyangku wantingi, palu minyma nyanga paluru kutju ngayula tjinangka tjutinu wiru paṇtipai. ⁴⁷ Kulinin Simon? Panya Godalu minyma nyanga palunya kura tjuṭa palyantjijanguru kalypangku wantingu, ka nyara palulanguru paluru ngayuku pulkara mukuringanyi munu paluru ngayuku kuwari palyaningi. Panya anangungku kura pulka tjuṭa palyantjatjanu piiwiyingkunyangka Godanya palumpa kalyparinganyi munu

kalypangku pungkuwiyangku wantinyi,
 ka pala palulanguru paluru Godaku
 pulkara mukuringanyi. Ka anangu
 kutjupangku kura tjukutjuku palyantjatjanu
 piiwiyingkunyangkampa Godanya palumpa
 kalyparinganyitu, ka pala palulanguru
 anangu nyara paluru Godaku tjukutjukutu
 mukuringanyi kura tjukutjukunguru palumpa
 kalyparingkunyangka.”

48 Munu Jesulu wangkangu minyma panya
 palula, “Godalu nyuntunya kura tjuṭa palyantjt-
 janguru kalypangku wantinyi.”

49 Kaya anangu kutjupa tjutangku tjungu
 nyinanytjatjanungku unngu nyarararingkula
 kuliningi alatji, “Nyaa nyangangku wangkanyi?
 Panya Godalu kutjungku wangkapai kura
 palyantjtjanguru kalypangku pungkuwiyangku
 wantintjikitjangku?”

50 Palu Jesulu piṛku wangkangu minyma
 panya palula, “Nyuntu ngayuku mulamula-
 ringkunyangka Godalu nyuntunya kuranguru
 wankarunu. Ka ankula pukulpa nyinama!”

8

Minyma Jesunya Alpamilalpai Tjuṭa

1 Nyangangka malangka Jesunya pakara
 anu ngura pulka tjuṭakutu munu tjukutjuku
 tjuṭakutu kuļu munu tjukurpa palya para-
 wangkangi anangu tjuṭangka. Munu
 tjakultjunangi Godalu anangu tjuṭa mayatjangku
 walytjanmaṛa kanyintja. Kaya nintintja panya
 12 munu minyma tjuṭa kuļu palula tjungutu

para-ngarangi. ² Minyma nyara paluru tjana panya ngañmanypa mamutjara nyinangi munu pika kutjupa kutjupa tjuñatjara kuļu nyinangi. Ka tjananya Jesulu uwankara palyarungunu, kaya pukularira palunya wañarinangi. Ka panya minyma kutju ini Mary Magdalene-an⁹ ngañmanypa mamu 7-tjara nyinangi, ka Jesulu uwankara painu. ³ Ka kutjupa Tjuwananya panya Tjutjaku kuri. Wati nyara paluru mayatja pułka Irataku walingka war̄karipai. Ka minyma kutjupa ini Tjutjananya munu minyma kutjupa tjuña kulukulu. Minyma nyanga paluru tjanaya Jesunya tjananya alpamilaningi mai kuka tjananya paúra ungkula munuya kutjupa kutjupa tjuña kuļu palumpa tjanampa palyaningu palumpa tjanampa maninguru.

*Tjukurpa Uñinypa Wanira Wanantja
(Matthew-ku 13:1-9; Markaku 4:1-9)*

⁴ Kaya anangu tjutangku Jesunya pitjanyangka kulira ngura kutjupitja tjuña kuļu pitjangi nyakunytjikitja munu kulintjikitja kuļu. Ka Jesulu tjanala tjukurpa ara kutjupatjara wangkangi alatji, ⁵ “Wati kutju ma-pitjangu uñinypa mantangka wañira wañantjikitja palumpa kaanangka munu wañira wañaningu. Ka uñinypa wañira wañinyangka tjara iwarangka punkaňu. Ka anangu tjutangku iwarangka pałtjurá ankula tjinangku kuraňu, ka tjułpu tjutangku kuļu pitjala ngalkula wiyanu. ⁶ Ka uñinypa kutjupatjara punkaňu manta pulitjarangka, munu pakara mapalku

* **8:2** Magdalene-an⁹ panya Makata-linanya

piltiringu mina wiyangka. ⁷ Ka uṇinypa kutjupatjara punkanu manta tjilkatjarangka, ka pakannyangka tjilka tjuta kuļu pakara pulkaringu munu ukiri panya wanintjanya utjuṇu, ka puṭu pulkaringangi. ⁸ Ka tjara kutjupa manta palyangka punkanu munu mapalku pakara pulkaringu munu mai 100-tjararingu.”

Munu Jesulu ara nyanga palunya wangkara wiyaringkula tjanala wangkangu alatji, “Uwa, nyura pina ałangku kulirampa ngalya-kulinma tjukurpa nyanga ngayulu kuwari nyurala wangkanytja.”

Tjukurpa Panya Uninypatjara Utira Wangkanytja

(*Matthew-ku 13:10-23; Markaku 4:10-20*)

⁹ Kaya ngula palumpa nintintja tjutangku palula tjapiningi wangkara, “Wanyulanya tjukurpa nyanga palunya utira tjakultjura. Nyaa nyangangku nintini?”

¹⁰ Ka paluru tjanala wangkangu, “Uwa, ngayulu nyurala kutju Godaku tjukurpa kumpilitja utira wangkanyi, tjukurpa panya Godalu aŋangu tjuta mayatjangku walytjanmara kanyintjatjara. Palu aŋangu kutjupa tjutangkanā ara mantatja tjuta wangkara kampa kutjupara wangkapai, kaya tjukurpa wangkanyangka kulilpai palu puṭuya kulira nintiringkupai.”

¹¹ Munu paluru tjanala wangkangu, “Kulilaya, kaṇa tjukurpa panya palunya nyurala utira tjakultjura! Panya wati kaana kanyilpaingku uṇinypa waninyi, ka palu

purunypa wati tjukurtjarangku Godaku tjukurpa tjakultjunkupai aŋangu tjuṭangku kulintjaku. ¹² Ka aŋangu kutjupa tjaraya nyinanyi uŋinypa panya iwarangka punkantja purunypa. Nyara paluru tjana panya tjukurpa kulilpai, palu mamu Satantu pitjala tjananya pina kuralpai tjana tjukurku mulamularingkula wankaringkunytjaku-tawara.

¹³ “Kaya aŋangu kutjupatjara nyinanyi uŋinypa panya manta pulitjarangka punkantja purunypa. Panya tjana tjukurpa kulira pulkara pukularipai, palu tjana mulamulangku kuruntu tjukurpa mantjintja wiya unytju kutju mulamularingkupai. Munu ngula palumpa tjanampa tjituru-tjituru wirkankunyangka tjana mapalku paturingkula Godaku watarkuripai.

¹⁴ “Kaya aŋangu kutjupa tjuṭa nyinanyi uŋinypa panya tjilkangka punkantja purunypa, panya tjana tjukurpa kulira mulamularingkupai, palu tjana mantatja kutjupa kutjupa tjuṭa pulkara kulira, wiru tjuṭa kanyintjikitja mukuringkupai munuya kutjupa kutjupa wiru tjuṭaku ngunti pukularipai. Munuya nyanga palula tjanalanguru Godaku tjukurku watarkuripai munuya wiru tjuṭa Godaku puṭu palyalpai.

¹⁵ “Kaya aŋangu kutjupatjara nyinanyi uŋinypa panya manta palyangka punkantja purunypa, panya tjana tjukurpa wangnarangku kulira pulkara mulamularingkupai. Munuya rawangku kulira wiru tjuṭa kutju Godaku palyalpai, tjanampa tjituru-tjituru wirkankunyangka kulintja wiyangku.”

*Lampa Tilīra Uti Tjunkunytja
(Markaku 4:21-25)*

¹⁶ Munu piruku tjanala wangkangi, “Anangungku wali unngu lampu tilira pitingka anga-tjunkupai wiya, munu piitangka unngu tjaru kuļu tjunkula kutitjunkupai wiya. Palu uti tjunkupai, katu, tili paluru irnyara utintjaku aŋangu tjuṭangku walingka tjarpara nyakunytjaku.

¹⁷ “Ka Godaku tjukurpa palu purunypa, panya ngayulu kuwari aŋangu tjutangka kitiki-iti wangkanyi ařa tjuṭa kutju wangkara, kaya puṭu nguwanpa kulini. Palu ngula tjukurpa nyanganpa uwankara utiringkuku aŋangu winkingku kulintjaku. Panya Godalu tjukurpa kumpilpa kanyintjatjanungku utilku, kaya winkingku kulilkku. ¹⁸ Ka nyura palulanguru purkarangku kulinma ngayulu wangkanyangka. Panya nyura wangaŋarangku kulinnyangkampa nyuranya Godalu pulka mulapa nintilku nyura uti kulintjaku. Palu nyura tjinguru kulira wantinyangkampa Godalu nyuranya kulintja kampa kutjupankuku palumpa watarkurintjaku.” Alatji Jesulu tjanala wangkangi.

*Jesuku Ngunytju Munu Małanypa Tjuṭa
(Matthew-ku 12:46-50; Markaku 3:31-35)*

¹⁹ Ka Jesuku ngunytju munu małanypa tjuṭaya palulakutu pitjangu, palu aŋangu tjuṭa mulapa anga-ngařanyangkaya puṭu palulakutu ilaringangi. ²⁰ Ka aŋangu kutjupangku Jesula wangkangu, “Nyaratja nyuntumpa ngunytju małanypa tjuṭa kuļu ursulta ngařanyi nyun-

tumpa paṭara munuya mukuringanyi nyuntunya nyakunytykitja.”

²¹ Ka Jesulu wangkangu alatji, “Wiya, panya Godaku tjukurpa wangañarangku kulira palyalpai tjuta, nyara paluru tjanaya ngayuku ngunytju małanypa kuļu nyinanyi walytja mulapa.”

*Jesulu Walpa Pulka Atanmankunytja
(Matthew-ku 8:23-27; Markaku 4:35-41)*

²² Tjiṇtu kutjupa Jesunya palumpa nintintja tjutatjara pautangka tatinu uru panya Galileela munu wangkangu tjanala, “Wanyula manta nyara kutjupakutu urungka muñkara ma-itipiri.” ²³ Munuya mulapaṭu ma-pitjangu pautangka panya munuya urungka ngururpa pit-jalinangi. Ka Jesunya pilu-piluringkula kunkunaringu. Ka palulanguru walpa pulka mulapa mapalku rurku winki pakaṇu uru palula ngururpatu pitjalinkunyangka. Ka uru pulkara urira pautangka tjarpangi munu pauta panya palunya nguwanpa tjarura tjarpatjunangi urungka unngu. Kaya uwankara pulkara nguluringu. ²⁴ Munuya Jesunya wankara wangkangu, “Mayatja, kuwarila ilunyi!” Ka Jesulu pakara walpa panya wangkara atanmanu munu uru kuļu wangkangu tiwilarinytjaku, ka walpa panya atanaringu munu uru kuļu urinytja wiyaringkula tiwilaringu. ²⁵ Munu palulanguru Jesulu wangkangu palumpa nintintja tjutangka, “Nyaanguru nyura puṭu mulamularinganyi?”

Palu tjana wangkanytjaku puṭu kulinu panya tjana nyakula uwankara urulyaraṛa nguluringu. Munuyanku wangkara kuliningi alatji, “Wati

nyaa nyangatja? Panya wal pangku urungku kulu palula wangañarangku kulipai.”

*Jesulu Wati Mamutjara Palyarunguntja
(Matthew-ku 8:28-34; Markaku 5:1-20)*

²⁶ Munuya palulanguru ma-wirkanu urungka itipi mantangka ngura ini Kañatjala itingka.

²⁷⁻²⁹ Ka Jesunya pautanguru ukalingkula ngarangi urungka itingka, ka wati mamutjara ngura nyara palunya ngurara palulakutu ngalyawirkanu. Wati nyanga paluru rawa mulapa nikiti para-ngañrapai munu wali wantira miriku kulpingka kutju nyinapai. Panya nganmanytju tjaultji tjutangku tjuta-arangku palunya tjina mara kulu tjiina pulkangka karpira kanyiningi, palu mamungku palunya tjarpara pulkara kunpulpai, ka paluru tjiina kañtantaña ilytjikutu wirtjapakalpai mamungku katinyangka.

Ka Jesulu wati palunya nyakula mamu panya painu palulanguru pakantjaku. Ka wati panya paluru pulkara mirara palula kuranyu tjinangka itingka punkanu munu wangkangu, “Jesu, God Katutja Pulkaku Katja! Ngayunya nyaantjikitjan mukuringanyi?” Munu paluru pulkara ngatjira wangkangu, “Wantimani iluntankunytja wiyangku!”

³⁰ Ka Jesulu wangkangu palula, “Palu nyuntu wanyu ini ngananya?”

Ka wangkangu, “Nganaña ini ‘Tjuñtanya.’” Panya mamu tjuta mulapa wati palula unngu nyinangi. ³¹ Munuya Jesula tjuta-arangku ngatjira wangkangi, “Wantimalanya piñi marukutu wituntja wiyangku. ³² Palu

witulalanya nyara pikipiki tjutakutu, nyara pu Lingkaya ngarala ukiri ngalkuñi, palula tjanalakutulanya witula.”

³³ Ka tjananya mulapañu witunu, kaya watinguru panya pakara tjukaruru wirtjapakara pikipiki tjutangka tjarpangu. Kaya pikipiki panya tjuta mamu tjuta tjarpanyangka puli wararangka tjañukutu wirtjapakara ukalingkula urungka uwankara tjarpara ilungu.

³⁴ Ka wati panya pikipiki tjuta kanyilpai tjutangku nyakula wirtjapakanu tawunukutu, munuya tjakultjunu anangu uwankarangka ngura ititja tjutangka kuñu.

³⁵ Kaya nyangatja kulira anangu tjuta anu nyakunytjikitja munuya wirkara nyangu wati panya palunya Jesula itingka nyinara tjukurpa kulinnyangka mantarangka tjarpara. Wati panya paluru kata palyaringkula nyinangi pilunpa, kaya nyakula pulkara nguluringu Jesuku.

³⁶ Munuya anangu kutjupa tjutangka para tjakultjunangi wati panyatja palyaringkunyangka nyakunytjatjanungku.

³⁷ Kaya ngura palunya ngurara tjutangku Jesunya pulkara tjapinu ngura tjanampa rawa nyinawiyangku wantikatinjtjaku panya pulkaraya palumpa nguluringu.

Ka Jesunya pautangka tatinu ankunytjikitja. ³⁸ Ka wati panya palyaringkunytjalu pulkara ngatjinu palula tjungu ankunytjikitjangku. ³⁹ Ka Jesulu wangkangu, “Wiya, ara małaku nyuntumpa walytja tjutaku ngurakutu munu anangu tjutangka tjakultjura Godalu nyuntunya palyantja.” Ka mulapañu anu munu

ngura nyara palula tjanala para-tjakultjunangi aŋangu uwankarangka Jesulu palunya palyantja.

Tjairatjaku Untalpa Munu Minymangku Mantara Pampuntja
(Matthew-ku 9:18-26; Markaku 5:21-43)

40 Kaya palulanguru Jesunya tjana uringka munkara malaku ma-itipiringu manta panya palulakutu. Ka wirkankunyangka aŋangu tjuta Jesuku pukularingu ala-alal paṭantjatjanu. **41-42** Ka wati ini Tjairatjanya wirkanu palula tjanala. Wati nyara paluru wali inmatjaku mayatja nyinangi ngura nyara palula, ka palumpa untalpa kungkawara tjukutjuku ngurangka waṭalpi ilunytjikitja ngaringi. Ka wati paluru pulkara tjituru-tjitururira Jesula tjinangka itingka tultjungarakatira ngatjiningi palumpa ngurakutu pitjanytjaku. Ka mulapatu Jesulu palunya waŋanu. Kaya aŋangu winkingku tjunguringkulwa waŋara palunya utjuningi. **43** Ka nyara palula arangka tjanala utu-utu pitjangi minyma kutjupa. Minyma nyara paluru rawa milkali tjutipai nyinangi yiya 12 munu paluru rawatu ngangkari tjutakutu anangi, munu mani pulka tjuta tjananya rawangku ungangi palunya palyarunguntjaku. Palu palyaringkunytja wiyatū rawa palurutu ngarangi.

44 Ka minyma paluru kulinu Jesunya munu tjutangka unnguwanu pitjangu palulakutu, munu tjanawanungku palumpa mantara waṛa tjinawanungku kanyintjanya ankala kumpiltu pampunu. Munu mapalku milkali

panya palumpa piltiringkula wiyaringu munu palyaringu.

⁴⁵ Ka Jesulu kulira tjanala tjapinu, “Nganaluni panyatja pampuṇu?”

Kaya uwankara ngurparingu. Ka Peterlu wangkangu, “Wiya Mayatja, aŋangu nyanga tjutangkuya utjura utjura ngaranyi.”

⁴⁶ Palu Jesulu wangkangu, “Wiya, kutjupangkuṇi pampuṇu, kaṇa kulinu ngayulanguru pakannyaangka witulya ngayuku.”

⁴⁷ Ka minymangku panya nyakula kulinu alatji, “Munta, kampangkaṭu-palkunatju pampuṇu kaṇi nintingku alatjitu para-tjapini.” Munu minyma paluru pułkara nguluringkula tjititingu munu tultjungararakatingu palula tjinangka winkingka miṛangka munu tjakultjunu paluru pamphuntja munu mapalku palyaringkunytja.

⁴⁸ Ka Jesulu wangkangu palula, “Minyma wiṛu, nyuntun mulapa ngayuku mulamularingu, munun palulanguru palyaringu. Pukulpa ma-pitja.”

⁴⁹ Ka Jesunya minymangka kuwaripatu ngarala wangkannyaangka wati kutju tjakulpa wirkanu Tjairatjaku nguranguru munu wangkangu Tjairatjala, “Wiya, alatjitet purkutjararingu. Wanti Mayatjanya unytjungku altiwiyangku.”

⁵⁰ Ka Jesulu kulinu watingku alatji wangkannyaangka munu Tjairatjala wangkangu, “Nguluringkuwiya ngayuku mulamulariwa, ka tjitji nyara paluru palyaringkuku.”

⁵¹⁻⁵³ Munuya Tjairatjaku walingka wirkanu ngura panya palula. Kaya aŋangu winki urilta nyinara pułkara ulangi tjitji panya palumpa. Ka

Jesulu wangkangu tjanala, “Ulanytja wiyaya nyinama. Tjitji nyangatja ilunytja wiya, kunkunpa ngarinyi.” Kaya kulira palumpa ikaringkula kurara pungangi alatji kulira, “Wiya tjitji palatja ilungu alatjiṭu.”

Ka Jesulu anangu tjuṭa markunu urilta nyinanytjaku munu Peternya, Johnnga, Jamesanya munu tjitjiku mama ngunytju kutju altira tjarpatjunu ruumangka wali unngu tjitji panya ngarintjtjangka.⁵⁴ Munu paluru tjitji panya mara wituṇu, munu wangkangu, “Tjitji awa, pakala!”

55-56 Ka tjitji panya małaku wankaringu munu mapalku pakaṇu. Ka tjitji palumpa mama ngunytju pulkara urulyaranu wankaringkunyangka nyakula. Ka Jesulu wangkangu tjitji palunya mai ungkunytjaku, munu pulanya wangkangu, “Nyangatja nyakunytjatjanungku kutjupa tjuṭangka tjakultjunkuwiyangku wintima. Palya?”

9

Jesulu Nintintja 12 Wangkara Iyantja (Matthew-ku 10:5-15; Markaku 6:7-13)

¹ Munu palula małangka Jesulu nintintja panya 12 altira tjungunu munu tjananya witulyanu mamu tjuṭa anangu tjuṭanguru paintjaku munu pikatjara tjuṭa kuļu palyarunguntjaku.² Munu tjananya wituṇu Godaku tjukurpa anangu tjuṭangka para-wangkanytjaku tjukurpa panya Godalu anangu tjuṭa walytjanmara mayatjangku

kanyintjatjara. Munu pikatjara tjuṭa kulu palyarunguntjaku tjananya witunu.

³ Munu tjanala wangkangu, “Kutjupa kutjupa tjuṭa katinytja wiyangkuya wantima, tjukara wiya, yakutja wiya, mai, mani munu mantara tjuṭa wiya. ⁴ Munuya tawunu kutjupangka wirkara aŋangungku altira walingka tjunkunyangka, walī pala palula alatjiṭu ngarima, munuya pala palulanguru para-ngarala waṛkarima, munu ngula panya ankunytjikitjangku kutju ngura palunya wantikatima. ⁵ Palu tawunu kutjupangka wirkara aŋangungku altira ngurangka tjunkuwiyangku wantinyangka, nyura uti ngura palunya wantikatima, mununku ulpuru puutanguru patapatala piruku tjananya nyakunytja wiyakitjangku. Kaya nyakula kulilkul Godanya tjanampa mirpaŋarinyangka.” Alatji Jesulu tjananya wangkara witunu.

⁶ Kaya nintintja panya tjuṭa ma-pakanu. Munuya ngura tjukutjuku tjuṭangka parapitjalira Tjukurpa Palya wangkangi munu pikatjara tjuṭa palyarunguningi.

Iratalu Puṭu Kulintja

(Matthew-ku 14:1-12; Markaku 6:14-29)

⁷ Ka mayatja Iratalu panya Galileeku mayatjangku Jesulu palyantja uwankara kulinu munu puṭu kulinigi, “Wati ngananya nyangatja?” Panya aŋangu kutjupa tjuṭangkuya wangkangi Johnnga ilunytjatjanu wankaringkunytja. ⁸ Kaya kutjupa tjarangku wangkangi Ilaitjanya malaku pitjanytja, kaya

tjara kutjupangku wangkangi wangkatjara irititja kutjupa małaku wankaringkula pakantja.

⁹ Ka Iratalu wangkangu, “Johnnga panyana ngañmanytu kata kañantjaku wangkangu. Palu watu nganalu nyangangku palyarinanyi?” Munu paluru Jesunya nyakunytjikitja mukuringangi.

Jesulu Paltjantja Wati 5,000

(Matthew-ku 14:13-21; Markaku 6:30-44;
Johnku 6:1-14)

¹⁰ Kaya iyantja panya tjuṭa ankunytjatjanu ngula małaku pitjangu munuya Jesula tjakultjunu uwankara tjana palyantjatjanungku. Ka tjananya Jesulu altira katingu ngura ini Pitjaitalakutu paluru tjana aŋangu tjuṭa wantikatira maunṭalpa nyinanytjikitjangku.

¹¹ Kaya aŋangu tjuṭangku kulinu tjana ankunytja munuya maławanungku waŋara ngururpatu tjanala tjunguringu. Ka Jesulu tjananya pitjanyangka nyakula pukultu altingu munu tjanala tjakultjunangi tjukurpa panya Godalu aŋangu tjuṭa walytjanmara mayatjangku kanyintja. Munu paluru pikatjara tjuṭa kuļu palyarunguningi.

¹² Ka mungartjirira tjintu nguwanpa matjarpanyangka nintintja tjuṭangku palula wangkangu, “Nyangatjala ilytjingka nyinanyi mai wiyangka. Wanyu aŋangu nyanga tjuṭa witula, kaya ara ngura nyanga ilatja tjuṭakutu munuya mai mantjiṛa ngalkula paltjaringkula ma-ngari ngura unytjunta.”

¹³ Palu Jesulu wangkangu tjanala, “Wiya, nyura alatjiṭuya tjananya uwa mai ngalkuntjaku wituntja wiyangku.”

Kaya wangkangu, “Wiya, nyangatjala mai tjukutjuku kutjara maŋkurpa kanyini munu kuka antipina kutjara kuļu. Kan mukuringanyi nganana ankula pulka payamilantjaku aŋangu nyanga winkiku?” ¹⁴ (Panya ngura nyara palula kunyu wati 5,000 nyinangi winki mulapa, ka tjinguru minyma tjitji winkitu nyinangi pala palula.)

Ka Jesulu wangkangu nintintja tjutangka, “Uwa palya, aŋangu pala tjuṭa wanyu tjarara nyinatjura waŋala 50 kutjupa, 50 kutjupa.”

¹⁵ Kaya nintintja tjutangku mulapatu nyinatjura waŋaŋu paluru wangkanyangka. ¹⁶ Ka

palulanguru Jesulu mai panya kutjara maŋkurpa antipina kutjara kuļu mantjelu munu ilkari ira-nyakula Godanya walikura wangkangu, “Wirungkulanyan mai kuka nyangatja ungu.” Munu paluru kaṭantara nintintja tjuṭa ungangi. Kaya nintintja tjutangku aŋangu tjuṭa paraungangi. Ka mai panya tjuṭa mulararira waintarira ngaringi.

¹⁷ Kaya uwankarangku ngalkula paltjaringkula wantingu waintarira ngarinyangka. Ka ngalkula wiyaringkunyangka nintintja tjutangku tjana paltjaringkula wantintytja tjuṭa mantjira piti pulka 12-ngka tjaalyngařatjunu.

*Peterlu Tjukarurungku Wangkanytja Jesunya
(Matthew-ku 16:13-19; Markaku 8:27-29)*

18 Ka kutjupa-ara Jesulu kutjungku ankula maunṭalpangku nyinara Godala tjapiningi. Kaya palumpa nintintja tjutangku wañara wirkanu. Ka Jesulu tjanala tjapinu, “Nyura ninti? Ngananyaŋiya wangkanyi aŋangu tjutangku?”

19 Kaya wangkangu, “Wiya tjarangkuntaya wangkapai ‘John Baptistanya.’ Kaya tjara kutjupangku wangkapai ‘Ilaitjanya.’ Kaya kutjupa tjutangku wangkapai nyuntu Godaku wangkatjara kutjupa irititja małaku wankaringkunytja.”

20 Ka Jesulu wangkangu tjanala, “Kaṇi nyura ngananya wangkanyi?”

Ka Peterlu wangkangu, “Nyuntun Christanya, panya Godalu kalkuṛa iyantjanya nganaŋanya wankarunkunytjaku.”

21 Ka Jesulu tjananya wangkara markuningi, “Tjukurpa nyanga palunyaya kutjupa tjutangka tjakultjunkuwiyangku wantima.”

*Jesulu Ngula Ilunytjikitjangku Wangkanytja
(Matthew-ku 16:20-28; Markaku 8:30—9:1)*

22 Munu palulanguru alatji wangkangu, “Ngula wati kura tjutangku ngayunya Watiku Katjanya pulkara pikantankuku. Panya tjukurtjara kuranyitja tjuta, Moseku tjukurpa nin-tilpai tjuta, munu wati tjilpi kutjupa tjuta kulu ngayuku pulkara kuraringkuku, munuŋiya ma-ungkuku ngayunya pungkula iluntankunytjaku. Palu ngayulu ilunytjatjanu tjintu kutjara ngarala wiyaringkunyangka piṛuku wankaringkula pakalku.” Tjukurpa nyanga palunyaya paluru nintintja tjutangka kutju wangkara tjakultjunangi.

23 Munu palulanguru aŋangu tjutangka tjukurpa kutjupa wangkangi alatji, “Kutjupangku ngayunya waŋantjikitja mukuringkulampa uti paluru walytjangku kulira palyantja wiyangku wantima, munu tjintu kutjupa tjintu kutjupa ngayunya kutju kulira waŋanma. Tjinguruya nyuranya iluntanama ngayunya waŋannyangka, palu palya, nyura uti ilunytja kulira nguluringkuwiyangku ngayunya tungun-tunguntu waŋanma titutjarangku.

24 Aŋangu kutjupangku tjinguru alatji kulilku, ‘Wanyu kaŋatju ngayulu walytjangku atunyamanama mantangka nyanga rawa wanka nyinanytjikitjangku.’ Palu alatji kulira paluru ngayunya wantinyi, ka Godalu palunya ngula ilunyangka puṭu wankani palula tjunguringkula titutjara nyinanytjaku. Ka aŋangu kutjupangku tjinguru alatji kulilku, ‘Wanyu kaŋa nguluringkuwiyangku Jesuna titutjarangku waŋanma, kaŋi palya kutjupangku ngayunya iluntankuku palunya waŋannyangka.’ Ka alatji kulinnyangka Godalu ngula ilunyangka palunya wankara pakaltjingalku palula tjungu titutjara wanka nyinanytjaku.

25 Palu aŋangungku mantatja tjutaku mukuringkula winki mulapa mantjira kanyirampa ngula paluru ilura nyaaringkuku? Wiya, paluru ilura kawankatiku, panya paluru mantatja wiru tjutaku mukuringkula Godanya wantingi, ka mantatja tjutangku palunya puṭu wankarunanyi Godala tjunguringkula titutjara nyinanytjaku.

26 “Ka tjinguru aŋangu kutjupa ngayuku

tjukurpa kulira ngayuku mulamularingkulampa kunṭaringkuku aŋangu tjutangka mirangka, munu ngayunya wantiku ngayuku tjukurpa kuļu, ka palu purunypaṭu ngayulu ngula Watiku Katjangku pitjala palunya ngapartji wantiku ngayuku kunṭaringkunytjanguru. Panya nyara palula ara ngayulu Mamalanguru pitjaku pitalytji witulya pułka, angelpa wiru tjutangka tjungu, mununa ngayulu ngapartji ngayuku kunṭaringkupai tjuta wantiku.²⁷ Kanä tjukarurungku nyurala wangkanyi, panya nyura nyanga kutjupa kutjupa tjuta kuwari ngaranyi, munu nyura kutjupa tjarangku ngula iluntja kuwaripangka wankangku nyakuku, Godalu mayatja pułkangku aŋangu tjuta mulapa palumpa walytjaringkunytjaku palyannyangka.” Alatji Jesulu wangkara nintiningi palumpa nintintja tjutangka kulira mulamularingkunytjaku.

*Jesunya Apu Katu Irnyantja
(Matthew-ku 17:1-8; Markaku 9:2-8)*

²⁸ Nyara palula malangka tjintu 8 ngarala wiyaringkunyangka Jesulu nintintja maŋkurpa altingu Peternya, Johnnga munu Jamesanya kuļu, munu paluru tjananya puļi murpukutu katingu puļi katu Godala tjapintjikitja.²⁹ Munu nyara palula Godala tjapira paluru yunpa kutjuparira irnyaningi, ka mantara kulu piranaringu munu wanangara puřunypa irnya-irnyara rawa ngarangi.³⁰ Ka paluru ngarala tjapinnyangka wati Mosenya pula Ilaitjanya utiringkula palula tjungu ngarala wangkangi.

31 Panya pula pitalytji pulkatjara utiringu munu pula Jesula wangkangi ngañmanytu panya ngula nyaaringkuku Jerusalemala paluru ngura ilkaritjakutu małaku ankunytyaku.

32 Kaya Peternya tjana ngañmanypa pilupiluringkula kunkunaringu munuya wankaringkula nyangu Jesunya pitalytji pulkatjara ngaranyangka munuya wati panya kutjupa kutjara kulu nyangu.

33 Ka palulanguru wati panya kutjarangku Jesunya wantikatira ankunytyikitjangku kulinigi, ka Peterlu wangkangu, “Mayatja, nyanga kuwarila wirura nyangangka ngaranyi. Wanyula wiltja mañkurpa palyala kutju nyuntumpa, kutju Moseku, munu kutju Ilaitjaku!” Alatji paluru ngurpangku wangkangi ngunti kuliqa pula mantangka tjukutjuku nyinanytjikitja pitjanyangkapalku.

34 Ka ngarala wangkanyangka ngangkali pitjangu munu Jesunya Mosenya Ilaitjanya tjananya tjutunu munu wati panya nintintja mañkurpa kulu tjutunu, kaya pulkara nguluringu. **35** Ka wangka kutju utiringu ngangkali unngunguru munu tjanala wangkangu, “Nyngatja ngayuku katja, panya ngayulu palunya iyantjikitjangku ngurkantanu. Nyanga palulaya kulinma!”

36 Ka wangkara wiyaringkunyangka ngangkali panya katuringu, kaya nintintja panya mañkurtu nyangu Jesunya kutju malaringkula ngaranyangka. Uwa, tjana wiru mulapa nyangangi nintintja panya mañkurtu, palu tjana nyakunytyatjanungku kutjupa tjutangka

wangkawiyangku wantingi unngu kutju kulira.
Munuya ngula kutju tjakultjunu.

*Jesulu Palyarunguntja Tjitji Mamutjara
(Matthew-ku 17:14-18; Markaku 9:14-27)*

³⁷ Munuya mungawinki Jesunya tjana nintintja panya maŋkurpa kuļu puļinguřu ukalingu, kaya aŋangu tjuṭa mulatu paluru pitjanyangka nyakula palulakutu ngaparikatingu. ³⁸ Ka wati kutjupa aŋangu tjuṭangka ngurur-ngururpa mirangu munu Jesula pułkara ngatjira wangkangu, “Nintilpai! Wanyutju nyawa katja nyanga! Panya nyanga paluru ngayuku katja kutju. ³⁹ Katju mamungku nyangatja miratjingalpai rawangku munu uritjingara aŋta-waŋipai mantangka, ka wiṭaly-wiṭalyaripai. Munu rawangku alatjingga ūnytju kutju pakara ankula mapalku pitjala piřuku tjarpapai. Ka urira urira pakuringkula nguwanpa ilupai. ⁴⁰ Kaña nyuntumpa nintintja tjuṭangka ngañmanytju ngatjinu mamu nyanga palunya paintjaku, kaya puṭu painingi.”

⁴¹ Ka Jesulu kulira tjituřu-tjituřuringu munu tjanala wangkangu, “Nyura mulapa uwankara puṭu mulamularinganyi munu tiṭutjarangku ngunti kulini. Kaña yaaltjiu arangku nyuranya nyinara nintliku nyura kulira mulamularingkunytjaku? Pakuringanyina nyuranya rawangku nintira nintira.” Munu palulanguru watingka panya wangkangu, “Katjanku ngalya-kati ngayulakutu!”

⁴² Ka tjitji panya ngalya-katinyangka mamungku piřuku uritjingaňu. Ka mantangka punkara ngarira tjinanpungangi. Ka Jesulu

mamu panya painu munu tjitji panya palyarungunu munu palumpa mama ungu.
⁴³ Kaya aŋangu tjuta pułkara urulyaranu Godalu Jesulawanungku witulya pułkangku palyannyangka nyakula.

*Jesulu Piruku Wangkanytja Ilunytjikitjangku
 (Matthew-ku 17:22-23; Markaku 9:30-32)*

Ka aŋangu tjuta ngarala urulyarannyangka Jesulu palumpa nintintja tjutangka wangkangu alatji, ⁴⁴ “Kuwariya watarkuriwyangku kulinma ngayulu nyanga wangkanytja. Panya wati kutjupangku ngayunya Watiku Katjanya nintilku wati mirpañtju tjutangka, kaňiya witira katira iluntankuku.” ⁴⁵ Palu nintintja tjutangkuya puťu kuliningi paluru alatji wangkanyangka, panya Godalu tjananya puťu kulintjaku palyanu. Kaya puťu nguwanpa tjukarurungku kuliningi munuya nguluringangi palula tjapintjaku.

*Ngananya Pułka Nyinaku?
 (Matthew-ku 18:1-5; Markaku 9:33-37)*

⁴⁶ Palulanguru nintintja panya tjutangkuyanku anga-angangku ngaparku wangkangi alatji, “Ngananya wanyu pulka nguwanpa nyinanyi?” ⁴⁷ Ka tjana wangkanyangka Jesulu kulintja wiya, palu paluru nintingku ngurkantanu tjana kulintjitra munu tjitji tjukutjuku altira palula itingka ngaratjunu. ⁴⁸ Munu wangkangu tjanala, “Tjinguru nyura ngayuku nintingku tjitji tjukutjuku nyanga purunypa mantjira pukultu walytjanmankulampa nyura ngayunya kuľu walytjanmananyi, munu ngayunya iyantjanya

kulu walytjanmananyi. Panya nyura walytjangku kulira tjukutjukuringkulampa kutju Godala mirangka pulka mulapa nyinaku.” Alatji Jesulu tjanala wangkangi.

*Wati Kutjupangku Mamu Tjuta Paintja
(Markaku 9:38-40)*

⁴⁹ Ka Johntu Jesula wangkangu, “Mayatja, nganana nyangu wati kutjupangku añangu tjutanguru mamu tjuta painnyangka nyuntu witunnyangka-palku, panya paluru painingi nyuntunya ini wangkara. Kala palunya painu, panya paluru nganañala tjungutja wiya.”

⁵⁰ Ka Jesulu wangkangu tjanala, “Wantimaya paintja wiyangku! Panya añangu kutjupa nganampa kuraringkunytja wiya nyinarampa nyara paluru nganampa walytjatu nyinanyi.”

Tjamiriyanya Ngurara Mankurtu Jesunya Wantintjya

⁵¹ Ka tjintu panya paluru ilaringangi Godalu Jesunya ilkarikutu mantjintjaku, ka paluru ngulu wiyangku kulinu Jerusalemalakutu ankunytjikitjangku. ⁵² Munu wati mañkurpa kuranyungku iyanu ankula ngura ngurintjaku manta Tjamiriyalakutu. Kaya Tjamiriyalawanu ankula ngura tjukutjukungka wirkanu ngura tjanampa palyantjikitja. ⁵³ Palu añangu nyara palunya ngurara tjutangku Jesunya tjananya wantingi tjanampa ngurangka tjunkunytja wiyangku, panya paluru tjana wati Jew tjuta

Jerusalemalakutu anangi. Nyara palulanguruuya palunya tjananya wantingi Jew tjuta nyakula.*

⁵⁴ Ka palumpa panya nintintja kutjarangku Jamesalu pula Johntu nyakula wangkangu Jesula, “Mayatja, nyuntu mukuringkulampa uti nganaña Godala tjapinma paluru waru ilkaringuру iyantjaku, ka aŋangu nyanganpa uwankara kampara wiyala.”

⁵⁵ Palu Jesulu małakukutuра palunya pulanya painu.* ⁵⁶ Munuya ngura palunya wantikatira ma-pakanу ngura kutjupakutu ngapartji.

*Jesunya Wanantjikitjangku Wangkanytja
(Matthew-ku 8:19-22)*

⁵⁷ Munuya iwarangka anangi, ka wati kutjupangku palula wangkangu, “Ngayuluna nyuntula tjungu para-pitjalinkunytjikitja mukuringanyi nyuntu ngura tjutakutu ankunyangka.”

⁵⁸ Ka Jesulu palula wangkangu, “Panya tuuka tjutaku nyarkalpa tjuta ngarinytjaku ngaranyi. Ka tjulpu tjutaku maŋngu tjuta ngaranyi tjana ngarinytjaku, palu Watiku Katjaku ngura

* ^{9:53} Tjakaya aŋangu Tjamiriyanya ngurara tjuta Jew tjutaku pulkařa kuraringkupai. * ^{9:55} Nyiri irititja kutjupa tjarangka tjukurpa nyangatja kuļu ngarinyi alatji munu wangkangu palula, “Wiya kulila, nyura kurunpa palyatjara Godaku kuruntjara. Panya ngayulu Watiku Katjanya anangu tjuta wiyanjtjikitja pitjanytja wiya. Ngayulu anangu tjuta wankarunkunytjikitja pitjangu.” Palu nyangatja kunyu wati kutjupangku mała walkatjunu munu Luke-aku tjukurta tjungunu.

ngaranytja wiya ngarikatira pakuwiyaringkunytjaku. Panya ngayulu ngura wiyatjara rawa para-pitjalinkupai.”

⁵⁹ Munu paluru wati kutjupangka wangkangu, “Ngayula tjunguriwa munuṇi waŋanma!”

Ka wati panya paluru Jesula wangkangu, “Munta Mayatja! Wanyuṇi unytjungku wantir’iyala, panya ngayuku mama tjilpi mulapa, kana ngula tjitularira pitjala nyuntula tjunguringkula nyuntunya waŋalku.”

⁶⁰ Ka Jesulu palula wangkangu, “Wiya, ngayunya-warara kulinma, kaya ngurpa tjuṭangku nyuntumpa mama wiyaringkunyangka tjuŋutjunkuku. Palu nyuntu ankula ngura tjutangka para-tjakultjunama tjukurpa panya Godalu aŋangu tjuṭa walytjanmara mayatjangku kanyintjatjara.”

⁶¹ Ka kutjupangku ngapartji palula wangkangu, “Mayatja, ngayulu nyuntula tjungu ankunytjikitja mukuringanyi. Palu wanyuṇi wantir’iyala-warara, kaṇa ankula ngayuku walytja tjuṭa-wararangku tjakurira pitjala nyuntula tjunguringkuku.”

⁶² Ka Jesulu wangkangu, “Wiya, aŋangungku Godaku warka palyantjikitja mukuringkula uti titutjarangku palyanma malakukutura kulintja wiyangku. Panya paluru piruku malakukutura kulirampa warka Godalu wituntjitetja putu tjukarurungku palyani.”

10

Nintintja 72 Iyantja

¹ Ka nyanga palula malangka Mayatja Jesulu ngurkantanu wati 72 kutjupa, munu tjananya kutjara kutjara iyanu ngura uwankarakutu palula kuranyu ankunytjaku panya paluru ngañmanytju kulinu ngula ankunytjikitjangku. ² Munu paluru tjananya alatji wangkara iyanu, “Panya añañgu mungiliyi mulapa nyangatja watarku nyinara-wañinyi Godaku walytjaringkunytjikitja patara, palu añañgu Godaku war̄karipai mañkurpa kutju ngaranyi palula tjanala ankula tjukurpa tjakultjunkunytjaku tjana kuļu kulira Godaku walytjaringkunytjaku. Kaya Godala tjapila palumpa war̄karipai kutjupa tjuta ngurkantara iyantjaku nyuranya alpamilara añañgu ngura winkitjangka Tjukurpa Palya wangkanytjaku. Kaya kulira Godaku mulamularingkula palumpa walytjaringkuku.

³ “Ala, araya palya. Palu wanyuya kulila panya ngayulu nyuranya iyanı tjiipi tjuṭa purunypa inuṛa tjuṭangka ngurur-ngururpa. ⁴ Wantimaya yakutja katiwiyangku munu mani munu tjinatja kuļu, munuya añañgu kutjupa tjuṭa iwarangka nyakulampa tjanala ngarala wangkanytja wiyangku wantima.

⁵ “Munuya tawunu kutjupangka wirkara walingka tjarpanytjikitjangku añañgu wali pala palula nyinapai tjuṭangka alatji wangkama, ‘Uwa, Godalu nyuranya kurunpa rapa kanyinma.’ ⁶ Ka tjinguru waliku mayatja wati mirpañtju nyinanyangkampa Godalu palunya munu palumpa walytja tjuṭa kuļu kurunpa rapara kanyintja wiyangku wantiku,

kaya palurutu alatjitu nyinaku pukulpa wiya. Palu tjinguru waliku mayatja wati pukultju nyinanyangkampa Godalu palunya kurunpa rapara kanyilku palumpa walytja tjuta kulu.

⁷ Ka nyura wali nyara palula tjarpara palula tjanala tjungu nyinama munuya mai kuka kulu ngalkula tjinima paluru tjana nyuranya ungkunyangka. Panya anangu kutjupa nyurampa warkarinyangka nyura palunya ungkupai, kaya palu purunypa nyura anangu tjulangka ngayuku warka palyannyangka paluru tjana uti ngapartji nyuranya pukularira ungama. Palya! Kaya tawunu pala palula nyinara, wali kutju pala palula ngura tjunkula nyinama wali kutjupa tjutakutu ankunytja wiya.

⁸ “Ka nyura tawunu kutjupangka wirkankunyangka tjinguru anangu nguratja tjulangku pukularira mantjilku, ka tjana nyuranya mai kuka kulu ungkunyangkampa pukularira ngalkunma wantinytja wiyangku.

⁹ Munuya ngura pala palula pikatjara tjuta nyakula palyarungunma munuya tjanala tjakultjunama alatji, ‘Panya watalpi ilaringanyi Godalu anangu tjuta mayatjangku walytjanmara kanyintjaku.’ ¹⁰ Palu tjinguru nyura tawunu kutjupangka ma-wirkara ka anangu nguratjangku nyuranya papulankunyangkampa nyura iwarakutu ara tawunungka ngururpa munu tjanala alatji wangka, ¹¹ ‘Nyura nganananya wantinyangkala ulpuru nyanga tjnatja nyurampa nguranguru patapananı

nyuranya ngulutjunkunytjikitjangku.* Palu kulinmaya panya waṭalpi ilaringanyi Godalu anangu tjuta mayatjangku walytjanmarā kanyintjaku. Palu nyura wantinyi palunya.' Alatji tjanala wangka nyurala kulilwiyangku wantinyangka.

12 "Panya ngula Tjintu Małatjangka Godalu anangu Tjatamanya nguraṛa tjuta paira iyalku ngura kurakutu pika pulkatjara nyinanytjaku. Munu paluru anangu panya nyuranya wantintyja tjuta kuļu tjanala tjungu paira iyalku, palu ngura nyara palula tjana nyuranya wantintyatjanungku pika pulka mulapa mantjilku Tjatamanya nguraṛa tjutangka waintara.* Nyangatjana mulamulangku nyurala wangkanyi."

Jesulu Ngulutjunkunytja Anangu Kulira Wantipai Tjuta

(Matthew-ku 11:20-24)

13 Ka anangu Kuratjinta nyinanytja tjutangku munu Pitjaitala nyinanytja tjutangku kuļu Jesunya wantingi palumpa mulamularingkunytja wiyangku. Ka Jesulu tjananya wantinyangka pulkarā painingi alatji wangkara, "Nyurampa pika pulka mulapa

* **10:11** Nyanga alatjiya kunyu ulpuru tjinatja patapatapai nyaa nintintjikitjangku, panya nintintja tjutangku putu wangkanytjatjanungku tjananya wantintyja, kaya kunyu nyakula nguluringkupai. * **10:12** Tjatamanya panya tawunu pulka iriti ngarangi Israelta itingka, ka panya anangu nyara palula nyinapai tjutangku kura pulka mulapa rawangku palyannyangka Godalu tjananya uwankara pungkula wiyanu. Nyawa Genesis 18:20.

ngaraku ngura Kuratjinta nyinanytja tjutaku munu Pitjaitala nyinanytja tjutaku kulu, panya ngayulu nyurampa ngurangka pikatjara tjuta palyarunguningi munu miracle kutjupa kutjupa tjuta kulu witulya pulkangku palyaningu, ka nyura nyakunytjatjanungku kura tjuta wantintyta wiya alatjitu munu panya nyura Godalakutu aruringkunytja wiyangku wantingi. Tjinguru ngayulu ngura panya Tayala pulala Tjaitanta palu purunypa ngañmanyajulpi palyannyangka, añañgu ngura nyara palula pulala nyinapai tjuta tjinguru mapalku kuranguru piiwiyingama, munuya mantara walyku-walykungka tjarpara tjunpangka yunpa niñinma, tjananku piiwiyingkula kura wantintyta nintintjikitjangku.* ¹⁴ Kulilaya! Ngula tjintu malatjangka Godalu añañgu uwankara manta winitja ngurkantara tjaralku, munu paluru añañgu panya ngura Tayanya pulanya Tjaitannga ngura ra tjuta paira iyalku ngura kurakutu pika pulka mantjintjaku. Munu paluru nyuranya kulu tjanala tjungu paira iyalku, palu ngura nyara palula nyura pika kutjupa pulka mulapalta mantjilku añañgu nyara palula tjanala munkara.”

¹⁵ Ka Kapunimanya ngura ra tjutangku kuulu palunya wantingi, ka Jesulu tjananya palu purunypatu wangkangi alatji, “Ka nyura Kapunimala nyinapai tjutangku yaaltji kulini? Godalu

* **10:13** Panya ngura Tayala pulala Tjaitanta añañgu Jew wiya tjuta nyinangi munuya kura tjuta rawangku palyaningu, kaya Israeltanguru Godaku wangkatjara tjutangku ngura palunya pulanya kuranmankupai.

wanyu nyuranya ilkarikutu katira pulkanmara tjunkuku? Wiya, paluru alatjitu nyuranya tjaru mulapa wañiku ngati pulkakutu.”

¹⁶ Munu Jesulu palumpa nintintja tjutangka wangkangu, “Kutjupangku nyurala kulirampa ngayula kuļu kulini, ka kutjupangku nyuranya wantirampa ngayunya kuļu wantinyi munu paluru ngayunya wantira ngayunya panya iantjanya kuļu wantinyi.” Alatji Jesulu tjanala wangkangu munu tjananya witura iyanu. Kaya anu ngura uwankarakutu.

Nintintja Panya 72 Małaku Pitjanytja

¹⁷ Ka ngula wati panya 72 paluru ngurkantara iyantja tjuta małaku pitjangu pukulpa alatjitu munuya tjakultjunu palula alatji wangkara, “Mayatja! Mamu tjutangkulanya nganañanya wangañarangku kulilpai nganaña nyuntunya ini wangkara tjananya painnyangka.”

¹⁸ Ka Jesulu tjanala wangkangu, “Ngayulu nyangu Satannga ilkariringuru punkannyangka, panya paluru anangu tjuta mayatjangku kanyintjatjanungku kuwari tjananya kanyintja wi-yaringu. ¹⁹ Panya ngayulu nyuranya pulkara witulyanu, ka kutjupangku nyuranya puťu alatjitu kuralku. Panya nyura liru tjuta munu pitikatali tjuta kuļu kantura puuntankunyangkaya nyuranya patjara pikatjartja wiya. Ka mamu Satantu nyuranya arkara witulyangku kurannyangka nyura kunpu pulka ngaraku, ka paluru nyuranya puťu alatjitu kuralku ngayulu nyuranya witulyankunyangka. ²⁰ Palu nyura uti mamu tjutangku nyurala

wangañarangku kulinnyangka pukularinyta wiyangku wantima, palu uti nyura pukularima panya ngura ilkarīngka nyurampa ini tjuta nyiringka walkatjunkunytja ngaranyangka.”

*Jesulu Pukularira Mamala Wangkanytja
(Matthew-ku 11:25-27; 13:16-17)*

21 Munu palulanguru Jesulu Kurunpa Milmilngatjarangku pulkara pukularira palumpa mamangka wangkangu alatji, “Uwa Mama, nyuntun Mayatja pulka mulapa nyinanyi ilkariku mantaku aŋangu uwankaraku munu ilkaritja uwankaraku kuļu. Kaña nyuntunya kuwari mirawanira walkuni, panya nyuntun tjukurpa nyanga wiřu utinu aŋangu ngurpa tjutangka munun nintipuka tjutangka utintja wiyangku kutitjuřa wantingu. Uwa Mama, mulapa panyan nyanga palunya alatji palyaňu nyuntu mukuringkula.”

22 Munu palulanguru Jesulu aŋangu tjutangka wangkangu alatji, “Panya Mamaluňi uwankara alatjiťu wangkara utinu. Ngayuluňa palumpa katja ka paluru kutju ngayuku ninti nyinanyi, ka palu purunyapa ngayulu kutju palumpa ninti mulapa nyinanyi. Palu ngayulu aŋangu kutjupa tjuta ngurkantara nintilku, kaya paluru tjana kuļu Mamaku nintiringkula nyinaku ngayulu nintinnyangka kutju.”

23 Munu palulanguru Jesulu małakukutura palumpa nintintja tjutangka kutju wangkangu alatji, “Nyura panya ngayunya kuřu walytjangku nyanganyi. Pala palulanguru nyura pulkara pukularinyi. **24** Panya wangkatjara tjuta

munu mayatja pulka tjuṭa kułuya pulkara mukuringangi nyura nyanga nyakunytjanya nyakunytjikitja, palu nyakunytja wiyatuya ngañmanypa wiyaringu. Munuya nyura purunytpu kulintjikitja mukuringangi palu kulintja wiyatuya ngañmanypa wiyaringu.”

Wati Palya Tjamiriyanya Ngurara

²⁵ Ka wati kutjungku Moseku tjukurpa nintil-paingku pakara Jesunya ngunti arkara tjapiningi alatji wangkara, “Nintlpai, nyaalkunu wanka titutjara nyinanytjikitjangku?”

²⁶ Ka Jesulu ngapartji palula wangkangu, “Nyaa nyiringka walkatjunkunytja ngaranyi? Nyara palunyan nyakula wangkara yaaltji-yaaltji kulilpai?”

²⁷ Ka wati panya paluru wangkangu, “Alatji ngaranyi,

‘Mayatja Godaku pulkara mukuringama kurunpa winki, munu palunya kutju pukulmankunytjikitjangku kulira titutjarangku wiru palyanma.’ *

Ka kutjupa kułu ngaranyi alatji,

‘Anangu kutjupa tjutaku pulkara mukuringama nyuntunku mukuringkunytja purunypa.’ ” *

²⁸ Ka Jesulu palula wangkangu, “Tjukarurungkun wangkanyi. Alatjinama munun wanka titutjara nyinaku.”

²⁹ Ka wati paluru Jesulu palunya palyan-mankunytjaku mukuringkula piruku tjapinu

* **10:27** Deuteronomy 6:5 * **10:27** Leviticus 19:18

palula, “Palu aŋangu nganaku tjanampaña wanyu mukulya pulka nyinama?”

³⁰ Ka Jesulu ngapartji palula tjukurpa wangkangu ara utintjikitjangku nyanga alatji, “Wati kutju iwarangka anangi Jerusalemalanguru Jericholakutu. Kaya wati tjulyalpai tjutangku palunya ngururpa nyangu munuya mantara araltjaṛa palunya pungkula nguwanpa iluntanu munuya iwarangka itingka uti wantikatingu ilunytjaku, ka paluru ngaringi.

³¹ Ka palula malangka wati tjukurtjara iwara panya palula pitjangi munu wati panya pikatjara ngarinyangka nyakula wantikatira katifikatjara anu kampa kutjupawanu. ³² Ka palula malangka wati kutjupa timpulangka war̄karipai pitjangu wati Levikunu, munu palu purunypaṭu nyakukatira anu kampa kutjupawanu.

³³ “Ka wati Tjamiriyanya ngurara iwara panya palulaṭu pitjangi tangkiyitjara,* munu nyangu wati panya pikatjara ngarinyangka munu palumpa pulkaṛa ngalturingu. ³⁴ Munu palulakutu ankula palunya mantjiṛa pika tjuṭa uwilangka nyititu wainangka kuļu munu paṇṭitjingka karpinu. Munu palulanguru wati panya pikatjara palunya tangkiyingka utitjunkula katingu walı ruuma tjutatjarakutu munu palunya ruuma kutjungka piitangka ngaritjunkula wirura kanyiningi.

³⁵ “Munu tjintungka wati panya Tjamiriyanya ngurarangku mani ungu wati panya

* **10:33** Jew tjuṭa tjaka aŋangu Tjamiriyanya ngurara tjutaku kuraringkupai.

waliku mayatja. Munu palula wangkangu, ‘Nyangatjañanta unganyi nyuntu wati nyangatja wirūra kanyintjaku. Ka tjingga mani nyanga palunya wiyaringkunyangkampa rawangkuṭu kanyinma wantintja wiyangku, panya ngayuluñanta ngula malaku pitjala nyuntunya piruku mani kutjupa ungkuku nyuntu rawangku kanyinnyangka.’”

³⁶ Munu Jesulu ara nyanga palunya wangkara wiyaringkula wati panya Moseku tjukurpa nintilpaingka tjapira wangkangu, “Yaaltjin kulini wati nyanga mankurnguru? Nyuntu ngurkantara, ngananya wanyu wati panya pikatjaraku pulkarä mukuringu?”

³⁷ Ka paluru ngapartji palula wangkangu, “Panya paluru, panya pikatjara ngarinyangka nyakula ngalturingu munu alpamilañu.”

Ka Jesulu wangkangu palula, “Ka nyuntu kuļu wati panya paluru palyantja purunypa ankula palyanma, munu aŋangu kutjupa tjuta ngalturingkula alpamilanma.”

Jesunya Mary-la Marthalala Pulala Nyinanytja

³⁸ Ka ngula Jesunya munu palumpa nintintja tjuta kulu iwarangka ankula ngururpa wirkanu ngura tjukutjukungka. Ka minyma kutjupangku ini Marthalu Jesunya nyakula altingu pitjala palumpa walingka unytju nyinara mai ngalkula pakuwiyaringkunytjaku. ³⁹ Ka Jesunya walingka tjarpara nyinakatinyaŋka Marthaku malanypa minyma ini Mary-nya palula itingka nyinakatingu munu paluru nyinara kuliningi Jesulu palula tjukurpa wangkanyangka. ⁴⁰ Ka

Marthanya maingka pulkara warkaringi munu pakuringkula palumpa małanypaku unngu mirpañaringi nguwanpa munu pitjala Jesula wangkangu, “Mayatja, ngayuku małanytjuńi wantikatingu kutju warkarinytjaku. Ka nyuntu wanyu kulintja wiya ngayulu kutju pulkara warkarinyangka? Wanyu wangka palunya kali tjungungku mai palyala.”

⁴¹ Palu Jesulu palunya wangkangu, “Martha, Martha! Nyangatja nyuntu kutjupa kutjupa tjuťa rawangku kulira tjituru-tjitururinyi. ⁴² Palu kutju ngaranyi nyuntu pulkara kulintjaku. Ka nyangatja Mary-lu tjukarurungku ngurkantanu munu panya ngayulu tjukurpa wangkanyangka nyinara kulini, ka kutjupangku palunya puťu altinyi.”

11

Jesulu Palumpa Nintintja Tjuťa Godala Tjapintjaku Nintintja

(Matthew-ku 6:9-13; 7:7-11)

¹ Ka ngula tjintu kutjupa Jesulu Godala tjapiningi. Ka paluru tjapira wiyaringkunyangka palumpa nintintja kutjupangku palula wangkangu, “Mayatja, nganañanya wanyu nintila Godala tjukarurungku tjapintjaku. Panya Johntu palumpa nintintja tjuťa nintinu, palu purunypa.”

² Ka Jesulu tjanala wangkangu, “Nyura Godala tjapirampa alatji palula wangkama, ‘Mama God, nyuntun pulka mulapa nyinanyi uwankarangka waintarinytja.

Nintinmalanya nyuntunya tjukarurungku wal kuntjaku aŋangu uwankarangku.

Munu nyuntu mayatjangku pitjala nganaŋanya uwankara walytjanmaṛa kanyinma nyuntumpa walytja mulapa nyinanytjaku.

³ Kuwarilanya ungama mai kuka kuwariku nganaŋa ngalkula paltja nyinanytjaku.

⁴ Munu nganaŋa nyuntunya kurannyangkampa nganaŋanya kalypangku wantima pungkunytja wiyangku.

Panya kutjupangku nganaŋanya kurannyangkampa nganana palunya kalypangku wantipai.

Anga-kanyinmalanya nganaŋa ngunti mukuringkula kura palyantjaku-tawara.'

Alatjiya Mamala tjapinma."

⁵⁻⁶ Munu palulanguru Jesulu tjanala wangkangu, "Tjinguru nyuntu nyuntumpa malpaku walikutu ankuku munga kultungka munun palula wangkaku, 'Wati wiṟu! Ngayuku malpa kuwari pararinguru pitjangu ngayunya nyakunytjikitja. Palu ngayulu mai kanyintja wiya palunya ungkunytjikitjangku. Wanyuni wiṟungku ungama mai maŋkurpa.'

⁷ "Ka tjinguru nyuntumpa mal pangku wali unngunguru ngapartji wangkaku, 'Pakulwiyangkuni wanti! Nyawa, tuwa pati ngaranyi. Katju tjitji tjuta munu ngayulu kuļu ngañmanypa ngarikatingu kunkunarinytjikitja, mununa puṭu pakanı nyuntunya mai ungkunytjikitja.' Alatji paluru wangkaku. ⁸ Palu ngayulu nyurala wangkanyi, panya paluru nyuntunya malpa kulira pakara

ungkunytja wiyangku wantiku, palu nyuntu kunṭa wiyangku rawangku tjapinnyangka kutju nyuntunya pakara ungkuku nyuntu mukuringkunytja.

9-10 “Kaṇa palulanguru nyurala wangkanyi alatji rawangkuya Godala ngatjinma nyura mukuringkunytjtjaku, ka nyuranya ungkuku. Munuya Godala rawangku tjapinma nyuranya tjukurpa palumpa nintintjaku, ka paluru nyuranya nintilku. Uwa, rawangkuya Godala tjapinma, panya aŋangungku tuwa pati ngaranyangka pungku-pungkupai pakara alpamilantjaku, palu puṛunypa. Ka Godalu nyuranya kulilku, panya aŋangungku wali unngu nyinara tuwa pungku-pungkunyangka kulira alara ungkupai, ka nyara palu puṛunypa Godalu rawangku tjapinnyangka kulira ungkupai munu nintilpai munu alpamilalpai wantintyta wiyangku. **11** Wanyu wati mamangku katja kuka antipinaku ngatjinnyangka liru ungkupai? Wiya! **12** Munu wanyu ngampuku ngatjinnyangka palunya pititjalili ungkupai? **13** Wiya, nyura panya kura tjuṭangku nintingku tjitji nyurampa wiru tjuṭa kutju ungkupai ngatjinnyangka. Kaya palulanguru wanyu Mama Ilkaritjanya kulinma, paluru nyaā puṛunypa nyinanyi? Panya paluru wiru mulapa nyurala waintara alatjitu munu paluru intjanungku Kurunpa Milmilnga ungkupai nyura palula ngatjinnyangka.” Alatji Jesulu nintintja tjuṭangka wangkangi.

*Jesuku Witulya Godalanguru
(Matthew-ku 12:22-30; Markaku 3:20-27)*

¹⁴ Ka wati mamutjara tjaa pati nyinangi putu wangkapai mamungku tjaa patinnyangka. Ka Jesulu mamu palunya paira iyanu, ka wati panya palulanguru ngalya-pakara palunya wantikatingu. Ka wati paluru piruku wangkapairingu, kaya anangu tjutangku palunya kulira pulkara urulyaranu. ¹⁵ Palu kutjupa tjutangkuya wangkangu, “Wiya, mamu ini Piiltjipaltu wati nyanga palunya witulyankupai panya mamu tjutaku mayatja pulkangku, ka nyara palulanguru paluru mamu tjuta pailpai anangu tjutanguru.”*

¹⁶ Kaya kutjupa tjutangku Jesunya ngunti arkara wituwituningi alatji wangkara, “Nyuntunya kunyu Godalu ilkar^{ing}uru witulyanu. Kalanya wanyu nintila munu kutjupa kutjupa witulya pulkangku palyala, kala nyakula kuliklu, ‘Munta, mulapa wati nyangatja Godalanguru pitjanytja.’”

¹⁷ Palu Jesunya nintiringu tjana unngu kulintjitjaku, panya tjana kuliningi mamu Piiltjipaltu palunya witulyankunyangkapalku. Ka nyangatja kulira paluru tjanala nyanga alatji wangkangu, “Kulilaya! Panya anangu tjuta ngura kutjunguru, walytjarara walytjararangku tjananku pikangku pungkula paturingkula, tjungu utulu kutjungka nyinanytja wiyaringkupai. Ka palu purunypa anangu walytjarara walytjarara wali kutjungka

* **11:15** Piiltjipalnga panya mamu Satannga.

nyinara, rawa pikaringkula tjungu nyinanyta wiyaringkula mauŋtalparingkupai. ¹⁸ Ka palu purunypa tjinguru Satannga mamu palumpa walytja tjutaku pikaringkunyaŋkampa, paluru tjana palumpa kuraringkula palula tjungu nyinanyta wiyaringkuku, ka paluru tjananya puṭu wituwituṛa uparingkuku, munu tjanampa mayatja wiyaringkuku. Ka panya nyura ngayunya wangkapai alatji, ‘Mamu ini Piiltjipaltu wati nyanga palunya witulyankupai mamu tjuṭa paintjaku aŋangu tjutanguru.’ Alatjini nyura wangkapai. ¹⁹ Palu ngayulu tjinguru palumpa witulyatjarangku mamu tjuṭa painnyangkampa, nganalu wanyu nyuranya waŋalpai tjuṭa witulyankupai mamu tjuṭa paintjaku? Mamungku? Wiya, nyura alatji wangkanyaŋkaya nyuranya waŋalpai tjuṭa nyurampa pikaringkuku, panya Godalu tjananya witulyankupai mamu paintjaku Satantu wiyangku. Ala palatja! Nyura ngayunya ngunti mamutjaranmananyi. ²⁰ Palu wiya, Godalu ngayunya witulyankupai mamu tjuṭa paintjaku, ka nyara palulanguru nyura uti nyakunytjatjanungku kulilku, ‘Munta-uwa, mulapa Godanya pitjangu nganaŋanya mayatjangku walytjanmaṛa kanyintjikitja.’

²¹ “Panya wati kuŋbungku kulaṭa munu tjuṭa waratjarangku wali anga-kanyilpai, ka walingka unngu palumpa ulytja uwankara palya ngaripai paluru atunymankunyaŋkampa. ²² Palu tjinguru wati kuŋpu pulka mulapa pitjaku munu palunya pungkula waintariku. Munu palulanguru paluru wati panya palumpa kulaṭa,

kutjupa kutjupa tjuṭa kuļu mantjira katiku ulytja uwankara kuļu, munu katira palumpa walytja tjuṭa tjaraṛa ungkuku. Ka palu purunypa ngayulu witulya pulka mulapa nyinanyi Satanta tjanala waintara alatjiṭu.

²³ “Panya aŋangumpa ngayula tjungu nyinanytja wiya ngaralampa paluru Satanta tjungutja nyinanyi ngayuku mirpaṇtju. Munu paluru aŋangu tjuṭa Godalakutu wirkakatinytja wiyangku wantirampa paluru Satanku warkarinyi munu tjananya ngayulanguru wililytjingani.

*Mamu Aŋangunguru Painnyangka Malaku
Pitjala Tjarpanytja*
(Matthew-ku 12:43-45)

²⁴ “Ka mamu aŋangunguru painnyangka pakara ankupai ngura piltikutu munu parangurilpai paluru nyinara pakuwiyaringkunytjikitjangku. Palu tjinguru mamu paluru ngura puṭu ngurira kulilpai, ‘Wiya, ngayulu malaku ankuku ngura panya ngayulu ngamanypa nyinanytjitjakutu.’ ²⁵ Munu mamu panya paluru pitjala nyakupai ngura panya paluru wiru kilina alatjiṭu ngaranyangka. ²⁶ Munu palulanguru malaku ankula paluru mamu 7 kutjupa altira katipai kura mulapalta, munuya paluru tjana palula tjarpaṛa ngura palyara titutjara nyinapai. Ka aŋangu panya paluru ngula malangka pulkaṛa mulapa kuraringkupai mamu panya paluru tjana unngu nyinara titutjarangku kurannyangka.” Alatji Jesulu tjanala wangkara nintiningi mamu tjuṭatjara.

Ngananya Tjana Pukulpa Mulapa Nyinanyi?

²⁷ Ka Jesulu tjukurpa nyanganpa wangkanyangka minyma kutjungku mirara wangkangu, “Minyma panya nyuntumpa ngunytju pukulpa mulapa nyinanyi, panya paluru nyuntunya iti kanyinu mununta ampungka pulkanu.”

²⁸ Palu Jesulu wangkangu palula, “Wiya, panya tjana kutjupa tjuta pukulpa mulapa nyinanyi, panya Godaku tjukurpa wangañarangku kulira palyalpai tjuta.”

*Jesulu Jonah-nyatjara Wangkanytja
(Matthew-ku 12:38-42; Markaku 8:12)*

²⁹ Munu anangu tjuta mulapa tjunguringkunyangka paluru tjanala wangkangu, “Alatjiyu nyura kura tjuta nyinanyi, panya nyura ngayuku puťu mulamularingkula rawangku tjapini ngayulu miracle kutjupa kutjupa witulya pulkangku palyantjaku, panya ngayulu nyara palu purunypa palyannyangka nyakula kutju nyura kulilpai mulamularingkunyitjikitjangku. Palu wiya, Godalu kutjupa kutjupa nyura nyakunytjaku witulyangku palyantja wiyangku wantinyi, panya paluru ngañmanytju wati kutju ini panya Jonah-nya iyanu, ka nyura uti ara nyara palunya kulintjatjanumpa nintiringama. ³⁰ Panya wati nyara palunya Godalu iyanu anangu Ninapanya ngurara tjutangka wangkara ngulutjunkunytjaku, tjana kuranguru piiwiyarinkula Godalakutu

aruringkunytjaku.* Ka palu purunypa Godalu ngayunya Watiku Katjanya iyanu, kaña anangu nyanga kuwari nyinanytja tjutangka palu purunypatú wangkanyi kuranguru piiwiyaringkula Godalakutu malaku aruringkunytjaku.

31 “Ka panya ngula tjintu malatjangka Godalu anangu uwankara ngurkantara tjaralku, ka nyara palula ara minyma panya mayatja ulpariranguru pitjanytjalu nyuranya puntura wangkara kuranmankuku ngayuku tjukurpa kulira wantinytjitjangka. Panya paluru ngura ulparira pararinguru pitjangu mayatja pulkangka Tjalamanta kulintjikitja paluru tjukurpa nintingku wangkanyangka. Ka kuwari kutjupa Tjalamanta waintara pulka mulapa nyurala tjungu nyinanyi nyura nyakula wanganarangku kulintjaku. Palu nyura ngayunya ngurkantankunytja wiya alatjiitu.

32 “Ka tjintu panya palulatu anangu Ninapanya ngurara tjutangku kulu nyuranya puntura wangkaku ngayuku tjukurpa kulira wantinytjitjanguru. Panya paluru tjana Jonah-lu Godaku tjukurpa wangkanyangka kulinu munuya piiwiyaringkula kura tjuتا wantingu. Ka kuwari kutjupa Jonah-la waintara pulka mulapa nyurala tjungu nyinanyi nyura nyakula wanganarangku kulintjaku. Palu nyura ngayunya ngurkantankunytja wiya alatjiitu.

* **11:30** Anangu Ninapanya ngurara tjuta malikitja tjuta Jew wiya tjuتا, munuya nganmanypa kura pulka nyinangi. Nyawa Jonah 1:1.

*Ananguku Tili**(Matthew-ku 5:15; 6:22-23)*

³³ “Kaya wanyu kulinma nyangatja. Anangungku wali unngu lampu tilira wanyu kutitjunkupai kumpilpa ngaranytjaku? Wiya, paluru uti tjunkupai, katu, tili paluru irnyara utintjaku anangu tjutangku walingka tjarpara uti nyakunytytjaku. ³⁴ Ka palu purunypa nyura kurungku tili nyakupai munu kutjupa kutjupa tili paluru irnyannyangka kulu.

“Munu nyura kuru palyangku uwankara uti nyanganyi. Palu nyura tjinguru kuru kurangku putu nyanganyi munu mungawalurungka nyinanyi. ³⁵ Kayanku palula-tawara purkarangku kulinma tili mulata kutju nyinanytjikitjangku Godaku panya tilingka. Tjinguru nyuntu tili nguntingka nyinanyi mungawalurungka. ³⁶ Palu nyura kurunpa winki Godaku pulkara nintiringkunytykitja mukuringkulampa tili mulata nyinanyi mungawalurungka wiya alatjitu, ka Godalu tili pulkalu nyurala uwankara tjukarurungku nintilku nyura palumpa ninti pulkaringkula tili

pulkangka nyinanytjaku.”*

*Jesulu Paratji Tjuta Munu Moseku Tjukurpa
Nintilpai Tjuta Kulu Kuranmankunytja
(Matthew-ku 23:1-36; Markaku 12:38-40; Luke-
aku 20:45-47)*

³⁷ Ka Jesulu tjukurpa wangkara
wiyaringkunyangka wati Paratji kutjungku
palunya altingu palula ankula mai ngalkuntjaku

* **11:36** Nyangatja Jesulu tjukurpa kuṟu munu tilitjara
wangkangi nyuntu nganaṇa kampa kutjupara tjukurpa kutjupa
kulintjaku, panya nganaṇa unngu nyaa kulini. Panya nganaṇa
kurungku kutju tili nyakupai munula kutjupa kutjupa tilingku
irnyannyangka kuļu uti nyakupai. Palu purunypa nganaṇa
unngu kutju kuliča ngurkantankupai nyaa tjukaruru ngaranyi
tjukurpa Godanyatjara. Munula panya kuřu palya nyi-
narampa uwankara wîrûra tjukarurungku nyanganyi. Palu
purunypala kulintja palya nyinarampa nganaṇa Jesulu panya
wangkanyitjita uwankaraku mulamularingkuku, panya nganaṇa
unngu Godaku pulkara nintiringkunytjikitja mukuringanyi. Palu
tjingurula kuřu pika nyinarampa nganaṇa puṭu nguwanpa
tjukarurungku nyakuku, munula tjinguru kurutjararingkula
puṭu alatjitu nyakuku. Palu purunypala Godanya unngu wan-
tirampa nganaṇa Jesulu wangkanyitjaku mulamularingkun-
ytja wiyangku wantiku, panya nganaṇa Godaku pulkara nin-
tiringkunytjikitja mukuringkunytja wiya munula palulanguru
ngurpa alatjitu nyinaku. Pala palula-tawarala uti purkarangku
kulimma tjukarurungku unngu kulintjikitjangku. Tjinguru
kutjupangku kulini, “Wiya, ngayulu ngañmanypa nintiringu
Godaku. Nyaakuña piruku tjukurpa kutjupa nyanga Je-
sulu wangkanyitjaku nintiringama?” Palu alatji kuličampa
palurunku ngurparinganyi panya paluru Jesunya wantira Go-
danya kuļu wantinyi. Palu nganaṇa kurunpa winki Godaku
pulkara nintiringkunytjikitja mukuringkunyangkampa paluru
nganaṇala uwankara tjukarurungku nintilku nganaṇa palumpa
ninti pulka nyinanytjaku.

palumpa walingka. Ka mulapaṭu Jesunya anu palula tjungu munu walingka tjarpara anta-ngarikatingu taipulangka itingka.* ³⁸ Ka wati panya Paratjingku Jesunya nyakula pulkara urulyarara kuliningi, “Ai, nyangangku ara nganampangka ngañmanytu manyirka paltjintja wiyaṭu mai ngalkuntjikitjangku.”

³⁹ Ka paluru urulyarara kulinnyangka Jesulu nyakula palula wangkangu, “Panya nyura Paratji tjutangku kutjupa kutjupa wiru tjuta palyalpai uti, aŋangu tjutangku nyuranya nyakula palya-palku kulintjaku. Palu Godalu nyuranya unngu nyanganyi, panya nyura manyungku aŋangu tjuta ngulutjingara kutjupa kutjupa tjuta tjanampa tjulyalpai, munu panya nyura kura kutjupa kutjupa tjuta kuļu rawangku kampangkaṭu palyalpai. Uwa, nyura nyaa purunypa, panya aŋangungku piti urilitja kutju paltjiṛa wirulpai, ka unngutja kitī raputji winki ngarapai, nyara palu purunypa nyura palya-palku nyinanyi kura mulapa. ⁴⁰⁻⁴¹ Nyura kawakawa tjuta! Godalu wanyu nyuranya puntu kutju palyaṇu kurunpa wiya? Wiya, paluru alatjiṭu nyuranya kurunpa winki palyaṇu, urilitja munu unngutja kuļu. Ka nyura uti tjukarurungku kulinma munuya aŋangu ngaltutjara tjutaku kurunpa winki ngalturingkula tjanampa mulamulangku palyanma wiru tjuta kutju, ka nyara palulangru Godalu nyuranya kurunpa

* **11:37** Jew tjutangku tjakangku mai taipula muṭumuṭungka itingru antangku ngarira ngalkupai.

winkingku mulamulangku palyannyangka nyakula nyurampa pulkara pukulariku.

42 “Palu nyurampa Paratji tjutaku pika pulka mulapa ngaraku! Panya nyura ukiri pañti wiru ini miinpa, munu ruuwa, munu ini kutjupa kutjupa tjuta kuлу nyurampa kaananguru 100 mantjira tjarara 10 Godanya ungkupai, Moseku panya tjukurta kulintjatjanungku. Palu nyura Moseku tjukurpa pulka tjuta kulira wantipai, panya nyura añañgu tjuta ngunti kuralpai tjanampa tjukarurungku palyantja wiyangku, munu nyura Godaku pulkara mukuringkunytja wiyangku wantipai. Palya nyura ukiri panya tjuta Godanya unganyi, palu nyura uti waintara kulinma munuya añañgu tjutaku tjukarurungku palyanma.

43 “Uwa, mulapa nyurampa pika pulka ngaraku ngula, panya nyura wali inmatjangka tjunguringkula tjiya wiru tjuta ngurkantankupai añañgu tjutangka kuranyu uti nyinakatinytjikitja mukuringkula. Munu nyura tawunungka kañany-kañanypa parangarapai añañgu tjutangku nyuranya nyakula mirawaninnytjaku mukuringkula. **44** Palu nyurampa pika pulka mulapa ngaraku, panya nyura kurulpa irititja tjuta purunypa nyinanyi. Panya añañgu tjuta kurulpa irititjawantu watarku ankupai manta palyangka-palku, palu purunypa nyuranya añañgu tjutangku nyakula palya-palku kulilpai, palu wiya nyurala unngu kura pulka mulapa ngaranyi.” Alatji Jesulu wangkangi tjanala Paratji tjutangka.

45 Ka wati kutjupangku Moseku tjukurpa nintilpaingku palula wangkangu, “Nintilpai, nyuntu tjukurpa nyanga palunya wangkara nganañanya kulu paini.”

46 Ka Jesulu palula ngapartji wangkara wangkangu, “Nyurampa kulu pika pulka ngaraku Moseku panya tjukurpa nintilpai tjutaku, panya nyura añañgu tjuña rawangku wituwitulpai tjukurpa kutjupa kutjupa tjuña wangañarangku kuliña palyantjaku, kaya aña tjuña mulapa ngaranyangka puña kuliña kaarkaararira kurunpa pakuringkupai. Panya mayatjangku palumpa wati warkaripaingka tjañangka kutjupa kutjupa pulka mulapa katintytjaku tjalitjunkupai munu mayatja paluru tjalirña katira paku pulkaringkunyangka nyakula, palunya alpamilara tjara palulanguru mantjira tjalirña katintytja wiyangku wantipai. Nyara palu purunyntju nyura añañgu tjuña rawangku wituwitulpai kutjupa kutjupa tjuña mulapa palyantjaku, kaya pakuringkupai.

47 “Uwa, mulapa nyurampa pika pulka utiringkuku, panya nyura kulpi tjuña rawangku wirulpai nyara Godaku wati wangkatjara tjuña unngu miri ngarinyangka. Palu miri nyara palunya tjananya panya nyurampa tjamupitingku iriti iluntanangi. **48** Kaña nyuranya kulpi tjuña wirura kanyinnyangka nyakula kulilpai, ‘Munta, nyanga paluru tjana tjinguru palya kulini tjanampa tjamupitingku iriti wangkatjara tjuña iluntankunyta.’

49 “Palu nyanga palunya Godalu nintingku kuliningi munu panya wangkangu, ‘Ngayulu

wangkatjara tjuṭa iyalku, tjakulpa tjuṭa kuļu aŋangu tjuṭa wangkara tjukaruruntjaku. Kaya tjara iluntankuku munuya tjara kutjupa kuralku.’⁵⁰ Uwa, nyurampa tjamupitingkuya wangkatjara tjuṭa kuwaripatjara mulapa iluntanangi, munuya rawangkuṭu iluntankukatingi. Ka nyara palulanguru Godalu nyuranya nyanga kuwari nyinanytja tjuṭa kukanymanu, panya nyura munu nyurampa tjamupitingku wati wangkatjara tjuṭa pungkula iluntankunytjtjangka.⁵¹ Panya nyura Abelngawarara iluntanu, munuya nyara palulanguru Godaku wangkatjara tjuṭa rawangku iluntara waŋanangi, munuya palulanguru wati małatja Tjakarayanya kuļu iluntanu, paluru timpula unngu pitjilpa pulkangka itingka ngaranyangka, Godala mīrangka. Uwa, panya palula tjanalanguru kuwari nyura kukanypa ngaranyi, panya nyurampa tjamupitingku tjananya rawangku pungkukatinytjtjangka.

⁵² “Uwa mulapa pika pułka mulapa nyurampa ngaraku Moseku tjukurpa nintilpai tjuṭaku. Panya nyura aŋangu tjuṭangka wangkara nintinnyangka kutju tjana kuliṛa Godaku iwaraku nintiringkupai, palu nyura Godala tungunpungkula iwara pala palunya waŋantja wiyangku wantipai, munu kutjupa tjuṭangku kuļu iwara pala palunya waŋantjaku-tawara nyura titutjara anga-ngaranyi, tjanala tjukarurungku nintintja wiya.” Alatji Jesulu tjananya wangkangu.

⁵³ Ka Jesunya ankunytjikitja ritiringkunyangka wati tjukurpa nintilpai tjuṭangku munu Paratji tjuṭangku kuļu palunya markunu

munuya palula mirpañ-mirpañtu rawangku tjapiningi paluru tjukurpa tjuta píruku wangkanyangka kulintjikitjangku. ⁵⁴ Panya paluru tjanaya ngunti arkara palula tjapiningi ngunti wangkanyangka palunya kuutpakutu katira wangkanytjikitjangku.

12

Paratji Tjuta Purunypa Ngunti Palya-palku Nyinanytja Wiya

¹ Ka nyara palula-arangka anangu mungilyi mulapa tjunguringu munuyanku ngarala pulkara utjuningi. Ka Jesulu palumpa nintintja tjutangka-warara wangkangu nyanga alatji, “Ngulu nyangamayanku nyura Paratji tjuta puñunyarinytjaku-tawara panya paluru tjana ngunti palya-palku nyinapai. ² Panya anangungku kampangkañtu palyantjitja uwankara ngula utiringkuku, paluru unngu kuraringkula kulintjitja tjuta kuñu, panya kumpilitja uwankara mulapa utiringkuku, kaya uwankarangku kulilku. ³ Panya tjukurpa nyura mungangka kumpira wangkanytja kutjupangku kalala utingku wangkaku, kaya uwankarangku kulilku. Munu tjukurpa nyura wali unngu tjaalytju wangkanytja kutjupangku urulta mirara tjakultjunkuku wali katunguru anangu winkingku uti kulintjaku. Uwa nyurayanku paluru tjana puñunyarinytjaku-tawara pulkara atunyamanama.”

*Godaku Kutjuku Nguluringama
(Matthew-ku 10:28-31)*

⁴ “Kaṇa walytja wiru tjutangka nyurala wangkanyi, aŋangu tjutakuya nguluringkuwiya nyinama paluru tjana nyurampa pikaringkunyangka, panya tjana nyuranya puntu kutju pungkula iluntankuku, munu palulangurulta nyuranya kurunpa putu wiyanı. ⁵ Wiya, nyura uti Godaku pulkara nguluringama panya paluru kutju witulya pulkangku nyuranya puntu iluntankunytjatjanungku kurunpa waŋiku ngura kurangka waru pulkangka kampanytjaku. Uwa, nyara palula-tawara nyura uti palumpa kutjuku nguluringama aŋangu tjutaku wiya.

⁶ “Panya Godalu nyuranya tiṭutjarangku mukulyangku kulini watarkurintja wiyangku. Wanyuya tjulpu panya nyii-nyii kulinma. Tjinguru nyura tjulpu palu purunypa kutjara mankurpa payamilalku mani kulunytja kalka kutjarangka. Palu Godalu tjulpu nyanga tjukutjuku tjutaku watarkurintja wiyangku tjananya kutju kutju rawangku kulilpai. ⁷ Munu palulanguru tjulpu tjukutjuku tjuta rawangku kuliṛa paluru wanyu nyurampa pulka tjutaku watarkuriku? Wiya, paluru nyuranya rawangku mukulya pulkangku kulilpai tjulpu tjutangka munkara, kaya palulanguru nguluringkuwiya rapa nyinama. Panya paluru nyuranya uwankara kutju kutju nintingku kulilpai. Munu paluru nyurampa mangkaku ninti yaaltjiu nyurampa katangka ngaranyi. Kutjupangku putu kantamilaṇi, palu Godanya kutju ninti, munu nyurampa kutjupa kutjupa uwankaraku kuļu paluru ninti nyinanyi. Pala palulanguru nyura uti nguluringkunytja wiya rapa nyinama.

*Jesuku Walytjangku Utingku Wangkanytja
(Matthew-ku 10:32-33; 12:32; 10:19-20)*

⁸ “Kulilaya! Tjinguru nyura aŋangu tjutangka mirangka rapangku wangkaku ngayuku walytja nyinanytjatjanungku, ka ngayulu Watiku Katjangku ngapartji palu purunypaṭu nyuranya wangkaku Godaku angelpa tjutangka miṛangka alatji, ‘Nyanga paluru tjana ngayuku walytja nyinanyi.’ ⁹ Palu nyura tjinguru tjutangka miṛangka ngayuku ngurparingkunyaŋkampa ngayulu nyurampa ngapartji ngurparingkukutu angelpa tjutangka miṛangka. ¹⁰ Uwa, ngayunya nyura Watiku Katjanya kurara wangkanytjatjanu piiwiaringkunyaŋkampa Godalu nyuranya kalypangku pungkuwiyangku wantiku. Palu Ku-runpa Milmilngā nyura kuraṛa wangkanyangka Godalu nyuranya kukanymankuku nyurampa kalyparingkunyta wiyangku.

¹¹⁻¹² “Kaya tjinguru ngayunya waŋannyangka nyuranya wal̄i inmatjakutu witira katiku Jewku mayatja tjutakutu nyuranya kulira ngurkantara paintjaku. Ka nyura tjinguru mayatjangka wangkanytjikitjangku puṭu kulilkku, ‘Tjukurpa nyaanatju wangkaku?’ Palu alatji pulkara kulilwiyangku wantima, panya nyara palula arangka tjanala kuranyu ngarala nyura Kurunpa Milmiltu nintinnyangka kulilkku tjukarurungku wangkanytjikitjangku.” Alatji Jesulu wangkangi tjanala.

Tjukurpa Wati Mani Pułkatjara

¹³ Ka wati kutjungku tjanalanguru wangkangu Jesula, “Nintilpai, ngali kuṭarara tjiṭula nyinanyi.

Katju kuta wanyu wangka, kanı mamaku ulytja tjarara uwa.”

¹⁴ Ka Jesulu palula wangkangu, “Wiya, nganalunuŋi wangkangu ngayulu mayatjarira nyupalinya tjarara ungkunytjaku? Palatja nyupalimpa, ngayuku wiya.” ¹⁵ Munu palulanguru Jesulu aŋangu uwankarangka wangkangu, “Nyura uti ulytja munu mani pulka mantjintjikitja mukuringkunytja wiyangku wantima! Godalu wanyu nyuranya wankaru kanyilku nyura pulka mulapa kanyinnyangka? Wiya alatjiṭu.”

¹⁶ Munu palulanguru paluru tjanala tjukurpa ara kutjupatjara tjakultjunangi alatji wangkara, “Wati mani pulkatjarangku manta pulka kanyiningi munu mai ukiri pulka paamangka pakaltjinganu. ¹⁷ Munu paluru kutjungku kuliningi, ‘Walı nyangatja mai pulka utulura tjunkunytjaku tjukutjuku utju mulapa, kanı nyaalku? ¹⁸ Munta, nyanga alatjintiña palyalku. Kuwariṇa wali nyanga tjukutjuku piluntankuku mununa kutjupa pulka mulapa palyalku munuṇatju nyara palula mai munu ngayuku kutjupa kutjupa uwankara utulura tjunkuku. ¹⁹ Munuṇatju pukularira wangkaku, “Ngayuku mai pulka munu kutjupa kutjupa uwankara winki ngarinyi kuwari yiya tjuṭaku alatjiṭu, kanı rawangku ngalkula tjikira pukulariku munuṇatju pakuwiya nyinaku.”’

²⁰ “Palu Godalu wati panya palunya wangkangu, ‘Nyuntun kawakawa! Munga nyanga kuwari nyuntu iluku, munun panya

nyuntu uṭulura tjunkunytja uwankara wantikatiku kutjupangku mantjintjaku.’”

²¹ Munu Jesulu aṛa nyanga palunya wangkara wiyaringkula tjananya wangkangu, “Nyanga palu purunyariku aṅangu panya palurunku walytjangku kulira wiru tjuṭa uṭulura tjunkupai, panya paluru Godanya pulkara pukulmankunytjikitjangku kulintja wiyatū.”

*Iluru-ilururinytja Wiya Nyinanytjaku
(Matthew-ku 6:25-34)*

²² Munu palulanguru Jesulu wangkangu palumpa nintintja tjuṭangka, “Tjinguru nyura kutjupa-aṛa tjituru-tjitururipai alatji kulira, ‘Mailanku yaaltjinguru mantjilku ngalkula paltja nyinanytjikitjangku, munula mantara kuļu yaaltjinguru mantjilku tjarpara unytjunpa nyinanytjikitjangku?’ Palu ngayulu nyurala wangkanyi nyanga alatji kuliraya tjituru-tjitururinytja wiyangku wantima! ²³ Panya Godalulanya wanka nyinanytjaku palyanu mai kutju pulkara kulintjaku wiya, munulanya puntu wiru palyanu mantara kutju pulkara kulintjaku wiya, palu palunya waintara kulintjaku.

²⁴ “Wanyuya tjulpu tjuṭa nyawa munuya kulinma panya paluru tjanaya ukiri kaanangka pakaltjingalpai wiya munuya mai kururingkunyangka mantjira uṭulura walingka ngulaku tjunkupai wiyatū, panya Godalu tjananya titutjarangku paltjalpai tjintu winki. Kaya kulinma panya nyura tjulpu tjuṭa purunypa wiya aṅangu pulka

tjuṭa nyinanyi, ka panya Godanya nyurampa pułkara mulapa mukuringanyi tjułpu tjutangka muñkara. ²⁵⁻²⁶ Palulanguruya maiku kutjupa kutjupa tjutaku puṭu kulira tjituru-tjitururintja wiyangku wantima, panya nyura tjituru-tjituru nyinarampa puṭu yiya tjuṭa mawarani mantangka nyanga rawa wanka nyinanytjikitjangku. Palulanguruya kutjupa kutjupa tjutaku puṭu kulirampa tjituru-tjitururintja wiyangku wantima.

²⁷ “Kulinmaya wanyu inuntji panya ilytjingka pakantja tjuṭa, panya paluru tjana wiru mulapa ngaranyi, palu tjananku war̄karira mantara walytjangku palyara nganana purunytju tjarpapai wiya alatjiṭu. Panya Tjalamannga mayatja pulka iriti nyinara mantara wiru tjutangka tjarpapai, palu palumpa wiru tjutangka muñkara mulapa inuntji panya ilytjingka pakantja tjuṭa ngaranyi.

²⁸ “Ka nyura nyaaku mantara-tjiratja tjiturutjiturintji Godaku puṭu mulamularingkula? Panya Godalu alatjiṭu ukiri tjuṭa inuntjingka wirulpai, palu ukiri paluru tjana tjintu mankurpa nguwanpa ngarala piltiringkupai, ka tjananya warungku kampara wiyalpai. Kaya nyara palulanguru kulinma, panya Godalu ukiri tjuṭa kulira rawangku inuntjingka wirulpai unytju ngarala wiyarungkunytjaku, munu palulanguru nyuranya wantinytja wiyangku pulkara kulikku ukiringka muñkara mulapa panya nyura tiṭutjara nyinapai ukiri purunypa wiya. Nyara palulanguru paluru nyurampa watarkurintja wiya, munu nyuranya mantara tjuṭa ungkuku tjarpanytjaku.

²⁹ “Ka palulanguru nyura alatji kulilwiyangku wantima, ‘Yaaltjingurula mantjirā ngalkuku? Munula yaaltjinguru mantjirā tjikilkku?’ Palu kutjupa kutjupaku puṭu kulirā tjiturū-tjiturūrinytja wiyangku wantima.

³⁰ Nyanga alatjiya Godaku ngurpa tjutangku rawangku kulilpai mantjintjikitjangku. Palu Mama Godanya ninti nyinanyi nyura pala mukuringkunytjtja uwankaraku. ³¹ Kaya kutjupa kutjupa tjuta-tjiratjangku tjiturū-tjiturūrira puṭu kuli-kulintja wiyangku wantima, munuya palunya kutju rawangku kulinma paluru nyuranya mayatjangku kanyinnyangka pukulmankunytjikitjangku, ka paluru nyuranya unguku mai, mantara, munu kutjupa kutjupa tjuta kulu nyura mukuringkunyangka.

*Ngura Ilkaritjaku Mukuringama
(Matthew-ku 6:19-21)*

³² “Uwa, nyura ngayuku walytja wiru maṇkur-maṇkurpa nyinanyi, munuya nguluringkuwiya nyinama. Panya nyurampa mamangku Mayatja Godalu nyuranya rawangku atunytju kanyintjikitja mukuringanyi walytja uwankara. ³³ Kaya nyurampa ulytja kutjupa kutjupa tjuta tjalamilara mani mantjirārampa anangu ngaltutjara tjuta ma-ungama. Panya nyura alatji palyannyangka Godalu nyurampa ilkarīngka tjunkuku wiru mulapa. Palulanguruya rawangku mani mantangka nyanga pulkantjikitjangku kulintja wiyangku wantira ma-ungama Godalu nyakula nyurampa

ilkar̄ingka rawangku tjunkukatintjaku wiru tjūta mulapa. Panya ngura nyara palula nyurampa Godalu tjunkunyangka titutjara ngar̄aku wiyaringkunytja wiya. Panya nyara palula wati kutitjunkupai nyinanytja wiya tjarpara kutitjunkunytjikitja, ka kantaya tjūta kūlu ngar̄anytja wiya nyarangka mantara ngalkula kurantjikitja.

34 “Uwa, uti nyura ilkaritja tjūtaku kutju pulkara mukuringama. Tjinguru nyura mandatja tjūtaku pulkara mukuringkulampa nyura palunya tjananya kutju rawangku kulilku Godanya wantira. Palu nyura ilkaritja tjūtaku kurunpa winki mukuringkulampa nyura mandatja tjūta wantira waintara ilkaritja tjūta kutju rawangku kulilku munu Godala kutju wanganarangku kulintjikitja mukuringkuku.”

Mayatjaku Ala-alangku Patara Warka Wiru Palyalkatima

(Matthew-ku 24:45-51)

35-36 Munu Jesulu tjananya wangkangu, “Ngayukuya titutjara riti ala-ala patara ngarama, nyaa purunypa, panya wati warka tjūta tjanampa mayatjaku tili winki patantja purunypa. Panya tjanampa mayatja tjinguru nganmanypa anu wati palumpa mal pangku kungkawara altinyangka nyakunytjikitja munu pulampa pukularira mai pulka anangu malpa tjūtangka tjunguringkula ngalkuni. Kaya wati mayatjaku warka tjūta ngurangka nyinara lampa tilitjara palumpa pāan̄i malaku pitjanytjaku. Munu tjanampa mayatjangku

pitjala tuwa pungku-pungkunya ngkaya paluru tjana pakara tuwa mapalku alaŋi.³⁷ Ka wati panya mayatjangku tjananya pitjala riti paṭara ngaranyangka nyakula palunya tjananya pulkara pukulmananyi, munu panya upukuta araltjara tjunkula tjananya taipulangka nyinatjunanyi mai katira ungkunytjikitjangku.³⁸ Panya mayatja paluru tjinguru munga kultungka pitjama munta tjinguru tjintukutu pitjama, palu palumpa war̄ka tjuṭa kunkunpa wiya palumpa rawa riti ala-alā paṭani munuya pitjanyangka nyakula pulkara pukularinyi. Ka nyura palu purunypaṭu ngayuku riti ala-alā nyinama kunkunpa wiya ngayulu pitjanytjaku paṭara.”

³⁹ Munu Jesulu tjukurpa kutjupa palu purunypa tjanala piruku wangkangi alatji, “Wati panya kutitjunkupainya kulila, panya paluru wal̄ingka tjarpala kutitjunkunytjikitjangku nganmanytu wal̄iku mayatjangka taimi tjakultjunkunytja wiya paluru urulyku wirkankupai. Tjinguru paluru nganmanytu tjakultjunama, ka wal̄iku mayatjangku nintingku nyinara ngura anga-nyangama pitjala tjarpantjaku-tawara.⁴⁰ Ka palu purunypa nyura uti rawangku riti nguwantu ala-alangku paṭara nyangama ngayulu Watiku Katjanya watarku nyinanyangka pitjanytjaku-tawara. Panya nyura uwankara ngurpa yaalara ngayulu małaku pitjanytjaku.” Alatji Jesulu palurunku wangkangi palumpa nintintja tjuṭangka.

Tjukurpa Wati War̄katjara

41 Ka palulanguru Peterlu palula tjapinu, “Mayatja, nyuntu wanyu tjukurpa nyangatja nganaŋala wangkanyi nganampa kutju, munta aŋangu uwankaraku?”

42 Ka Jesulu palula wangkangu, “Ngananya wanyu wati warka nintipuka munu tjukaruru wangaŋara warkaripai? Nyara palunya mayatjangku tjukaruru nyakula kutju tjunkuku palumpa warkaripai kutjupa tjuṭa tjukarurungku atunymara kanyintjaku munu tjananya mai ungkunytjaku. **43** Munu ngula mayatja panya paluru ankunytjatjanungku malaku pitjala nyakuku wati panya paluru warka panya wirura palyantja. Munu paluru palumpa pulkara alatjiṭu pukulariku. **44** Kana tjukarurungku nyurala wangkanyi, panya wati mayatjangku alatji wirungku warka tjuṭa atunymara kanyinnyangka nyakula palunya mayatja pulka mulapa tjunkuku palumpa uwankara mayatjarira atunymara kanyintjaku.

45 “Palu tjinguru wati paluru kampa kutju-parira unngu kulilku, ‘Munta ngayuku mayatja tjinguru titutjara anu munu tjinguru ngula kutju malaku pitjaku.’ Munu palulangurulta pit-janytja wiya ngaranyangka paluru warkaripai kutjupa tjuṭa pikangku pungama, wati tjuṭa munu minyma tjuṭa kulu. Munu paluru mai pulka ngalkula waina tjikira tarangkariku. **46** Ka ngula mayatja panya paluru malaku pitjaku wati panya paluru watarku nyinanyangka. Munu palunya kura nyinanyangka nyakula pulkara alatjiṭu pungkula paira iyalku ngura kurakutu

panya Godala tungunpungkupai tjutangka tjun-guringkula nyinanytjaku.

⁴⁷ “Ka nyura kulini? Tjinguru wati war̄karipaingku nintingku kulini mayatjangku palunya war̄kaku wangkanyangka munu paluru palyantja wiyangku wantinyi. Ka mayatjangku war̄ka wantinyangka palunya pulkara mulapa pungkuku. ⁴⁸ Palu wati war̄karipaingku tjinguru mayatja mukuringkunytjtja palyantja wiyangku wantinyi ninti wiyangku munu kutjupa ngunti palyanı paluru kulintja. Ka palunya mayatjangku watarkitja-mantu pika tjukutjuku pungkuku.

“Kulini nyura? Godalu tjinguru anangu kutjupa war̄ka pulka unganyi palyantjaku, munu paluru mukuringanyi war̄ka panya ungkunytjtja tjukarurungku palyantjaku. Munu tjinguru piruku anangu kutjupa war̄ka pulka mulapa unganyi war̄ka panya nganmanytju ungkunytjtjangka muñkara, munu paluru pirukutu mukuringanyi war̄ka panya ungkunytjtja tjukarurungku palyantjaku.”

*Walytjapiti Tjutangkuyanku Tjararingkula
Tjananku Kuraringkuku Jesulanguru*

(Matthew-ku 10:34-36)

⁴⁹ Munu Jesulu rawangku wangkangi, “Panya ngayulu pitjangu mantakutu Godaku tjukurpa waru purunyapa wangkara lipintankunytjikitja. Ka tjarangku kulira mulamularingkuku, ka tjarangku kulira wantiku. Kaya nyara palulanguru maunṭalpa maunṭalpa ngaraku

warungku kampanyangka purunypa. Kana ngayulu mukuringanyi warpungkula waru purunypa lipiringkunytjaku. ⁵⁰ Palu panya ngayuku ngaranyi ngañmanypa pika pulkaringkula pulkara uliringkunytjaku, kana ngayulu kulil-kulilpa nyinanyi pika panya palumpa paṭara.

⁵¹ “Ka nyura tjinguru ngayunya kulini alatji, ‘Nyangatja tjinguru mantakutu pitjangu aŋangu tjuta kalypa nyinanytjaku palyantjikitjampa.’ Palu wiya, nyangatja nyura ngunti kulintja, panya ngayulu pitjanyangka aŋangu uwankara kalyparingkula tjungu nyinanytja wiya, palu kutjupa tjuta ngayuku mulamularingkuku, kaya kutjupa tjuta ngayuku mulamularingkuwiya nyinaku munuya paluru tjana aŋangu panya ngayuku mulamularingkupai tjutaku pikaringkuku. ⁵² Panya kuwaringuru tjinguru aŋangu 5 walytjapiti tjungu nyinanytjatjanu kutjara mulamularingkuku, ka maŋkurpa kulilwiya watarku nyinaku, munuya puṭu tjungu pukulpa nyinaku ngura kutjungka.

⁵³ “Ka wati mama palumpa katjaku kuraringkuku ngayuku mulamularingkunyangka. Ka palu purunypatu wati katjangku palumpa mamangka tungunpungkuku paluru ngayuku mulamularingkunyangka. Ka minyma ngunyntju palumpa uŋtalpaku pikaringkuku ngayuku walytjaringkunyangka. Ka palu purunypatu kungkawarangku palumpa ngunyntjungka tungunpungkuku paluru ngayuku mulamularingkunyangka. Ka minyma kutjupa palu purunypatu palumpa mingkayiku

kuraringkuku, ka kungkawara kutjupangku minyma mingkayingka tungunpungkuku.”

*Jesulu Paintja Ngunti Pinatjararingkunyangka
(Matthew-ku 16:2-3; 5:25-26)*

⁵⁴ Munu palulanguru Jesulu tjanala wangkangu, “Panya nyura wilurara nyakupai ngangkali ngaranyangka munu nyura wangkapai, ‘Kuwarintilanya minangku puyilku.’ Ka mulapaṭu minangku puyilpai. ⁵⁵ Ka palu purunypa nyura piriya wangkanyangka kulira wangkapai, ‘Kuwarinti kuli pulka ngaraku.’ Uwa, mulapaṭu nyura tjukarurungku wangkapai ilkari nyakunytjatjanungku munu piriya wangkanyangka kulintjatjanungku. ⁵⁶ Palu nyaaku nyura kutjupa kutjupa tjuṭa nyakula puṭu kulini Godalu palyannyangka? Wiya, nyura palya-palku nyinapai tjutangku puṭu Godanya tjukarurungku kulilpai.

⁵⁷ “Nyaaku nyura rawangku puṭu kulini tjukarurungku palyantjikitjangku? ⁵⁸ Tjinguru nyuntu anangu kutjupa kurannyangka paluru nyuntunya mirpañarira kuutpakutu katiku. Ka katinyangka nyuntu uti palunya wirura purkarangku wangkakatima palumpa kalyparingkunytjikitjangku kuutpangka wirkankunytja kuwaripangka, kanta paluru tjinguru kalypangku wantiku kuutpangka ngaratjunkunytja wiyangku.

“Palu tjinguru nyuntu wangkara palumpa kalyparingkunytja wiyangku wantinyangkampa paluru nyuntunya katiku alatjiṭu munu wati ngurkantankupaingka kuranyu ngaratjunkuku,

kanta paluru nyuntunya kura ngurkantara wangkaku maningka payamilantjaku munu paluru pulitjamunu altiku kanta pitjala nyuntunya witira katira tjailangka tjarpatjunkuku.⁵⁹ Mununta nyara palula rawangku kanyilku nyuntu mani uwankara payamilara wiyantjaku paṭara. Nyangatjanā mulamulangku nyurala wangkanyi.”

Alatji Jesulu wangkangi aŋangu tjuṭangka Godanya tjukarurungku kulintjaku.

13

Godalakutu Małaku Aruriwa Kura Tjuṭa Wan-tira

¹ Ka nyara palula-aran̄gka aŋangu kutjupa maŋkurpa wirkanu ngura nyara palula munuya pitjala Jesula tjakultjunu, “Tjukurpa panyatjan kulinu? Panya aŋangu Galileenya ngurara maŋkurpa wali inmatjangka tjarpanGU Godanya walkuntjikitja. Munu panyaya kuka pungkula pitjilta tjunkula tiliningi Godanya ungkunytjikitjangku. Ka panya alatji palyan-nyangka Pilate-aku tjaultji tjuṭa urulyku wirkanu munu panya tjananya tjarpara pungkula iluntanu, ngalṭutjara.”

² Ka Jesulu kulira tjanala wangkangu, “Palu nyura nyaa kulini? Tjinguru nyura kulini tjana kura pułka palyantjatjanu ilungu, ka panya Galileenya ngurara kutjupa tjuṭa palu purunypa wiya aŋangu palya tjuṭa.”³ Palu wiya, nyangatja nyura ngunti kulini. Utu nyura kuluyanku

kulinma, munuya kura tjuṭa palyantjatjanu piwiyingkula Godalakutu aruringama! Panya nyura wantinyangkaya nyuranya palu purunypaṭu iluntankuku.

⁴ “Wanyuya ara panyatja kulila panya wati 18 mungaṭu Jerusalemala ilunyta. Panya ngura nyara Tjailumala tjananya wali warangku pilukatira iluntanu. Ka nyura tjinguru palu purunypaṭu kulini tjana kura pulka palyantjatjanu ilungu, ka panya aŋangu Jerusalemanyangurara kutjupa tjuṭa palu purunypa wiya aŋangu palya tjuṭa. ⁵ Palu wiya, nyangatja nyura ngunti kulini. Utu nyura kuluyanku kulinma, munuya kuranguru piwiyingkula Godalakutu aruringama! Panya nyura wantirampa palu purunypaṭu iluku.”

Jesulu Israelnga Utintja Punu Ili Mai Wiya Ngaranytja

⁶ Munu palulanguru Jesulu tjukurpa ara kutjupatjara tjanala wangkangu alatji, “Wati kutjungku palumpa kaanangka puṇu ili pakaltjingaṇu, munu ngula puṇu panya paluru pulkaringkunyangka wati paluru anu mai nyakula mantjintjikitja. Palu ankula puṭu nyangu puṇungka panya mai wiya ngaranyangka. ⁷ Munu wangkangu wati panya kaana kanyilpaingka, ‘Nyawa, ngayuluṇa rawa yiya maŋkurpa pitjangi puṇu nyanga palulakutu mai ili nyakula mantjintjikitja munuṇa mai puṇu nyangangka nyakunytja wiya alatjiu. Ka wanyu kaṭara punkatjingala, munu puṇu kutjupa tjura palumpa arangka.’

⁸ “Palu wati panya warkaripaingku ngapartji wangkangu, ‘Mayatja, wanyu yiya kutju pīruku wantima, kaña para-tjawařa arintara tjipiku kuna tjunkuku puñu panya paluru palyaringkula maitjararingkunytjaku. ⁹ Ka tjinguru ngula yiya kutjupa mai pakalku. Palu tjinguru mai pakalwiya ngaranyangkampaña kařara wañiku.’” Alatji Jesulu wangkangi tjanala.

*Minyma Pupařu-pupařu Palyarunguntja
Tjintu Milmiltä*

¹⁰ Ka ngula Saturday-ngka tjintu panya pakuwiyaringkupaingka Jesulu walı panya inmatjangka tjarpura aňangu tjutangka wangkara nintiningi. ¹¹ Ka minyma kutjupa nyara palula nyinangi wītapi pupařu-pupařu mamungku kurantja, munu paluru rawa mulapa yiya 18 wītapi pupařu-pupařu ankupai tjukaruru wiya. ¹² Ka Jesulu minyma panya palunya nyakula altingu munu wangkangu palula, “Minyma ngana, tjukarururiwa!” ¹³ Munu paluru palula mara tjunu, ka minyma panya paluru mapalku tjukarururingu munu pulkara pukularira Godanya walkuningi.

¹⁴ Ka walı inmatjaku mayatja pulkara Jesuku mirpañaringu minyma panya palunya tjintu pakuwiyaringkupaingka palyarungunnyangka, munu paluru aňangu tjutangka wangkangu, “Panya tjintu 6 kutjupa ngaranyi warkarinytjaku, kaya tjintu nyara palula tjanala palyarunguntjaku pitjama, palu tjirirpi nyanga milmilpa

Saturday ngaranyangkaya uti wantima palyarunguntjaku pitjanytja wiyangku.”

¹⁵ Ka Jesulu palula tjanala wangkangu, “Nyura ngunti palya-palku nyinapai tjuta. Panya nyura tjirirpi kutjupa tjirirpi kutjupa nyurampa puluka munu tangkiyi ku lu araltjara katipai mina tjikintjaku tjirirpi nyanga pakuwiyaringku-paingka ku lu. ¹⁶ Palu nyura paini minyma nyanga nyurampa walytja Aipuramalanguru nyinanytja. Ku ntangka! Nyanga palunya panya Satantu ngura iritilpi kura nu, ka witapi rawa pupa tu-pupa tu ngarangi yiya 18. Ka nyura nyaaku paini pitjanytja wiyangku wantintjaku witapi ngayulu palyarunguntjaku? Wiya, utina minyma nyanga palunya Satantu rawangku kurrantja palyanma alatji tu tjintu nyanga pakuwiyaringkupaingka.”

¹⁷ Ka Jesulu alatji wangkanyangka palumpa kuraringkupai tjutangku kulira pulkara kun taringu, palu anangu kutjupa tjuta Jesuku pulkara pukularingu paluru wiru mulapa palyannyangka nyakula.

Tjukurpa Uninypatjara Munu Yiitjatjara Wangkanytja

(Matthew-ku 13:31-33; Markaku 4:30-32)

¹⁸ Munu Jesulu tjanala tjapinu wangkara, “Godalu anangu tjuta mayatjangku walytjamara kanyintja ara nyaaa purunyaa ngaranyi? Tjukurpa nyaawanungku na nyurala wangkara utilku? ¹⁹ Wanyuna tjukurpa uninypatjara wangka. Panya wati kutjupangku uninypa ini matjata tjuku mulapa mantangka tju nu, ka

uninypa panya paluru tjuku mularnguru pakara puṇu pulkalta ngarangi, kaya tjułpu tjutangku pitjala puṇu pala palula maṇngu palyara nyinangi. Nyara palu purunypa Godaku waltyja tjutaringkupai paluru tjananya mayatjangku kanyintjaku.”

20 Munu Jesulu piruku wangkangu tjanala, “Uwa, Godalu aŋangu tjuṭa mayatjangku waltyjanmara kanyintja ara nyaa purunypa ngaranyi? Wanyuna tjukurpa kutjupa wangka nyuranya nintintjikitjangku. **21** Panya minymangku yiitja tjukutjuku mai ulungka tjungura uritjingalpai, ka panya yiitja tjuku mulatu mai tal̄tulpai pulkaringkunyangka warungka pauntjaku. Nyara palu purunypa Godaku wałyta tjutaringkupai.” Alatji Jesulu tjanala wangkara utiningi.

Ala Utju

(Matthew-ku 7:13-14,21-23)

22 Ka Jesulu Jerusalemalakutu ankula ngururpa ngura tjukutjuku tjutangka munu pulka tjutangka kuļu aŋangu tjutangka Godaku tjukurpa wangkara nintiningi. **23** Ka kutjupangku palula tjapinu, “Mayatja, palu Godalu wanyu aŋangu maṇkurpa kutju wankarunkuku?”

24 Ka Jesulu wangkangu, “Godaku ngura wali pulka purunypa ngaranyi, ka ala utju ngaranyi aŋangu tjuṭa tjarpanytjaku. Kaya aŋangu tjuṭa mulapa ala pala palulakutu pitjaku arkara tjarpanytjikitja. Palu aŋangu kura palyalpai tjuṭa pitjanyangka Godalu wantiku

tjarpatjunkunytja wiyangku. Kaya mankurpa kutju pitjala aña pala utjuwanu tjarpaku Godala tjungu titutjara nyinanytjikitja. Palulan-guru nyura uti titutjara tjukaruru nyinama aña pala utjuwanu tjarpara Godala nyinanytjikitja. ²⁵ Ka wati waliku mayatjangku pakara tuwa patinnyangka nyura urilta ngarala tuwa pungku-pungkula walkura wangkaku, ‘Mayatja, alalalampa tuwa!’ Palu wati waliku mayatjangku nyurala wangkaku, ‘Ngayulu nyurampa ngurpa. Yaaltjinguru nyura pitjangu?’ ²⁶ Ka nyura wangkaku, ‘Panya nganaña nyuntula mirangka nyuntula tjungungku ngalkula tjkilpai, ka nyuntu kulu nganampa tawunungka tjarpara tjukurpa nintilpai.’ ²⁷ Palu paluru alatji wangkaku nyurala, ‘Wiya alatji, ngayulu nyurampa ngurpa. Araya ngayulanguru. Nyura kuralpai tjuta.’

²⁸ “Ka palulanguru nyuranya paira iyan-nyangka nyura urilta ngarala Aipuramanya, Isaacanya, Jacobanya tjananya Godala tjungu nyinanyangka nyakuku munu wati panya wangkatjara kutjupa tjuta kulu. Munu nyura Godalu tjananya mayatjangku kanyinnyangka nyakula pulkara tjituru-tjitururira ulaku panya nyura tjanala tjunguringkunytja wiyanguru. ²⁹ Kaya ngura uwankaranguru anangu Jew wiya tjuta mulapa pitjaku kakararanguru wiluraranguru alinytjaranguru munu ulpariranguru kulu, munuya paluru tjana pitjala Godaku walytja kutjupa tjutangka tjunguringkula nyinakatiku mai panya pulka pukulpa mulatu ngalkuntjikitja Godalu tjananya

uwankara mayatjangku kanyinnyangka.
 30 Ka kutjupa tjuta panya kuwari mala nyinanytja tjuta kuranyuriku, ka kuranyitja tjuta malaringkuku.”

Jesulu Iratanya Anantja

31 Ka tjintu kutjupa Paratji tjuta Jesulakutu pitjangu munuya wangkangu palula, “Nyuntu uti anama ngura nyangangka nyinanytja wiya, panya Iratalu nyuntunya ngurini iluntankunytjikitjangku.”

32 Ka Jesulu tjanala wangkangu, “Wiya panya Iratanya wati tuuka alatjitu. Kaya ankula palula wangka panya ngayulu tjintu nyanga kuwari mamu tjuta anangu tjutanguru paini, mununa anangu pikatjara tjuta kulu palyarungunu munu mungawinki kulu, mununa palulanguru tjintu mankurnguru palyara wiyalku warika uwankara.

33 “Palu ngayulu warika nyanga palunya palyani alatjitu kuwari nyanga, mununa mungawinki kulu, munu tjintu kutjupa kulu ngura nyanga palula. Panya ngura nyanga Jerusalemalaya Godaku wangkatjara tjuta ngañmanytju iluntanangi, munuya palu purunypatu ngayunya ngapartji iluntankuku ngura nyanga palulaṭu.”

Jesunya Jerusalemalanguru Tjituru-tjitururinytja *(Matthew-ku 23:37-39)*

34 Munu palulanguru Jesulu Jerusalemala nyinanytja tjutaku pulkarra ngalturingkula tjituru-tjitururira ulara wangkangi alatji,

“Ngaltutjara! Ngayulu nyurampa pulkara mukuringanyi nyanga Jerusalemala nyinanytja tjutaku. Palu iritinguru nyura Godaku wangkatjara tjuta rawangku iluntanangi munu panyaya wati tjukurtjara tjuta kulu pulingka atura iluntanangi panya Godalu ngura nyanga palulakutu iyantja tjuta. Kana rawa mulapa mukuringangi nyuranya ut

u
ra kanyintjikitja, panya tjulpu ngunytjungkunku kulunypa tjuta nyalpingka unngu ut

u
ra a^tunymara kanyilpai, palu puruny^tju. Palu nyura ngayunya wantingi alatjitu.

³⁵ “Ka palulanguru kuwari Godalu nyurampa timpula wantikatinyi, ka panya ultu alatjitu titutjara ngaraku. Ka kuwaringuru nyura ngayunya rawangku nyakunyta wiya. Palu ngula nyura ngayunya piruku nyakuku mununi nyara palula arangka nyura ngayunya walkura wangkaku alatji, ‘Awari! Wanyula Godanya mirawañira walkunma, panya nyanga palunya Mayatja Godalu iyantjatjanungku pulkara pukulmanu.’” Alatji Jesulu Jerusalemany ngurara tjutanguru tjituru-tjitururira wangkangi.

14

Jesulu Wati Pikitjara Palyarunguntja Tjirirpi Milmita

¹ Ka Saturday kutjupangka tjintu panya pakuwiyaringkupaingka Jesunya anu mai ngalkuntjikitja wati Paratji pulkaku walikutu. Kaya Paratji kutjupa tjutangku munu wati

Moseku tjukurpa nintilpai tjutangku kulu wali pala palula¹ tjunguringkula ngalkuningi, munuya Jesunya ilangku arura nyangangi. ² Panya wati kutju tjunta kutjara munu miña kutjara raa-raa pulkatjara Jesula kuranyu nyinangi.

³ Ka Jesulu palunya nyakula Paratji tjutangka munu wati Moseku tjukurpa nintilpai tjutangka kulu tjapinu wangkara, “Nganampa palya ngaranyi Saturday-ngka pikatjara palyarunguntjaku tjintu panya pakuwiyaringkupaingka, munta wantikula tjirirpi kutjupaku?” ⁴ Kaya uwankara alatjitu pilunpa nyinangi wangkanytja wiya.

Ka Jesulu pikatjara panya witinu munu palunya pika palyarungunu munu witura iyanu ngurakutu ankunytjaku. ⁵ Munu malangka Jesulu wangkangu anangu tjutangka, “Tjinguru nyuntumpa katja munta tjinguru puluka tjirirpi pakuwiyaringkupaingka wellangka punkara tjarpanyangkampa nyuntu palunya ilara walatjunkupai mungawinkiku paṭara wantinytja wiyangku.”

⁶ Kaya nyangatja kulira unngu kulinungi, “Uwa pala.” Munuya ngapartji wangkanytjikitjangku puṭu kulinungi, munuya wangka wiya alatjitu ngarangi.

Walytjangkunku Pulka Palyalwiyangku Wantima

⁷ Ka wali pala palula Jesulu nyangu anangu tjutangku tjarpara tjiya wiṛu nyinakatinytjikitjangku walytjangku ngurkantankunyangka

munu paluru tjanala tjukurpa aña kutjupatjara wangkangi alatji, ⁸ “Tjinguru kutjupangku nyuntunya mai pulkaku altinyangkampa pitjala tjiya wirungka ngurkantara kuranyu nyinakatiwiyangku wantima. Tjinguru anangu kutjupa nganmanyaju altingu mai pala palumpatu. Ka paluru tjinguru wati mayatja purunypa nyuntula waintara nguwanpa. ⁹ Ka panya nyuntunya maiku altintytjalu tjinguru pitjala nyuntula wangkaku, ‘Nyuntu pala nyinanytjitjangka wati nyangatja nyinatjura kuranyu munu nyuntu nyangangka nyinakati maña nguwanpa.’ Ka nyuntu paluru alatjingannyangka pulkara kuntuaringkuku munun pakara malarku nyinakatiku.

¹⁰ “Palu utin kutjupangku nyuntunya maiku altinyangkampa nganmanypa alatjtju ankula tjiya kutjupangka maña nyinama, kanta paluru nyuntunya maiku panya altintytjalu pitjala nyakula wangkaku, ‘Walytja wiru, pakara pitja munu tjiya nyanga wirungka kuranyu nyinakati! Kan kutjupa tjutangka kuranyulta nyinaku.

¹¹ “Palu nyuntunku walytjangku pulkanmankunyangkampanta maña tjunkuku, palu nyuntu walytjangku tjukutjuku kulinnyangkampanta kuranyu tjunkuku. Alatji Godalu palyalpai.”

¹² Munu Jesulu wangkangu wati panya palunya maiku altintytjanya panya, “Nyuntu mai pulka palyarampa altiwiyangku wantima, nyuntumpa kuña malanypa malpa tjuña, munu wati mani pulkatjara kuñu, munu nyuntula

itingka nyinanytja tjuṭa kułukułu, panya nyuntu altinyangkampa, tjana kułu ngula mai pulka palyantjatjanungku, nyuntunya ngapartji palu purunypaṭu altiku. ¹³ Palu mai pulka palyarampa aŋangu ngaltutjara tjuṭa, nyumpu tjuṭa munu lurpalpai tjuṭa kułu alti, munu kuru pati tjuṭa kułu. ¹⁴ Panya paluru tjana nyuntunya ngapartji puṭu ungkupai, kanta ngula Godalu nyuntunya ngapartji ungkula pukulmankuku tjirirpi małatjangka panya aŋangu Godaku walytja tjuṭa ngula ilunytjatjanu pakantjitjangka.”

*Mai Pulkaku Altintytja
(Matthew-ku 22:1-10)*

¹⁵ Ka Jesulu wangkara wiyarinkunyangka wati kutjupangku palula itingka nyinara wangkangu, “Ngula Godaku walytja tjuṭa palula tjunguringkula mai pulka ngalkuku Godalu tjananya mayatjangku kanyinnyangka, kaya palulanguru pukulpa mulapa nyinaku.”

¹⁶ Ka Jesulu palula ngapartji wangkangu tjukurpa ara kutjupatjara nyanga alatji, “Wati pulkangku aŋangu malpa tjuṭaku mai pulka palyantjikitja mukuringangi munu paluru tjanala ngañmanytju tjakultjunu ngula pitjanytjaku. ¹⁷ Ka mai panya ritiringkunyangka paluru wati palumpa warkaripai iyanu ankula nyara palunya tjananya altintytjaku wangkara, ‘Pitjaya! Mai uwankara palyara tjunkunytja riti ngarinyi.’

¹⁸ “Kaya uwankarangku kutjungku kutjungku wantintykitjangku wangkangi. Kutjungku

alatji wangkangu, ‘Ngayulu kuvari manta payamilanu, mununa ankula nyakunytjikitja mukuringanyi. Ka-puta nyuntumpa mayatjangka ma-wangka ngayulu pu tu pitjanytja.’

¹⁹ “Ka kutjupangku ngapartji wangkangu palula, ‘Ngayulu puluka kutjara mankurpa payamilanu malparara malparara mununa tjananya arkara warakamilantjikitja mukuringanyi. Ka-puta nyuntumpa mayatjangka ma-wangka ngayulu pu tu pitjanytja.’

²⁰ “Ka kutjupangku ngapartji wangkangu, ‘Ngayulu kuvari kutju kungkawa ra altingu mununa kuringka nyinanytjikitja mukuringanyi. Ka nyuntumpa panya mayatjangka matjakultjura ngayulu pu tu pitjanytja.’

²¹ “Ka wati panya warakangku malaku ankula tjana wangkanytjitja uwankara mayatjangka tjakultjunu. Ka paluru pulka mirpañarira wangkangu palula, ‘Wala pulka ara tawunukutu munu anangu ngaltutjara tjuta iwara pulka tjutangka munu tjukutjuku tjutangka ku lu nyakulampa tjananya altira ngalya-kati, nyumpu tjuta, kuru pati tjuta kulukulu munu lurpalpai tjuta ku lu.’

²² “Ka paluru mulapa tu ankula altira ngalya-katingu anangu ngaltutjara tjuta, munu palu languru wangkangu, ‘Mayatja, panya nyuntu wangkanytjitjangkaya pitjangu, palu ruuma angantja wiya tu ngaranyi.’

²³ “Ka mayatjangku panya piruku wangkangu wati panya warakangka, ‘Ara ilytjikutu munu

iwara kutjupa tjutanguru altira ngalya-kati ngayuku wali angantjaku. ²⁴ Ka anangu panya ngayulu ngañmanytju altintytjtja tjutangkuya puťu mai ngalkuku ngayula tjungungku.' " Alatji Jesulu tjukurpa tjanala wangkangi nintintjikitjangku panya paluru anangu tjutaku pulkara mukuringanyi palulakutu pitjala tjunguringkunytjaku.

*Palumpa Nintintja Nyinanytjaku
(Matthew-ku 10:37-38)*

²⁵ Kaya anangu tjuta mulapa Jesula tjungu anangi, ka paluru malakukutura tjanala wangkangu, ²⁶ "Kutjupa tjinguru ngayuku nintintja nyinanytjikitja mukuringkulampa uti ngayuku pulkara mukuringama munu palumpa mamaku, ngunytjuku, kuriku, tjitjiku, nyarumpaku, kuťaku munu palurunku kulu tjuku nguwanpa mukuringama. Panya paluru ngayuku waintara tjanampa pulkara mukuringkulampa puťu ngayuku nintintja nyinaku. ²⁷ Uwa, nyura ngayuku nintintja nyinanytjikitja mukuringkulampa uti titutjarangku ngayunya wañanma pakuringkuwiyangku ilunytjakutu-wangkara. Palu nyura tjinguru puňu kaťakutjarangka ilunytjikitja kulira nguluringkulampa nyura puťu ngayuku nintintja nyinaku.

²⁸ "Panya kutjupangku tjinguru wali wara palyantjikitja mukuringkulampa uti paluru ngañmanytju nyinakatira maniwarara kantamilanma nyakunytjikitjangku tjinguru mani pulka ngarinyi wali palunya

palyara wiyantjaku. ²⁹ Palu tjinguru paluru mani kantamilalwiyangku watarkungku waṭa-warara palyara tjunkulampa tjinguru paluru puṭu uwankara palyara wiyaliku mani wiyaringkunyangka. Ka ngatalpaṭu palyara wiyatja wiyatju wiyaringkuku, ka aŋangu tjutangku palunya nyakula ikaringkuku. ³⁰ Munuya wangkaku, ‘Wati nyangangku panya wali palyaningi, palu palyara wiyatja wiyatju, nyangatja kuwaripaṭu ngaranyi.’

³¹ “Munu tjukurpa pala palu purunypa kutjupa nintiringkunytjikitjangku kulila. Panya Mayatja pulkangku wati tjaultji tjuṭa pika pungkunytjaku katingi nampa nyangatja 10,000. Ka ankunyangka kutjupangku tjinguru pitjala wangkangu palula, ‘Kulila, nyaratja mayatja kutjupangku nyuranya ngapartji pika pungkunytjikitjangku ngalya-katinyi tjaultji tjuṭa mulapa nampa nyangatja 20,000 nyuntumpa tjaultjingka mun̩kara mulapa.’

“Ka nyangatja kulira mayatja panya paluru nyinakatingu munu kuliningi alatji, ‘Tjinguru nganaŋa tjananya pungkula wiyaliku, munta tjinguru wiya. Panya paluru tjanā tjuṭa mulatu nganananya pungkula wiyatjaku alatjiṭu.’ ³² Munu paluru tjananya pika pungkula wiyatjikitjangku puṭu kulirampa wati kutjupa mankurpa tjakulpa iyanu ankula tjananya ngaparikatira kalypangku wangkara markuntjaku tjaultji panya kutjupa tjuṭa parari kuwaripaṭu pitjanyangka.

³³ “Ka palu purunypa ngaranyi nyurampa, panya nyura ngayuku nintintja tjuṭa nyinanytjikitja

mukuringkulampa nyura uti pulkaṛa kulinma. Panya nyura kutjupa kutjupa uwankara wantira ngayuku pulkaṛa mukuringkula kutju ngayuku nintintja nyinaku.” Alatji Jesulu tjananya wangkangi.

*Tjaltu Mayu Wiyaringkunytja
(Matthew-ku 5:13; Markaku 9:50)*

³⁴ Munu piruku wangkangi tjukurpa kutjupa nintintjikitjangku alatji, “Panya tjaltu wiru mulapa ngaranyi, palu tjinguru tjaltu paluru mayu wiyaringkunyangkampa yaaltjingara piruku tjaltu paluru palyaringkupai mayu wiruringkunytjaku? ³⁵ Wiya tjaltu paluru mayu wiyaringkupai alatjitu, ka nyamparingkunyangka waṇipai. Ka nyura pina alangku kulirampa ngalya-kulinma tjukurpa nyanga ngayulu nyurala wangkanytja.”

15

Tjiipi Kawalirinytja Ngurira Malakungku Mantjintja

(Matthew-ku 18:12-14)

¹ Ka wati kamantaku mani mantjilpai tjuta munu wati kura kutjupa tjuta kuļu ilaringu Jesulu tjukurpa wangkanyangka kulintjikitja.

² Kaya Paratji tjutangku munu wati Moseku tjukurpa nintilpai tjutangku kuļu nyakunytjatjanungku mirpañ-mirpañtu wangkangi, “Wati nyangatja wati kura tjuta pitjanyangka tjanampa pukularipai, munu mai kuļu tjanala tjungungku ngalkupai.”

³ Ka Jesulu tjanala tjukurpa aña kutjupatjara wangkangu alatji, ⁴ “Tjinguru wati kutjungku tjipi tjuña kanyini 100, ka tjinguru kutju tjanalan-guru kawankatiku. Ka wati paluru yaaltjiriku? Paluru wanyu wantiku? Wiya, paluru 99 panya ukiri ngalkunyangka wantikatira ankula tjiipi panya palunya ngurilku. ⁵⁻⁶ Munu palunya nguriña nyakulampa paluru pulkara pukularira piningga tjunkula katiku ngurakutu. Munu paluru malpa tjutangka munu ila nyinanytja tjutangka kuñu wangkaku, ‘Tjunguringkulala pulkara pukulari! Panya ngayulu kutju kawankatinytja nguriña mantjinu.’ Alatji paluru pulkara pukulariku.

⁷ “Ka pala palu purunypa ngaranyi ngura nyara ilkaritjangka. Panya angelpa tjuña anangu palya tjutaku pukularipai, palu panya anangu kutjungku kura palyantjatjanu piiwiyingkula aruringkunyangkaya pulkara alatjitu pukularipai.”

Mani Pulka Kutju Kawalirinytja Nguriña Mantjintja

⁸ Munu palu purunypa piruku Jesulu tjukurpa kutjupa wangkangu alatji, “Tjinguru minymangku mani pulka tjuña 10-pa kanyintjatjanungku kutju walingka unngu kawalinkuku, munu paluru lampa tilira tilitjarangku wali unngu puluwangka purkara mulatu nguriña nguriña mantjilku. ⁹ Munu paluru mantjirña pulkara pukularira palumpa malpa tjutangka palula itingka nyinanytja tjutangka kuñu wangkaku, ‘Tjunguringkulala

pukularima, panya ngayulu mani kutju kawalinkunytjatjanungku kuwari ngurira mantjinu.' Alatji paluru pukulariku.

10 "Ka palu purunypa Godaku angelpa tjuta pulkara pukularipai wati kutjungku kura palyantjatjanu piiwiyaringkula Godalakutu malaku aruringkunyangka."

Mama Kutju Katja Kutjaraku Mukuringkunytja

11 Munu Jesulu piruku tjukurpa kutjupa tjanala wangkangu alatji, "Wati kutjungku katja kutjara kanyiningi. **12** Ka katja malatjangku wangkangu mamangka, 'Mama wanyuni ungama manta panya nyuntu kalkuntja palunya.' Ka mulapaṭu mamangku panya manta tjaranu pulanya ungkunytjikitjangku munu kutju ungu katja panya malatja.

13 "Ka palula małangka tjintu mañkurpa wiyaringkunyangka katja panya malatjangku palumpa manta tjalamilaṇu munu mani mantjira palumpa ngura wantikatira anu ngura kutjupakutu parari mulapa nyinanytjikitja. Munu ngura nyara palula paluru mani uwankara wiyanu ngunti pukularira. **14** Paluru panya pulka kanyintjatjanungku uwankara alatjiṇu wiyanu. Ka ngula ngura nyara palula ailuru pulkaringu ngura kutjupa uwankarangka kuļu. Ka paluru kutjupa kutjupa ngalkuntjikitjangku kanyintja wiya alatjiṇu nyinangi maralpa alatjiṇu.

15 "Munu paluru ngura nyara palula warķa nguriningi mani mantjintjikitjangku, ka wati

kutjungku pikipiki tjuṭa kanyilpaingku palunya mantjira iyaṇu kuka pikipiki tjuṭakutu tjananya mai ungkula atunymara kanyintjaku. ¹⁶ Ka paluru pulkara pałtjatjiratjarira pikipiki tjuṭaku mai kurakura nguwanpa ngalkuningi. Ka kutjupangku palunya mai ungkunytja wiya alatjiṭu.

¹⁷ “Ka paluru ngula kata palyaringkula kulinu, ‘Mulapa ngayulu ngunti palyaningi mununa kuwari pałtjatjiratjaringu. Ka panya ngayuku mamaku warka tjuṭangku uwankarangku mai pulka ngalkula paltja alatjiṭu nyinapai, palu ngayulu nyanga kuwari pałtjatjiratjaringu mununa nguwanpa ilunyi. ¹⁸ Utina ngura nyangatja wantikatima munu Mamalakutu malaku anama mununa palula wirkara wangkama alatji, “Mama, ngayulu mulapa kuraringkula Godanya kuraṇu munu nyuntunya kuļu kuraṇu. ¹⁹ Kanı kura pulka nyinanyangka katjanmankunytja wiyangku wantima. Palu nyuntuni wangka nyuntumpa wati warkaripai purunypa nyinanytjaku.” Alatjina ankula Mamala arkara wangkaku.’

²⁰ “Munu alatji kulintjatjanungku mulapatu paluru ngura panya palunya wantikatira pakara anu palumpa mamaku ngurakutu. Ka panya palumpa mama rawa ala-alā nyinangi malaku pitjanytjaku patara. Munu paluru kuwari-patu parari pitjanyangka nyakula ngurkantanu munu ngapari-ngapari palulakutu wirtjapakanu pulkara ngalturingkula munu palunya am-pura mitamita kutjara nyunytjuṇu palumpa pukularira.

21 “Ka palumpa katjangku palula wangkangu, ‘Mama, ngayulu kuraringkula mulapa Godanya kuraṇu nyuntunya kuļu. Kaṇi katjanmankunytja wiyangku wantima.’

22 “Palu alatji wangkanyangka palumpa mamangku palunya kulintja wiyangku wantingi munu palumpa warkaripai tjutangka wangkangu, ‘Warpungkulaya mantara wiru mantjira ngalya-kati, munuya palunya tjarpatjura munuya palula marangka ringi tjura munu tjinatjangka kuļu tjarpatjura. **23** Munuya kuka puluka kuļunypa kuļu kaṇpi pulka nganampa iluntara, kala tjunguringkula mai pulka ngalkula pulkara pukulari. **24** Panya ngayuku katja ilungu munu ilunytjatjanu małaku piṛuku wankaringu, panya paluru kawaliringu, palu paluru kawalirinytjatjanu małaku aruringu.’ Munuya palulanguru uwankara tjunguringkula pulkara pukularingi.

25 “Ka palumpa panya katja ngañmanyitja watarku alatjitu kaanangka ngarala warkaringi patu nguwanpa, munu paluru walikutu ilaringkula kutju kulinu tjana wangkatjingara tantjirinyangka. **26** Munu paluru wati warkaripai kutjupa altingu munu palula tjinapu, ‘Nyaaringanyiya pala unngu?’

27 “Ka wati panya warkangku palula wangkangu, ‘Nyuntumpa malanypa małaku aruringu, ka nyuntumpa mamangku puluka kuļunypa kaṇpi pulka iluntankunytjaku wangkangu ngananya pukularira ngalkuntjikitjangku, panya nyuntumpa malanypa małaku pitjangu ngurakutu wankaru alatjitu.’

28 Ka katja panya ngañmanyitjangku kulira palumpa malanyku pulkara kuraringkula mulyararingu munu wantingu wali unngu tjarpantja wiyangku.

“Ka palumpa mama pakanu urilkutu munu palunya nyakula palula kalypantara purkarangku wangkangi paluru kuļu tjarpala pukularintjaku. **29** Palu katjangku ngapartji palula wangkangu, ‘Wiya, panya ngayulu rawangku alatjitu nyuntula wanganarangku kulilpai nyuntu wangkanyangka mununa yiya tjuta mulapa nyuntumpa warkaringi, palu nyuntu ngayuku puluka kuļuny whole kañpi pulka iluntankunytjaku wangkanytja wiyangku wantingi ngayulu ngalkula pukularintjaku malpa tjuṭatjarangku. **30** Palu nyuntumpa katjangku manta nyuntu ungkunytjitja mapalkungku tjalamilara mani mantjira ankula wañira wiyanu kungkawara kura tjuṭangka munu ngula kutju małaku pitjangu nyuntulakutu. Ka nyuntu palumpa kutjuku puluka kañpi pulka iluntara pauntjaku wangkangu palumpa pukularira.’

31 “Ka mamangku katjangka wangkangu, ‘Katja, nyuntu panyan titutjara mulapa ngayula tjungu nyinapai, ka ngayulu kanyintja uwankara nyuntumpa ngaranyi. **32** Palyala pukularira kuka mai pulka ngalkunma panya nyuntumpa malanypa ilunytjatjanu małaku wankaringu, panya paluru kawankatintjatjanu małaku aruringu.’” Alatji Jesulu wangkara wiyingu.

16

Wati Mayatja Ngunti Kurantja

¹ Munu Jesulu piṟuku wangkangu palumpa nintintja tjutangka, “Wati kutjupa mani pulkatjara nyinangi, munu paluru wati kutjupa mayatja tjukutjuku tjunu palumpa uwankara atunymara kanyintjaku. Palu ngula wati panya mani pulkatjarangku kulinu tjana wangkanyangka munu nintiringu wati panya paluru tjunkunytjalu ngunti kurannyangka. ² Munu palunya altira wangkangu palula, ‘Ngayulu kulinu nyuntu ngayunya kampangkaṭu kurannyangka. Wanyunu nyuntu walkatjunkunytja uwankara nintila nyaanun ngayuku panya mani, panya nyuntu nyanga alatji palyara ngayuku war̄karinytja wiyaringkuku.’

³ “Ka wati panya mayatja tjukutjukungku palurunku kulinigi walytjangku, ‘Yaaltjin-galkuña? Panya ngayuku mayatjangkuṇi kuwari pailku war̄kanguru, kaṇa war̄ka wiyangku paltjatjiratjarira upangku manta puṭu tjawalku mununatju kutjupangka ngatjintjaku kuntaringanyi. ⁴ Palu tjinguruna nganmanytju kutjupa kutjupa palyalku, kantiṇi palya war̄kanguru paira iyalku. Kan̄iya an̄angu kutjupa tjutangku ngayunya altiku munuṇiya tjanampa walingka kanyilku.’

⁵ “Munu wati panya mayatja tjukutjukungku altingu wati maṇkurpa, panya paluru tjana

ngañmanytju unytjungku kutjupa kutjupa mantjinu mayatja pulkanguru munuya palunya ngapartji małakungku ungkunytjaku ngarangi. Ka wati panya paluru tjananya altira kutju kutju tjarpatjura wangkangi. Munu paluru wati kutjungka tjapinu, ‘Nyuntu ngayuku mayatja nyaa ngapartji ungkunytjaku ngaranyi?’

⁶ “Ka paluru wangkangu, ‘Ngayulu palunya piti pulka tjuta uwilatjara 18 ungkunytjaku ngaranyi.’

“Ka wati panya mayatja tjukutjukungku palula wangkangu, ‘Wiya palya tjarula, munu nyiringka walkatjura piti pułka 9 kutju małakungku ungkunytjikitjangku.’

⁷ “Munu paluru piruku wati kutjupangka tjapinu, ‘Nyuntu ngayuku mayatja nyaa ngapartji ungkunytjaku ngaranyi?’

“Ka wati panya paluru wangkangu palula, ‘Ngayulu palunya yakutja mai uñinypatjara 1,000 ungkunytjaku ngaranyi.’

“Ka wati panya mayatja tjukutjukungku palula wangkangu, ‘Wiya palya tjarula, munu nyiringka walkatjura yakutja 800 kutju małakungku ungkunytjikitjangku.’

⁸ “Ka ngula wati panya mani pulkatjarangku kulinu wati panya paluru alatji palyannyangka, munu palunya mirawañingu kulira, ‘Munta, wati nyangangku ayinayiningku palyanu anangu tjuñangku palunya ngapartji ngula altinytjaku munu tjanampa ngurangka palunya kanyintjaku.’ ”

Ka Jesulu tjukurpa nyanga palunya wangkara wiyaringkula palumpa nintintja tjuñangka utinu

alatji wangkara, “Uwa, mulapa panya aŋangu mantatja kulilpai tjutangkuyanku ayinayiningku palyalpai mantangka nyanga pukulpa nyinanytjikitjangku, palu Godaku walytja tjuta palu puruny whole wiya, panya tjana ngura nyara ilkaritjangka pukulpa nyinanytjikitjangku kutju kulilpai munkaritja waintara.”

⁹ Munu palulanguru tjananya wangkangu, “Palu ngayulu nyurala alatji wangkanyi. Uti nyura mani munu ulytja kutjupa kutjupa tjuta nyura kanyintjatjanungku munytjangku ma-ungama aŋangu kutjupa tjuta tjana pukularintjaku munu nyurampa malparingkunytjaku. Ka palulanguru nyura munu nyura kanyintja uwankara wiyaringkunyangka Godalu nyuranya mantjira ngura ilkaritjangka pukultu tjunkuku palula tjungu titutjara nyinanytjaku.

¹⁰ “Ka nyura tjukutjuku tjuta-warara tjukarurungku kanyintjatjanungku pulka tjuta kuļu tjukarurungku kanyilkku, kaya nyurampa nyakula pukulariku alatjitu. Palu nyura tjukutjuku tjuta wirura kanyintja wiyangku wantirampa pulka tjuta kuļu puļu wirura kanyilkku. ¹¹ Ka nyura mantatja kutjupa kutjupa tjuta puļu tjukarurungku kanyirampa Godalu wanyu nyuranya wiru tjuta palyanyku kanyintjaku ungkuku? Wiya alatjitu. ¹² Tjinguru kutjupangku nyuranya wangkara wantikatinyi palumpa kutjupa kutjupa nyura atunymara kanyintjaku, ka nyura puļu tjukarurungku wirura kanyinnyangkampa paluru wanyu

nyuranya ungkuku walytjangku kanyintjaku?
Wiya alatjitu.

Tjukurpa Kutjupa Tjuṭa Jesulu Wangkanytja

¹³ “Panya aŋangu kutju mayatja kutjarangka puṭu warkaripai. Paluru tjinguru kutjungka wangaŋarangku kulilku munu kutjupangka kulintja wiyangku wantira tungunpungkuku. Munu tjinguru kutjuku pulkara pukularira kutjupaku puṭu pukularira palumpa kuraringkuku. Ka pala palu purunyapa nyura tjinguru maniku pukularirampa Godaku puṭu pukulariku. Panya nyura puṭu kutjara tjungura kulini Godanya munu mani kulu. Palu uti nyura Godanya kutju pulkara kulinma munu mani wantima.”

*Jesulu Tjukurpa Kutjupa Piruku Wangkanytja
(Matthew-ku 11:12-13; 5:31-32; Markaku 10:11-12)*

¹⁴ Kaya wati Paratji tjutangku tjukurpa nyanganpa wangkanyangka ilangku kuliningi munuya Jesunya anaṛa palumpa ikaringangi panya tjanaya maniku kutju pułkara pukularipai.

¹⁵ Palu Jesulu tjanala wangkangu, “Nyuranku walytjangku kutju wiru kulilpai aŋangu kutjupa tjutangka miṛangka. Palu Godanya nyurampa ninti pala nyura unngu kulintjtjaku. Aŋangu tjutangku nyuranya nyakula mirawanipai, palu Godalu nyuranya unngu nyakula nyurampa pukularinytja wiya alatjitu.

¹⁶ “Tjukurpa panya Godalu Mosenya ungkunytjtja munu wangkatjara tjutangku kulu walkatjunkunytjtja rawa mulapa ngaṛangi

añangu tjuṭangku wangañarangku kulintjaku. Palu panya mungaṭu Johnnga pitjangu munu añañangu tjuṭangka tjakultjunangi tjukurpa panya Godalu añañangu tjuṭa walytjanmara mayatjangku kanyintjitja, kaña ngayulu kuļu palu purunypaṭu tjakultjunangi. Kaya kuwari añañangu uwankara pulkara arkanı Godala tjunguringkunytjikitjangku paluru tjananya walytjanmara mayatjangku kanyintjaku.¹⁷ Palu kulilaya, panya manta ilkarı ngařanyangkampa tjukurpa uwankara Godalu Mosenya tjananya ungkunytja tjuṭa titutjara alatjitu ngaraku nyura rawangku wangañarangku kuļira palyantjaku, tjukurpa pulka tjuṭa munu tjukutjuku tjuṭa kuļu.

¹⁸ “Palu kulila nyangatja! Watingku tjin-guru kuri wantira minyma kutjupa altirampa kura pulka palyani. Ka palu purunypaṭu tjin-guru wati kutjupangku minyma panya kuringku wantinytjanya altirampa paluru kuļu kura pulka palyani.”

Wati Mani Pulkatjara Munu Wati Ngaltutjara

¹⁹ Ka Jesulu wangkangu, “Wati kutjupa nyinangi mani pulkatjara munu paluru rawa alatjitu mantara wiru tjuṭangka tjarpapai munu walı wirungka nyinara mai pulka ngalkupai tjirirpi winkingka.²⁰ Ka wati kutjupa ngaltutjara nyinangi pika purtju winkitjara ini Lazarusanya. Kaya palunya katira tjunkupai wati panya mani pulkatjaraku kaitangka itingka nyinara ngatjintjaku.²¹ Munu paluru mukuringangi wati panya mani pulkatjaraku taipulanguru mai lampi punkannyangka

ngalkula paltjaringkunytjikitja. Kaya tjitutja tjutangku pitjala wati panya palunya pika tjuta anytjulpai. ²² Ka ngula Lazarusanya ilungu. Kaya angelpa tjutangku palunya katira Aipuramala itingka tjunu palula tjungu nyinanytjaku.

“Ka wati panya mani pulkatjara kuлу ilungu. Kaya palumpa malpa tjutangku palunya tjuнutjunu. ²³ Ka paluru ngura kurakutu anu, munu nyara palula warungka titutjara kampangi pika pulka mulapa. Munu paluru ira-nyakula nyangu Aipuramanya parari mulapa nyinanyangka munu Lazarusanya kuлу nyangu palula itingka nyinanyangka. ²⁴ Munu paluru mirara wangkangu, ‘Mama Aipurama! Ngalturiwatju munutju Lazarusanya ngalyaiyala paluru ngayulakutu pitjala minangka mara tjalatjunkula ngayunya tjalinypa pampura purkantjaku. Pikaña pulkaringu warungka nyanga nyinara nyinara.’

²⁵ “Palu Aipuramalu palula ngapartji wangkangu, ‘Katja, nyuntun kulini? Panya nyuntu mantangka nyinaran wiru tjutatjara nyinangi. Ka wati nyanga Lazarusanya ngaltutjara nyinangi kura tjutatjara kutju. Palu paluru kuwari pukulpa mulapa nyinanyi ngura nyangangka. Kan kuwari nyuntu ngapartji pika pulkatjara nyinanyi. ²⁶ Palu kulila ngati pulka mulapa ngaranyi nyuntula ngalila nyanga ngururpa. Ka nyanganguru kutjupa putu ma-itipiriku nyuntunya alpamilantjikitja. Ka palangka nyinapai tjuta puту ngalya-itipiriku nganañalakutu pitjanytjikitja.’

27 “Ka wati panya mani pul̄katjarangku wangkangu palula, ‘Palu wirungku wanyu Lazarusanya wati-iyala ngayuku mamaku wal̄ikutu panya mantangka nyinanytja tjutakutu.

28 Panya ngayuku malanypa 5 nyinanyi nyara palula paluruwi tjananya wangkara ngulutjingala ngura nyanga kurakutu pitjanytjaku-tawara.’

29 “Palu Aipur̄amalu wangkangu palula ngapartji, ‘Tjana panya tjukurpa pul̄ka tjūta Mosenya ungkunytjtja kanyini munuya wangkatjara tjutangku walkatjunkunytja kūlu kanyini. Utı tjananya nyakula wangkara ngan̄manyapa nintiringama munu nintingkulta kulira nguluringama.’

30 “Ka paluru wangkangu, ‘Wiya mama Aipur̄ama, tjananya Moseku tjanampa tjukurku putu nguwanpa mulamularingkupai. Palu tjinguru wati kutjupangku, tjinguru Lazarusalu, ilunytjatjanu pakantjatjanungku tjanala ankula wangkaku, kaya palunya nyakula paluru wangkanyangka kulira mulamularingama munuya kura palyantjatjanu piiwiyingkula Godalakutu malaku aruringama.’

31 “Palu Aipur̄amalu wangkangu palula, ‘Wiya, panya nyuntumpa malanypa tjutangkuya Moseku tjanampa tjukurpa tjūta kulira wantirampa palu purunytjutu kutjupangku ilunytjatjanungku pakara tjanala wangkanyangka kulira mulamularingkunytja wiyangkuwantiku.’” Alatji Jesulu tjanala wangkangi.

17

*Jesuku Walytja Tjuṭa Kurantja Wiyangku
Wantinytjaku*

(Matthew-ku 18:6-7,21,22; Markaku 9:42)

¹⁻² Ka Jesulu wangkangu palumpa nintintja tjutangka, "Uwa, mantangka nyanga nyinara anangu tjutangku Godala tungunpungkula kura tjuṭa palyalpai. Ka kutjupa tjutangku Godala tungunpungkula anangu kutjupa tjuṭa wituwitulpai tjana purunytpu kura palyantjaku. Palu anangu nyara palumpa tjanampa pika pulka mulapa ngaraku ngunti wituwitunyangka. Kulilaya! Tjinguru watingku anangu kutjupangka liringka puli pulka tjungura karpiṛa palunya puli winki uru ngaṭingka wañiku, ka alatji wiru wiya, kura alatjitu. Palu tjinguru tjiti ngayuku mulamularingkupai nyinanyi, ka anangu kutjupangku palunya wituwitulku kura palyantjaku, ka alatji wiru wiya kura pulka mulapa nyara urungka wañinytjjangka munkara mulapa. Panya pika pulka mulapa utiringkuku anangu nyara palumpa paluru tjiti tjukutjuku nyanga purunypa ngayula tungunpungkunytjaku palyannyangka. ³ Kayanku nyura pulkara atunymanama.

"Palu tjinguru nyuntumpa kuṭangku nyuntunya kurannyangkampa palula utira tjakultjunama panya paluru nyuntunya kurantja. Ka tjinguru paluru kura palyantjatjanu piiwiyarungkunyangkampa nyuntu palumpa kalyparingama. ⁴ Palu tjinguru nyuntumpa kuṭangku tjintu kutju

kalala wara nyuntunya tjuta-arangku kuralku munu kurantjatjanu paluru tjuta-aratu malaku pitjaku kuntaringkula nyuntula wangkara kalyparingkunytjikitja, ka nyuntu uti tjuta-arangku palunya kalypangku kulira wantima.”

Rapa Mulararinytjaku

⁵ Kaya Jesulu iyantja tjutangku palula wangkangu, “Mayatja, nintinmalanya Godaku rapa mulararinytjaku.”

⁶ Ka Jesulu wangkangu, “Wiya, nyura tjinguru kulini Godaku rapa pulkaringkula kutju nyura pulka palyantjikitjangku. Palu wanyuya uninypa tjukutjuku kulila. Panya mantangka tjunkunyangka uninypa paluru pakara puñu pulkaringkupai, ka palu purunypa nyura Godaku tjukutjuku mulamularingkulampa nyura puñu nyanga pulkangka wangkaku milku winki pakara ankula uru pulkangka ngururpa ngaranytjaku. Ka mulapatu puñu paluru ankuku nyura witunnyangka.”

Kanany-kananyarinytja Wiya Mayatjaku Warkarima

⁷ Ka Jesulu piruku tjanala tjukurpa kutjupa wangkangi wati warkatjara alatji, “Tjinguru wati kutjupangku wati warkaripai kanyini. Ka tjinguru paluru urilta warkaripai munu manta runyulpai munta tjinguru paluru tjiipi tjuta atunymankupai, munu paluru tjinguru warkatjanu wiyaringkula ngalya-tjarpaku. Ka tjarpangka palumpa mayatjangku palula nyaa wangkaku? Tjinguru alatji wangkaku,

‘Pitjala nyinakatira mai ngalkula.’⁸ Wiya, wati pala palula paluru alatji wangkaku, ‘Kukatju paula mai kulu munu mantara kutjupangka tjarpura mai mina kulu ngalyakati ngayulu ngalkula tjikintjaku. Munun malangka ngayulu ngalkula wiyaringkunyaŋka nyuntunku ngapartji mai walytjangku ngalkula.’⁹ Ka wati panya warkaripaingku uwankara wanganarangku kulira palyannyangka mayatjangku wanyu palunya wirunmankuku? Wiya, panya palumpa ngaranyi alatjitu mayatjangku witunnyangka palyantjaku.

¹⁰ “Ka palu purunytju nyura kulu uti Godalu wangkanytja uwankara palyara wiyarampa palula alatji wangkama, ‘Nganana nyuntumpa warkaripai tjuta kutju, ka palya nyuntu nganañanya wangkara wirunmankuny^tja wiyangku wantinyi, panya nganana nyuntu wituntjtita tjuta kutju palyaningi.’” Alatji Jesulu wangkangi palumpa nintintja tjuñangka tjana Godalu wituntjtita tjuta wanganarangku kulira palyantjaku.

Jesulu Wati Miri Pikatjara Tjuta Palyarunguntja

¹¹ Ka Jesunya tjana Jerusalemalakutu mapakañu munuya Galileela pulala Tjamiriyala ngururwanu anangi. ¹² Munuya wirkanu ngura tawunu kutjupangka tjukutjukungka. Kaya wati 10 miri pika pulkatjara tjuta nyinangi nyara palula wa- tjukutjukungka
 mañtalpa. Munuya Jesunya pitjanyangka nyakula ngaparikatingu

palulakutu. Palu tjana puṭu ilaringangi palulakutu, panya tjaka aŋangu miri pikatjara puṭu tjunguringkupai aŋangu palya tjutangka. ¹³ Munuya paṭunguru mirara palula wangkangu, “Mayatja Jesu! Ngalturiwalampa!”

¹⁴ Ka Jesulu tjananya nyakula wangkangu, “Ma-pitjaya walikutu munuyanku ankula nintila wati tjukurtjara tjutangka nyuranya miri nyakunytjaku.” Kaya mulapatu anu munuya ngururpa palyaringu.

¹⁵ Ka kutjungku palurunku palyaringkunytja nyakula małaku aruringu Jesulakutu munu wangka katungku mirara Godanya walkunu. ¹⁶ Munu pulkara pukularira Jesula tjinangka itingka kuranyu watungararakatira palunya walkunu. Wati nyanga paluru malikitja Tjamiriyanya ngurara, Jew wiya.

¹⁷ Ka Jesulu tjapinu palula, “Panya wati 10 kuwari palyaringu, ka yaaltji 9 kutjupa?” ¹⁸ Munu palulanguru palumpa nintintja tjutangka wangkangu, “Nyangatja wati Tjamiriyanya ngurara kutju małaku aruringu wati malikitja Godanya pukularira walkuntjikitja.” ¹⁹ Munu Jesulu piρku palula wangkangu, “Palya, pakara pukularira ara! Panya nyuntu ngayuku mulamularingkunytjatjanu palyaringu alatjiṭu.”

*Godanya Mayatja Pulka Ngananala Ngaranyi
(Matthew-ku 24:23-28,37-41)*

²⁰ Kaya Paratji tjutangku Jesula tjapinu, “Yaalaṛa Godalu pitjala mantangka nyanga

añangu tjuta walytjanmara mayatjangku kanyilku?"

Ka Jesulu tjanala wangkangu, "Wiya, puťu nyura uti nyanganyi Godalu añangu tjuta walytjanmara mayatjangku kanyintja, panya paluru mayatja mantatja purunypa pitjala palyantja wiya. ²¹ Añangungku puťu wangkaku, 'Nyawa! Nyangatja kuwari Godalu pitjala mayatjangku kanyini añangu nyanganpa.' Munta tjinguru wangkaku, 'Nyaratjampal!' Palu wiya, panya Godanya ngañmanypa pitjala mayatja pułka nyurala ngurur-ngururpa ngaranyi nyurala unngu."

²² Munu Jesulu piruku wangkangu palumpa nintintja tjutangka, "Ngula, pika kutjupa kutjupa tjuta utiringkunyangka nyura Watiku Katjaku pułkarä mukuringkuku ngayulu warpungkula pitjala wankantjaku, palu puťu nyura palunya nyakuku. ²³ Ka nyara palula arangka añangu kutjupa tjutangku nyurala wangkaku, 'Nyawa Mayatjanya nyaratjampal!' Ka kutjupa tjutangku wangkaku, 'Wiya, nyangatjampal!' Palu alatji wangkanyangkaya kulira wantima, munuya ngayuku ngurintjikitjangku tjanala tjunguringkunyta wiyangku wantima. ²⁴ Panya ngayulu Watiku Katjanya ngula małaku pitjala mapalku utiringkuku añangu uwankarangka manta winkitjangku uti nyakunytyaku. Panya wanangařangku pinpara utilpai manta winki, palu purunypa ngayulu utiringkuku. ²⁵ Palu ngayulu ngañmanypa pikatjararingkuku, kaya añangu mantatja tjutangku ngayunya kurara pungkuku. ²⁶ Panya ngayulu pitjanytja-arangka

tjirirpi panya Noah-nya tjana iriti nyinanytjitja purunypa ngaraku. ²⁷ Panya nyara palula arangka uru pulkangka kuwaripangka anangu tjuṭa watarku nyinangi, munuya mai kuka ngalkuningi, kapi waina kuļu tjikiningi, munuya wati tjutangku kungka tjuṭa altingi. Alatji-alatjiṭuya nyinangi watarku, ka panya Noah-nya tjana palumpa walytja tjuṭa kuļu uru pulkangkatawara pautangka tjarpangu, ka panya uru pulkangku pakara katuringkula anangu kutjupa uwankara iluntanu.*

²⁸ “Ka palu purunypa ngula ngaraku ngayulu małaku pitjanyangka. Panya Lotanya tjana iriti nyinanytja-ara purunypa ngura panya Tjatamala. Panya nyara palula arangka anangu Tjatamanya ngurara tjuṭa watarku alatjiṭu nyinangi munuya ngalkula tjikiningi, munuya kutjupa tjuṭa tjalamilaningi, munuya mai tjuṭa kuļu pakaltjinganingi, munuya wali tjuṭa kuļu palyaningu. ²⁹ Ka panya tjintu kutjupa Lotalu tjana palumpa walytja tjutangku ngura pala Tjatamanya wantikatingu, ka tjana ankula ma-paćuringkunyangka Godalu waru pulka ilkaręnguru iyanu Tjatamalakutu, ka anangu uwankara ilungu malaringkula nyinanytja tjuṭa. ³⁰ Ka nyara palu purunypa ngula anangu tjuṭa watarku alatjiṭu nyinaku ngayulu Watiku Katjanya witulya pulka pitjanyangka. ³¹ Nyara palula arangka tjinguru wati wali katu nyinanyi munu uti paluru ukalingkula wali unngu palumpa ulytja mantjintjikitja tjarpantja wiya mapalku

* **17:27** Genesis 7:6

wirtjapakanma. Ka palu purunypa wati kutjupa tjinguru urilta kaanangka warkarinyi munu uti paluru małaku ngurakutu ulytjakitja ankunytja wiya mapalkuṭu wirtjapakanma. ³² Minyma panyatjaya kulinma, Lotaku panya kuri, palu purunypa wiyaringkunytjaktawara.* ³³ Añangu kutjupangku tjinguru alatji kulilku, ‘Wanyu kañatju ngayulu walytjangku atunyamanama mantangka nyanga rawa wanka nyinanytjikitjangku.’ Palu alatji kulira paluru Godanya wantinyi, ka Godalu palunya ngula ilunyangka puṭu wankani palula tjunguringkula titutjara nyinanytjaku. Ka añangu kutjupangku tjinguru alatji kulilku, ‘Wanyuna nguluringkuwiyangku Godanya titutjarangku wañanma, kañi palya kutjupangku ngayunya iluntankuku.’ Ka alatji kulinnyangka Godalu ngula ilunyangka palunya wankara pakaltjingalku palula tjingu titutjara wanka nyinanytjaku.

³⁴ “Ka ngula ngayulu mantakutu małaku pitjanyangka munga pala palula añangu kutjara tjinguru piita kutjungka kunkunpa ngarinyi, kaña kutju mantjilku mununa kutju wantikatiku. ³⁵⁻³⁶ Ka palu purunypa ngura kutjupangka minyma kutjarangku tjinguru mai ukiringuru uñinypa rungkañi, kaña tjinguru

* ^{17:32} Lotaku kuri panya Tjatamalanguru ma-pitjala Godala tungunpungu munu pinkurarara nyangu waru pulka punkanyangka munu palulanguru purkaringkula tjalturingu alatjitu. Nyawa Genesis 19:26.

kutju mantjilku mununa kutju wantikatiku.”* Alatji Jesulu tjanala wangkangi palumpa nintintja tjutangka.

³⁷ Kaya tjapinu Jesula, “Mayatja, palu ngura yaaltjingka nyanga paluru tjana alatjiriku?”

Ka Jesulu tjanala wangkangu, “Wanyu tjulpu panya waławuru kulila! Panya kuka ilura ngarinyangka waławuru tjuta kaputuripai. Kala nyakula tjukarurungku kulilpai. Palu purunyapa nyura ngayunya malaku pitjanyangka nyakula tjukarurungku ngurkantankuku.”

18

Minyma Wanakala Munu Wati Ngurkantankupai

¹ Munu Jesulu tjukurpa ara kutjupatjara tjanala wangkangi paluru tjana kulira rawangku Godala tjapintjaku pakuringkunytja wiyangku.

² Alatji paluru wangkangu, “Tawunu kutjupangka wati mayatja kutjupa nyinangi ngurkantankupai. Munu nyara paluru Godaku munu anangu tjutaku kulu nguluringkupai wiya tjana palunya kuranmankunytjaku. ³ Ka tawunu nyara kutju palulatu minyma wanakala nyinangi, ka anangu kutjupangku palumpa kutjupa kutjupa kutitjura kanyiningi. Ka minyma

* **17:35-36** Wati kutjupangku kunyu verse 36 walkatjunu munu mala tjungunu Luke-aku tjukurta alatji *Ka ngura kutjupangka wati kutjara tjinguru urilta warkarinyi, kana tjinguru kutju mantjilku mununa kutju wantikatiku.*

paluru rawa pitjapai wati panya ngurkantankupailakutu munu palula wangkapai, ‘Wanyunu alpamilala, munu anangu panya palunya wangka ngayunya malakungku ungkunytjaku!’

⁴ “Ka wati paluru rawangku alpamilantja wiyangku wantingi, munu rawa mulatu kulira wantinytjatjanungku paluru ngula kulinu kutjungku alatji, ‘Ngayulu Godaku nguluringkupai wiya, mununa anangu tjutangku wangkanytja kulu kulira wantipai.

⁵ Palu minyma nyanga wanakalangkuni rawangku ngayunya pitjala tjapilpai. Kana palya palunya kuwari alpamilalku panya ngayulu wantinyangkampa tjinguru paluru rawa alatjiitu ngayulakutu pitjama mununi rawangku uulinama mununi pakunma.’ Alatji wati panya ngurkantankupaingku kuliningi.”

⁶ Munu palulanguru Jesulu tjanala wangkangu, “Wati panya palunyaya kulinma! Panya paluru minyma palunyaya rawangku wantingi mapalkungku alpamilantja wiyangku. Munu palulanguru nyaa wangkangu? ⁷ Ka Godanya wanyu palu purunypa nyinanyi? Panya Godaku waltyja tjutangku palula rawangku ulara tjapilpai mungangka kalala kulu paluru tjananya alpamilantjaku. Ka paluru wanyu tjananya kulira wantipai rawangku alpamilantja wiyangku? ⁸ Wiya, Godalu palunya tjananya kulira mapalkungku alatjiitu alpamilalpai palumpa anangu tjuta. Ka ngula ngayulu Watiku Katjangku malaku pitjala anangu tjuta yaaltji-yaaltji nyinanyangka nyakuku mantangka nyanga?

Wanyu ngayulu aŋangu tjuṭa ngayuku mulamularingkunytjatjanu rapa mulapa nyinanyangka nyakuku?”

Godala Tjukaruru Nyinanytja

⁹ Munu Jesulu piruku tjanala tjukurpa ara kutjupatjara tjakultjunangi, panya aŋangu kutjupa tjuṭangkuyanku walytjangku mirawanira palyanmankupai munuya kutjupa tjuṭa kuranmankupai. Ka Jesulu tjukurpa nyangatja tjanala wangkangu alatji, ¹⁰ “Tjin̄tu kutjupa wati kutjara anu timpulakutu Godala tjapintjikitja, kutju Paratji, ka kutjupa kamantaku mani mantjilpai. ¹¹ Ka wati panya Paratji patu ngarangi, wati panya mani mantjilpaingka ila wiya, munu paluru Godala kanany-kananytju mara katuringkula tjapira alatji wangkangu,

‘Mama God, ngayulu nyuntumpa pukularinyi nyuntu ngayunya wirura kanyinnyangka, panya ngayulu manyu wiya aŋangu nyanga kutjupa tjuṭa purunypa wiya. Mununa wati kutjupa tjuṭa purunytyu kutitjura ngunti kuralpai wiya, mununa kuri walytjatjarangka kutju ngaripai kampangkaṭu ngarinytja wiya. Mununa nyuntumpa pukularinyi, panya nyuntu ngayunya tjukaruru nyinanytjaku palyaŋu wati nyanga mani mantjilpai purunypa wiya. ¹² Panya ngayulu tjin̄tu mankurpa mai kuka kuļu ngalkupai mununa tjin̄tu kutjupa wantipai mai kuka kuļu ngalkuntja wiyangku. Munu panya

wärkarinytjatjanungku mani mantjira tjukutjuku tjarara nyuntunya rawangku ungkupai Moselu wangkanytjitjangka.'

¹³ Ka wati panya mani mantjilpaingku kuntaringkula paṭunguru ngarala palurunku kurunpa tjituru-tjitururira mara pilpirta tjunkula wangkangu,

'God, ngalturiwatju panya ngayulu kura rawangku palyaningi.'

Alatji paluru piiwiaringkula Godala tjapinu."

¹⁴ Munu palulanguru Jesulu tjanala wangkangu, "Wati panya kutjara tjapira wiyaringkula ngurakutu anu. Palu Godalu wati kutju palyanmanu palumpa pukularira wati panya mani mantjilpaintja, munu wati panya Paratjiku pukularinytja wiya alatjitu. Ka tjukurpa nyanga palulanguru nyura uti kulinma walytjangku mirawañinytja wiyangku wantinytjikitjangku. Panya anangungku walytjangku mirawañinyangkampa Godalu palunya tjukutjukulku. Palu tjinguru paluru walytjangku tjukutjukunmankunyangkampa Godalu palunya mirawañira pulkanmankuku kutjupa tjutangka waintara."

Jesulu Tjitji Tjukutjuku Purunyarinytjaku Wangkanytja

(Matthew-ku 19:13-15; Markaku 10:13-16)

¹⁵ Kaya anangu kutjupa tjutangku tjitji tjukutjuku tjuta Jesulakutu ngalya-katingi mara tjunkula wangkara pukulmanytjaku. Kaya palumpa nintintja tjutangku katinyangka nyakula tjananya painingi. ¹⁶ Palu Jesulu tjitji

panya tjukutjuku tjuṭa altingu palulakutu pitjanytjaku, munu wangkangu palumpa nintintja tjuṭangka, “Tjitji tjukutjuku tjuṭa ngayulakutu pitjanyangka nyakulaya paintja wiyangku wantima! Panya aŋangu tjuṭa tjitji nyanga tjukutjuku tjuṭa purunypa nyinanyangkampa Godalu tjananya mayatja pulkangku walytjanmara kanyilku. ¹⁷ Kaña tjukarurungku nyurala wangkanyi, panya nyura tjitji nyanga purunyntju Godanya wangaŋarangku kulinnyangka kutju Godalu nyuranya mayatjangku walytjanmara titutjarangku kanyilku. Palu nyura wantinyangka paluru nyuranya wantiku.”

*Wati Mayatja Kutjupa Ulytja Pulkatjara
(Matthew-ku 19:16-30; Markaku 10:17-31)*

¹⁸ Ka wati wali inmatjaku mayatjangku palula tjapinu, “Nintilpai, nyuntun wiru mulapa! Wanyuni tjakultjura, nyaalkuṇa Godala tjunguringkula wanka titutjara nyinanytjikitjangku?”
¹⁹ Ka Jesulu palula wangkangu, “Nyaakuṇin wirunmananyi? Kutjupa wiru mulapa nyinanytja wiya, Godanya kutju wiru mulapa.
²⁰ Palu nyuntu panya ninti Godalu wituntjtja tjutaku. Panya paluru alatji wangkangu kuri walytjatjarangka ngarinytja wiyangku wantima, miri pungkuwiyangku wantima, walytjatjara kutitjunkuwiyangku wantima, aŋangu kutjupa ngunti ngukara wangkawiyangku wantima, munu ngunytyungka mamangka wangaŋarangku kulinma.”

21 Ka wati paluru wangkangu, “Uwa ngayulu tjitjingkulpi tjukurpa nyanga palunya tjananya uwankara wangañarangku kulinungi.”

22 Ka alatji wangkanyangka Jesulu kulinu munu palula wangkangu, “Palu nyuntu kutjuku watarkuringu, nyuntu panya kanyintja uwankaraku. Utu nyuntu palunya tjananya manikitjangku tjalamilanma munu mani mantjira ngaltutjara tjuṭa para-ungama mununi palulanguru pitjala ngayunyalta wañanma. Munun nyuntu nyara palulanguru ngula ilkaringga wiru mulapalta mantjilku.”

23 Palu wati paluru alatji wangkanyangka kulira pulkara tjituru-tjitururingu, panya paluru mani ulytja kutjupa kutjupa pulkatjara alatjiṭu nyinangi, munu palunya tjananya walytjangku kanyintjikitja mukuringangi.

24 Ka Jesulu palunya tjituru-tjitururingyangka nyangu munu palulanguru wangkangu, “Nyangatja wituwitu mulapa ngaranyi aŋangu mani munu ulytja pulkatjara tjuṭaku, panya tjana mani ulytja kuļu pulkara kulira putu Godaku walytjaringanyi paluru tjananya mayatjangku kanyintjaku. **25** Kulilaya! Panya nyilangka ala utju mulapa ngaranyi. Ka ala pala palulawanu wanyu kamula tjarpapai? Wiya alatjiṭu. Ka palu puřunypatū aŋangu mani ulytja pulkatjara tjuṭa putu Godaku walytjaringanyi paluru tjananya mayatjangku kanyintjaku.”

26 Kaya aŋangu tjuṭangku nyanganpa kulinu munuya putu kulira palula tjapinu, “Palu Godalu aŋangu mani pulkatjara tjuṭa wantirampa

tjinguru aŋangu kutjupa uwankara kuļu ngura kurakutu iyalku wankarunkunytja wiyangku.”

27 Ka Jesulu piruku wangkangu tjanala, “Uwa, aŋangu puļu waltytja wankaringanyi, palu Godalu kutjungku wankalpai.”

28 Ka Peterlu wangkangu, “Kulila, panya nganaŋa kutjupa kutjupa uwankara wantikatingu nyuntunya waŋantjikitjangku.”

29-30 Ka Jesulu tjanala wangkangu, “Uwa mulapa. Kaŋa nyurala tjukarurungku wangkanyi, panya nyura tjinguru nyurampa ngura, munu kuri, kuṭa, kangkuru tjuta, ngunytju, mama munu tjitji tjuta kuļu wantikatingu Godalu nyuranya munu aŋangu kutjupa tjuta kuļu waltyjanmara mayatjangku kanyintjaku. Ka nyara palulanguru Godalu watarkuriwiyangku nyuranya waintara ungkuku waltytja tjuta mulapalta manta nyanga palula nyinanyangka, ka ngula nyura ilunytjatjanu wankaringkula pakara wanka tiṭutjara nyinaku Godala tjungu pukuļpa mulapa.”

*Jesulu Palurunku Ilunytjikitjangku
Wangkanytja*

(Matthew-ku 20:17-19; Markaku 10:32-34)

31 Munu palulanguru Jesulu wati panya palumpa nintintja 12 maunṭalpa katingu munu tjanala wangkangu, “Kulilaya! Kuwarila Jerusalemalakutu ananyi. Ka uwankara panya wangkatjara tjutangku iriti Watiku Katjatjara walkatjunkunytja utiringkuku.

32 Panya ngayuku mirpaṇtju tjutangkuṇiya witira wati Jew wiya tjuta ungkuku, kaṇiya

ngayunya anaṛa kurara pungkuku munuṇiya wiṭalytjunkuku. ³³ Munuṇiya wiipangka kuļu pulkara alkalku munuya palulanguru ngayunya iluntankuku. Palu ngayulu ilunytjatjanu tjin̄tu kutjara wiyaringkula wankaringkula pakalku. Alatji panya nyiringka iriti walkatjunkunyta utiringkuku.”

³⁴ Palu palumpa nintintja tjutangkuya putu nguwanpa kulinigi paluru ngula pikatjararingkunyta wangkanyangka, panya mulapa Godalu tjukurpa nyanga palunya kumpilpa kanyiningi tjanala utintja wiyangku tana nintiringkula uti kulintjaku-tawara.

*Jesulu Wati Kuru Pati Ngatjilpai
Palyarunguntja*

(*Matthew-ku 20:29-34; Markaku 10:46-52*)

³⁵ Ka Jesunya tana waṭalpi Jerichola wirkanu, ka ngura nyara palula wati kuru pati nyinangi iwarangka itingka, munu paluru maniku nyinara ngatjilpai. ³⁶ Munu paluru kulinu anangu tjuta mulapa kinkinpa winki itiwanu wati-pitjanyangka munu tjapinu tjanala, “Nyaaringanyi nyanganpa?”

³⁷ Kaya palula wangkangu, “Wiya, Jesunya wati-pitjanyi panya Nazarethanya ngurara.”

³⁸ Ka wati panya kurutjarangku nyangatja kulira Jesula mirara wangkangu, “Jesu! Davidakun katja! Ngalturiwatju!”

³⁹ Kaya anangu tjutangku Jesula tjungu ankunytjatjanungku palunya kulinu paluru Jesula wangkanyangka munuya palunya painu pilunarira wangkawiya nyinanytjaku. Palu

paluru pirukutu pulkara mirara tjapiningi alatji wangkara, “Davidakun katja! Ngalturiwatju!”

⁴⁰ Ka Jesulu miranyangka kulira ngarakatingu munu wangkangu wati palunya ngalyakintytjaku. ⁴¹ Munu palunya tjapinu, “Palu ngayulu nyaa palyantjakun nyuntu mukuringanyi?”

Ka paluru wangkangu, “Mayatja, ngayulu nyakunytjikitja mukuringanyi.”

⁴² Ka Jesulu wangkangu palula, “Kuru alaringkula nyawa! Panya nyuntun mulapa ngayuku mulamularingkula kuwari kuru alaringu.” ⁴³ Ka mulapatu paluru mapalku kuru alaringkula nyangangi, munu pulkara pukularira Jesunya wañara Godanya walkuningi. Kaya anangu tjutangku palunya nyakula urulyaraningi, munuya tjana kulu pukularira Godanya walkuningi.

19

Tjakiyatjalu Jesunya Nyakunytja

¹ Ka Jesunya tjana tawunu panya Jerichola tjarpala iwarangka waaratu anangi. ² Ka ngura nyara palula wati mani pulkatjara ini Tjakiyatjanya nyinangi mani mantjilpai tjutanku mayatja, panya palumpa warka tjutangku anangu tjutanguru kamantaku mani mantjilpai. ³ Ka Jesunya tjana ankunyangka anangu winki iwarangka ngarala wañanangi palunya nyakunytjikitja.

Ka Tjakiyatjanya kulu palunya nyakunytjikitja pulkara mukuringangi. Palu putu nyangangi

anangu tjuṭa anga-ngaṛanyangka, panya paluru wati muṭumuṭu mulapa. ⁴ Munu paluru kuranyu wirtjapakanu puṇu miṇatjarangka tatira Jesunya katunguru nyakunytjikitja panya paluru kuliningi, “Tjinguru Jesunya nyanga palulawanu pitjaku.” ⁵ Ka Jesunya mulapatu nyara palulawanu anangi munu puṇu pala palula wirkara ira-nyakula nyangu Tjakiyatjanya puṇu katu nyinanyangka munu wangkangu, “Tjakiyatja! Ngalya-ukaliwa! Ngayulu kuwari nyuntula akatjari nyinanytjikitja mukuringanyi nyuntumpa walingka.”

⁶ Ka Tjakiyatjanya mapalku ukalingu puṇunguru, munu pukularira Jesunya katingu palumpa walikutu. ⁷ Kaya anangu tjuṭangku Jesunya katinyangka nyakula mirpañarira wangkara waṇingi alatji, “Ai! Wati nyaratja kura mulapa. Ka Jesunya nyaaku palumpa ngurakutu ananyi?”

⁸ Ka nyara palumpa ngurangka Tjakiyatjalu pakara winkingka mirangka Mayatja Jesula wangkangu alatji, “Mayatja, ngayulu kuwari ulytja kutjupa kutjupa uwankara tjaranı kutjarankunytjikitjangku munuṇatju tjara kutju ngaltutjara tjuṭa ungkuku. Mununa ngayulu anangu kutjupa tjuṭangka mani ngunti waintara mantjintjatjanungku palunya tjananya malakungku ungkuku kutjara kutjara-arangku.”

⁹ Ka Jesulu nyangatja kulira wangkangu palula, “Kuwari nyanga alatjiṇu nyuntunya munu nyuntumpa walytjapiti kulu Godalu wankaṇunu wali nyangangka nyinanytja tjuṭa. Panya kuwari nyuntu Aipuramanya

purunypa Godaku mulamularingu. Nyara palulanguru nyuntu Aipuramaku walytja mulapa nyinanyi. ¹⁰ Panya ngayulu Watiku Katjanya pitjangu aŋangu kawalirintja tjuta ngurira mantjintjikitja munu Godala małakungku tjungura wankaru kanyintjikitja.”

*Tjukurpa Wati Warkaripai Tjuṭatjara
(Matthew-ku 25:14-30)*

¹¹⁻¹² Ka ngura Jerichonya Jerusalemala itingka ngařangi, kaya aŋangu tjutangku kuliningi Jesulu tjukurpa wangkanyangka. Munuya ngunti alatji kuliningi, “Tjinguru kuwari Godalu nganaŋala utiringkula nganaŋanya mayatjangku kanyilku ngura nyanga Jerusalemala.”

Ka Jesulu nintingku kuliningi tjana unngu kulintjitja, munu tjanala tjukurpa ara kutjupatjara wangkangi alatji, “Wati pulka nyinangi ngura kutjupangka war̄ka tjuṭatjara. Kaya kutjupa-ara palunya ngura kutjupanguru altingu mayatja pulka tjunkunytjikitjangku ngura tjutaku palumpa nguraku kulu. ¹³ Ka wati paluru ankunytja kuwaripangka aŋangu palumpa war̄ka tjuta altingu wati 10-pala munu tjananya mani yakutjangka kutju kutju ungkula wangkangu, ‘War̄kaya palyanma mani nyanga palunyatjarangku ngayulu małaku pitjanytjaku patara munuya mani pulkaringkunytjaku piruku palyanma.’ Alatji paluru wangkara tjananya wantikatingu munu anu parari ngura kutjupakutu mayatjarintjikitja.

¹⁴ “Palu palumpa ngurangka aŋangu tjuta palumpa kuraringkupai, munuya ankunyangka

małangka wati tjakulpa tjuṭa maławanungku iyanu tjana ankula alatji wangkanytjaku, ‘Wiya, wati nyanga palumpala ngananya mukuringkunyta wiya nganampa mayatja pułka nyinanytjaku nganampa ngurangka.’ ¹⁵ Palu ngura nyara parariya palunya tjananya kulira wantingu munuya wati panya palunya tjunu alatjitu mayatja pułka nyinanytjaku ngura uwankaraku. Ka palulanguru małaku pitjangu wati panya paluru munu wirkaṛa warķa panya tjuṭa altingu munu tjananya wangkangu, ‘Ngayulu panya nyuranya mani ungkukatingu. Ka nyura yaaltjitu piruku palyanu ngayulu ankunyangka małangka mani panya palula tjanalanguru?’

¹⁶ “Ka wati warķa kutju kuranyu pitjangu munu palula wangkangu, ‘Uwa mayatja, panya yakutja manitjara kutjuṇin ungu. ¹⁷ Kaṇa ngayulu piruku palyanu mani pułka mulapa nampa nyangatja panya yakutja 10-pa.’

“Ka palunya mayatjangku panya wangkangu, Nyuntun wiru mulapa palyanu. Ka nyuntu tjukutjuku wirungku atunymankunytjtjanguru ngayulu nyuntunya mayatja tjunanyi ngura pułka 10-pa atunymara kanyintjaku.”

¹⁸ “Ka palulanguru wati warķa kutjupa palulakutu pitjangu munu wangkangu, ‘Mayatja, panya nyuntuṇin yakutja manitjara kutju ungu, kaṇa ngayulu piruku palyanu mani pułka nampa nyangatja panya yakutja 5-pala.’

¹⁹ “Ka mayatjangku palula wangkangu, ‘Uwa palya. Ngayulu nyuntunya mayatja tjunkuku ngura pułka 5-pala atunymara kanyintjaku.’

20 “Ka piruku wati warka kutjupa pitjangu munu paluru mayatjangka wangkangu, ‘Mayatja, nyangatja mani panya nyuntu ngayunya ungkunytja. Ngayulu nyanga palunya raikingka karpira kumpilpa ngarinytjaku tjunu. **21** Panya ngayuluña nguluringangi nyuntumpa panya nyuntu wati wituwitu, munu nyuntu witulya pulkangku mantjilpai nyuntu tjunkunytja wiyatjangku munu panyan mai katara uralpai nyuntu nganmanytju uninypa tjuta tjunkunytja wiyatjangku.’

22 “Ka mayatjangku panya wangkangu palunya, ‘Nyuntun wati kura, munun warka ngayuku palyantja wiya alatji. Kuwarina tjukurpa panya nyuntu ngayunya wangkanytjjanguru nyuntunya paini. Panya nyuntu ninti ngayuku panya ngayulu wati wituwitu mununa witulya pulkangku mantjilpai ngayulu tjunkunytja wiyatjangku, mununa mai katara uralpai ngayulu nganmanytju uninypa tjuta tjunkunytja wiyatjangku. **23** Kan nyaaku ngayuku mani raikingka kutju karpira kanyiningi bankingka tjunkunytja wiyangku? Tjinguru nyuntu bankingka tjunkunyangkampa ngayulu pulka nguwanpa bankinguru mantjinma malaku pitjala.’ **24** Munu tjanala wangkangu palula itingka ngaranyangka, ‘Mani palatjaya mantjira uwa wati panya pulka palyantjanya.’

25 “Palu anangu tjutangkuya wangkangu palula, ‘Wiya, paluru panya pulka kanyini yakutja tjutangka 10-pangka.’

26 “Ka mayatja panya paluru wangkangu, ‘Wiya, panya pulka palyantjalu pīruku mantjilku, palu panya war̄ka palyantja wiyanguru ngayulu palumpa uwankara mantjilku maralpa ngaranytjaku.

27 Kaña kuwari nyurala tjapini, “Ngananya tjana panyatja ngayulu mayatjarintjaku mukuringkunytja wiya? Ngalya-katiya palunya tjananya munuya nyanga kuranyu iluntara ngayula mirangka!” ’ Alatji mayatja panya paluru wangkangu.”

28 Munu Jesunya nyanganpa wangkara wi-yaringkula ma-pakañu Jerusalemalakutu.

Jesunya Jerusalemala Tjarpanytja
(Matthew-ku 21:1-11; Markaku 11:1-11;
Johnku 12:12-19)

29-30 Munu paluru wirkanu ngura Piitjapaitjala pulala Piitjanila itingka apu panya ini Alipatjarangka munu paluru nintintja kutjara kuranyu witūra iyanu pulala alatji wangkara, “Ara pula tawunu nyara ilatjakutu munu nyupali ma-wirkara nyakuku tangkiyi kułunypa karpintja ngaranyangka ngañmanypa tatintja wiyatja. Nyara palunya pula araltjara ngalya-kati!

31 Ka tjinguru wati kutjupangku nyupalinya nyakula tjapilku alatji wangkara, ‘Nyaaku nyupali palatja araltjananyi?’ Ka pula alatji wangka, ‘Wiya, Mayatjanya nyanga palumpa mukuringanyi.’ Alatji pula wati palula wangka.”

32 Ka pula mulapañu ankula nyangu paluru panya wangkanytjitja.

33 Ka pula tangkiyi panya kułunypa araltjankunyangka wati panya

tangkiyiku walytjangku pulanya nyakula tjapinu wangkara, “Nyaaku nyupali araltjananyi?”

³⁴ Ka pula wangkangu, “Wiya, Mayatjanya nyanga palumpa mukuringanyi.” Ka pulanya palyanmanu araltjaṛa katintytjaku. ³⁵ Ka pula mulapaṭu katingu Jesulakutu, kaya nintintja tjutangku mantara upukuta waṛa mankurpa tjunu tangkiyi panya kułunytja tjañangka munuya Jesunya tatifitjunu. ³⁶ Ka paluru tatira pitjanyangka aŋangu tjutangku palumpa pulkara pukularira upukuta tjananku araltjara lipira tjunkula wañaningi iwarangka palula kuranyu.

³⁷ Ka paluru apu Alipatjaralawanu ankula ma-ukalingangi wimarungka itipirira piruku Jerusalemalakutu ma-tatintjikitja. Ka ma-ukalingkunyangkaya aŋangu palunya waŋalpai tjuta palumpa pulkara alatjitu pukularingi, munuya pukultu mirara Godanya walkuningi, panya paluru miracle wiru tjuta palyantjitunguru, panya tjanaya rawangku nyangangi paluru palyannyangka. ³⁸ Munuya Godanya mirawañningi alatji wangkara,

“Mayatja God, nyanga palunya pulkara pukulmanama,

panya nyuntu palunya iyanu nganaŋanya mayatjarira kanyintjaku.

Kuwari nganampa God Ilkaritjanya aŋangu tjutaku kalyparingu.

Kala palunya walkura mirawañima katutja pulkanya!”

³⁹ Kaya Paratji tjutangku aŋangu tjutangka ngurur-ngururpa ankunytjatjanungku Jesula

wangkangu, “Nintilpai, nyanga nyuntunya wañalpai tjuṭa wanyu paila pilunarinytjaku!”

⁴⁰ Ka Jesulu tjanala wangkangu, “Wiya, nyanga tjana tjinguru pilunarinyangkampa apu nyan-gantu ngapartji mirara Godanya walkulkku.”

Jesunya Jerusalemaku Ulanytja

⁴¹ Munu palulanguru Jerusalemalakutu ngalya-ilaringkula Jesulu wali palunya nyangangi munu paluru nyakula ulangi anangu tjuṭaku munu wangkangu, ⁴² “Ngayulu mukuringanyi nyura nintingku kulintjaku yaaltjingara Godala kalypa tjungu nyinanytjikitjangku. Palu wiya, nyura ngurpangku putu nyanganyi munu nyura pututu kulini. Ngaltutjara! ⁴³ Panya ngula nyurampa mirpantju tjutangku pitjala nyuranya pikangku tjaṭutjura angatjunkuku kampa uwankaranguru. ⁴⁴ Munuya nyurampa wali uwankara piluntara minya-minyalku alatjiṭu kutjupa malaringkula ngaranytjaku wiya, munuya nyuranya unngu nyinanytja tjuṭa uwankara alatjiṭu iluntara wiyaliku tjitji tjuṭa kułukulu. Panya Godanya pitjangu nyuranya wankařunkunytjikitja, ka panya nyura palunya ngurkantankunytja wiyangku wantingi.” Alatji Jesulu tjituru-tjitururira wangkangi Jerusalemania nyakula.

Jesulu Paintja Timpula Kurannyangka

(Matthew-ku 21:12-17; Markaku 11:15-19;
Johnku 2:13-22)

⁴⁵ Munu palulanguru wařingka ma-wirkara ankula timpulangka tjarpangu. Ka timpulaku

yaatangka panya anangu tjutangku ngarala kutjupa kutjupa tjuta tjalamilaningi.

Ka Jesulu nyakula tjananya mirpañarira painu. ⁴⁶ Munu tjanala wangkangi, “Panya nyiringka iriti walkatjunkunytja ngaranyi Godalu wangkanyitjta alatji,

‘Ngayuku timpula uti ngayuku alatjiitu ngarama anangu winkingku ngayunya tjarpara walkuntjaku.’ *

Palu nyura maniku manyu tjutangku timpula nyanga milmiltä tjarpara anangu tjutangka mani mantjira ngura nyangatja kurañi munu nyura wati kutitjunkupai tjutaku wali purunypa palyañi.” *

Alatji Jesulu tjanala wangkangu.

⁴⁷ Munu tjintu kutjupa tjintu kutjupa Jesulu timpulangka pitjala tjukurpa wangkapai. Kaya wati tjukurtjara kuranyitja tjutangku, munu wati Moseku tjukurpa nintilpai tjutangku, munu Jewku mayatja tjutangku kulukuñu Jesunya kukanyamanangi iluntankunytjikitjangku.

⁴⁸ Palu puñuliringiya panya anangu tjutangkuya rawangku palula tjukurpa kulintjikitja pulkara mukuringangi munuya puñu wantingi.

20

Jesunyaya Putu Tjapira Kulintja

(Matthew-ku 21:23-27; Markaku 11:27-33)

¹ Ka tjintu kutjupa Jesulu timpulangka tjukurpa wiru tjanala nintiningi. Kaya wati

* **19:46** Aitjayaku 56:7 * **19:46** Jeremiah-ku 7:11

tjukurtjara kuranyitja tjuṭa munu wati Moseku tjukurpa nintilpai tjuṭa kuḻu palulakutu pitjangu. ² Munuya wangkangu palula, “Nganalunta nyuntunya wangkangu aŋangu tjuṭa timpula nyanganguru paintjaku? Mununta nganalu iyanu tjukurpa nyangangka wangkara nintintjaku?”

³ Ka Jesulu tjanala ngapartji wangkangu, “Wiya, wanyu kaṇa ngayulu-warara nyurala tjapila. ⁴ Nganalu wanyu Johnnga wituṇu aŋangu tjuṭa baptise-katintjaku Godalu munta watingku?”

⁵ Kaya tjananku kaputurira wangkangi, “Nyaala wangkaku palula? Tjinguru nganaṇa alatji wangkaku, ‘Godalu wituṇu’, ka paluru tjinguru nganaṇala wangkaku, ‘ka nyura nyaaku Johnku mulamularingkuwiyangku wantingi?’ ⁶ Palu nganaṇa tjinguru alatji wangkaku, ‘Watingku wituṇu’, kaya alatji wangkanyangkampa aŋangu nyanga tjutangku kulirā mirpaṇarira nganaṇanya apungka atura iluntankuku, panya paluru tjana Johnnga Godaku wangkatjaranmankupai. Kala nyaa wangkaku?”

⁷ Munuya palulanguru puṭu kulirā Jesula wangkangu, “Wiya, nganaṇa ngurpa nganalu Johnnga wituṇu baptise-katintjaku.”

⁸ Ka Jesulu tjanala wangkangu, “Ka ngayulu ngapartji nyurala tjakultjunkunytja wiyangkuṭu wantinyi panya ngayunya iyantjanya.”

Wati Warka Kura Tjułangku Kiripitji Kanyintja

(Matthew-ku 21:33-46; Markaku 12:1-12)

⁹ Munu Jesulu piruku tjanala tjukurpa ara kutjupatjara wangkangi alatji, “Wati kutjupangku kaana pulkangka puṇu kiripitji tjuṭa tjawara ngaratjura waṇanu, munu palulanguru wati maṇkurpa tjunkukatingu puṇu pakannyangka atunymara kanyintjaku munu parari anu ngura kutjupakutu rawa nguwanpa ma-nyinanytjikitja.

¹⁰ Ka ngula mai panya kiripitji kururingkunyangka wati panya kaanaku walytjangku wati warkaripai kutju iyanu wati panya kaana atunymankupai tjutakutu ankula mai kiripitji tjarara mantjira palumpa ngalya-katinytjaku. Palu pitjanyangka nyakulaya palunya pungkula maralpa paira iyanu malakungku.

¹¹ Ka maralpa wirkankunyangka wati panya paluru piruku iyanu wati kutjupa ngapartji. Kaya palunya kuļu wirkankunyangka nyakula pungkula pikatjarara maralpa malakungku paira iyanu.

¹² “Ka malaku pitjanyangka piruku kutjupa ngapartji iyanu, kaya palunya pungkula pikatjarara urilta waningu.

¹³ Ka paluru kutjungku kulira wangkangu wati panya kaanaku walytjangku, ‘Nyaalkuna wanyu? Munta wanyuṇatju ngayuku katja iyalku, panya nyanga palumpaṇa pulkara mulapa mukuringkupai, kaya tjinguru palunya wanganarangku kulikku.’

¹⁴ Palu wati panya palumpa katja wirkankunyangka nyakulaya tjananku kaputurira wangkara kuliningi, ‘Ai! Wati panya palumpa katjampal palatja

pitjanyi. Wanyula palunya iluntara, ka ngula mama palumpa tjilpiringkula ilunyangka kaana nyangatja nganampariku.’ ¹⁵ Munuya wati panya palunya witir  kaananguru itarikatingu urilkutu munuya pungkula iluntanu.”

Munu Jesulu tjukurpa nyangatja wangkara wiyaringkula tjanala wangkangu, “Ka wati panya kaanaku walytjangku nyaalku tjananya ngapartji? ¹⁶ Wiya paluru pitjala wati panyarpa iluntankuku munu kaana kiripitjitzara a angu kutjupa tju a ungkuku.”

Kaya a angu tju angku nyangatja kulira putu nguwanpa mulamularingangi, “Mulapaya katja pungkula iluntanama? Wiya, alatji wangkanytja wiyangku wantimal”

¹⁷ Ka Jesulu palunya tjananya nyangangi munu wangkangu, “Kulilaya tjukurpa panyatja, panya nyiringka iriti walkatjunkunytja nyanga alatji, ‘Wal  palyalpai tju angkuya wal  puli tju anguru palyaningi,
munuya puli kutju nyakula waningu kura-palku kulira.

Palu nguntiya waningu, panya puli nyara paluru kura wiya, wir  mulapa wal  kunpu kany-ilpai.’

¹⁸ Palu kutjupangku puli nyara palunya wantirampa pika pulka mulapa mantjilku. Panya puli nyara palunya wantinyangka Godalu pungkula wiyalpai alatji .”*

* **20:18** Tjukurpa nyanga pulitjara wangkara Jesulu palurunku wangkangi.

*Rome-aku Mayatja Mani Ungkunytjaku
(Matthew-ku 22:15-22; Markaku 12:13-17)*

19 Kaya wati panya Moseku tjukurpa nintilpai tjutangku munu tjukurtjara kuranyitja tjutangku kulu tjukurpa nyangatja wangkanyangka kulira miilarara wangkangu, “Nyangangku nganañanya wangkanyi.” Munuya palunya witintjikitjangku kuliningi. Palu nguluringanginya añaŋgu winki ngaranyangka nyakula. **20** Munuya pañaningi Jesunya ngula witintjikitjangku. Munuya wati kutjupa tjuta iyañu palya tjuta-palku palula tjunguringkula wañarira kulintjaku paluru wangkanyangka. Panya tjana kuliningi Jesulu tjukurpa kutjupa kutjupa ngunti wangkanyangka palunya witira wati mayatja pulka ungkunytjikitjangku palunya ngurkantankunytjaku.

21 Kaya wati panya paluru tjana ankula Jesunya ngunti tjapintjikitjangku palula wangkangu, “Nintilpai, nganana ninti tjukurpa pala nyuntu wangkanyitjaku, panya tjukurpa pala paluru tjukaruru alatjitu. Munu nyuntu añaŋgu uwankara tjungura nyakupai munu tjanala uwankarangka tjukarurungku wangkapai tjukurpa panya palunya añaŋgu kutjupa tjutaku nguluringkula kampa kutjuparintja wiyangku. Munu nyuntu Godaku iwara tjukarurungku wangkara nintilpai kutitjunkunytja wiyangku. **22** Kalanya wanyu tjakultjura, palyala wati panya Tjiitjanya mayatja pulka Rome-ala nyinapainya mani tjarara ungkuku, munta wiya?”

²³ Palu Jesulu nintingku kuliningi tjana ngunti arkara tjapinnyangka munu tjanala wangkangu,
²⁴ “Wanyuṇiya nintila mani panya tjiilpa kutju.” Kaya tjiilpa kutju mantjira palunya nintinu. Ka paluru nyakula tjanala tjapinu, “Nganaku ini walkatjunkunytja nyangatja ngaranyi? Munu nganaku yunpa kuļu ngaranyi?”

Kaya wangkangu, “Mayatja pulka panya Tjiitjanya.”

²⁵ Ka Jesulu tjanala wangkangu, “Uwa mulapa mani nyangatja mayatja Tjiitjaku, kaya palunya palya ungama paluru wangkanyangka, palu Godalu wangkanyangkampaya Godanya alatjiṭu ungama.”

²⁶ Palu paluru alatji wangkanyangkaya nguwankuringu, “Ai, nyangangku muñkara alatjiṭu wangkapai.” Munuya pilunpa ngarangi wangka wiya alatjiṭu, panya paluru tjukurpa tjukaruru alatjiṭu wangkapai puṭu kuramankunytjaku, kaya puṭu palunya aŋangu tjuṭangka miřangka witintjikitjangku kuliningi.

*Anangu Ilunytjatjanu Pakantjitja
 (Matthew-ku 22:23-33; Markaku 12:18-27)*

²⁷ Kaya ngula wati Tjatjutji mankurpa pitjangu Jesulakutu, panya paluru tjanaya aŋangu tjuṭa ilunytjatjanu pakantjitjaku mulamularingkupai wiya. Munuya wati nyanga mankurtu Jesula ngunti arkara tjapinu alatji, ²⁸ “Nintilpai, panya Moselu tjukurpa nyangatja nganampa iriti walkatjunu alatji, ‘Tjinguru wati kuṭa iluku tjitji wiyatū, ka minyma panya palumpa kuri wanka nyinanyangka wati panya tjitjururungku

uti altima minyma panya palunya. Munu tjinguru tjitji katja utintjatjanungku paluru kulilku, “Nyangatja ngayuku wiya, ngayuku kuṭaku tjitji, panya ngayulu palumpa kuringka utinu.” ’ Alatji Moselu walkatjunu.

²⁹ “Palu tjukurpa nyangatja wanyu kulila. Panya watı 7 kuṭarara kuṭarara nyinangi. Ka kuṭa ngañmanyitjangku kungkawara altingu, munu paluru tjitji utilwiyatı ilungu. ³⁰⁻³¹ Ka malanytju ngapartji minyma panya palunyatu altingu munu tjitji wiyatı ilungu, ka palu purunypa^{tu} watı malanypa kutjupangku ngapartji altira paluru kulu tjitji wiyatı ilungu. Kaya palu purunypa^{tu} małanypa panya małatja tjutangku minyma panya palunyatu altira kanyıra tjitji wiyatı ilungu uwankaratu wanapari wanapari. ³² Ka ngula minyma panya paluru tjanampa panya kurilta ilungu. ³³ Kalanya wanyu tjakultjura ngula ilunytjatjanu wankaringkula pakantjatjanu minyma panya paluru nganaku kuri nyinaku? Panya watı 7-tu palunya altingu.”

³⁴ Ka Jesulu watı panya Tjatjutji tjutangka wangkangu, “Mantangka nyanga nyinara wattingku kungkawara altipai munu pula tjunguringkula kurirara nyinapai. ³⁵ Palu ngula Godaku walytja tjuṭa ilunytjatjanu pakara ngura nyara ilkaritjangka kuri altinytja wiya nyinaku. ³⁶ Munuya angelpa tjuṭa purunypa titutjara nyinaku piruku ilunytja wiya, panya tjana ilunytjatjanu pakara Godaku tjitji tjuṭa nyinaku. ³⁷ Panya Moselu utingku alatjitu tjakultjunu anangu tjuṭa ilunytjatjanu pakantjaku. Panya paluru punu kampanyangka nyakunyt-

jatjanungku walkatjelu alatji Godalu panya wangkanytja, ‘Ngayulu Aipuramaku, Isaacaku munu Jacobaku God nyinanyi.’³⁸ Kala nyanga palulanguru kulini panya Mayatjanya aŋangu wanka nyinapai tjutaku God nyinanyi, miri tjutaku wiya, panya Godalu aŋangu uwankara wanka tjuta nyakupai.”

³⁹ Kaya kutjupa tjutangku wati panya Moseku tjukurpa nintilpai tjutangku palula wangkangu, “Nintilpai, nyuntun tjukurpa wiru mulapa wangkangu.”⁴⁰ Munuya palula malangka piruku Jesunya tjapintja wiyangku wantingi.

Christanya Davidaku Katja

(Matthew-ku 22:41-46; Markaku 12:35-37)

⁴¹ Ka Jesulu wangkangu tjanala, “Nyaakuya panyatja aŋangu tjutangku wangkapai Christanya Davidaku katja nyinanytja? ⁴² Panya nyiri Psalmangka ngaranyi Davidalu wangkanytja alatji,

‘Mayatja Godalu ngayuku Mayatjangka wangkangu,

“Ngayula itingka mayatja pulka nyinakati kampa nyanga wakungka.

⁴³ Kanä nyuntumpa mirpantju tjuta tjarulku nyuntula wangaŋarangku kulintjaku, kan tjananya nyuntu mayatjangku wituwitulku.”,*

⁴⁴ Ala palatja! Davidalu Christanya mayatjanmanangi alatjitu Godalu panya kalkuntjanya, ka Christanya yaaltji-yaaltji piruku palumpa pakali

* **20:43** Psalm 110:1

małatja nyinama? Wiya, paluru pakali kutju wiya palumpa mayatja kułu nyinanyi.”

*Jesulu Añangu Tjuta Ngulutjunkunytja
Moseku Tjukurpa Nintilpai Tjutangka-tawara
(Matthew-ku 23:1-36; Markaku 12:38-40; Luke-
aku 11:37-54)*

45 Munu añangu tjutangku ngarala kulinnyangka Jesulu palumpa nintintja tjutangka wangkangu alatji, 46 “Ngulu nyangamaya Moseku tjukurpa nintilpai tjuta. Nyara tjana panya mantara waratjara kañany-kañanypa para-ngarapai anangu tjutangku nyakula tjananya mirawañinytjaku mukuringkula. Munuya wali inmatjangka tjunguringkula tjiya wiru tjuta ngurkantankupai añangu tjutangka kuranyu uti nyinakatinytjikitja mukuringkula. Munuya kutjupa-ara mai pulka ngalkuntjikitja tjunguringkula palu purunypału kuranyu nyinanytjikitja mukuringkupai anangu tjutangku tjananya nyakula mirawañinytjaku. 47 Munuya minyma wanakala tjuta wituwitulpai tjananya ngunti kalkuntjaku alatji wangkara, ‘Nyuntu nganananya kalkunma ngula nyuntu ilunyangka nyuntumpa wali nganamparintjaku.’ Munuya paluru tjana Godala tjapira tjukurpa wara mulapa wangkapai añangu tjutangku tjananya kulira mirawañinytjaku mukuringkula. Ka nyanga alatji kañany-kañanypa nyinanyangka Godalu tjananya pulkara pungkuku.”

21

*Minyma Wanakalangku Ungkunytja
(Markaku 12:41-44)*

¹ Munu Jesulu tjukurpa wangkara wiyaringkula waintara nyangu anangu mani pulkatjara tjutangku mani pitingka wañinyangka timpulangka, panya mani palunya tjananya paluru tjana Godanya ungangi. ²⁻³ Munu paluru nyangu minyma wanakalangku mani tjuku mulapa wañinyangka kalka kutjara kutju munu tjanala wangkangu, “Kulilaya, ngayulu nyangangi kuwari anangu tjutangku pulka wañinyangka, palu wanakała nyanga ngaltutjarangku tjanala muñkara nguwanpa wañingu. ⁴ Panya kutjupa tjutangkuya pulka kanyintjatjanungku tjarara tjara kutju wañingu, ka paluru uwankara alatjitu wañingu paluru kanyintjatjanungku, munu nyanga wiyalta nyinanyi. Tjukarurungkuña nyurala wangkanyi, minyma nyanga wanakalangku pulka mulapa Godanya ungu mani pulkatjara tjutangka muñkara.”

*Timpula Pilukatinytja Tjanala Wangkanytja
(Matthew-ku 24:1-2; Markaku 13:1-2)*

⁵ Kaya palumpa nintintja kutjupa tjarangku timpula panya nyakula wangkangi wiru mulapa ngaranyangka. Panya timpula paluru puli wiruly-wirulypa wiru mulapatjara. Panya iritiya nyara palula wiru tjuña katira Godanya ungangi timpula tjanampa wiru mulapa palyantjaku. ⁶ Ka Jesulu kulira tjanala wangkangu, “Nyura kuwari nyanganyi timpula wiru mulapa

puli nyanga pulkanguru palyara tatintja. Palu ngula wali nyanga paluru pilukatira minya-minyaringkuku. Ka puli kutjupa malaringkula ngarawiya uwankara alatjitu punkara minya-minya ngarira wañiku.”

*Jesulu Pikangka-tawara Ngulutjunkunytja
(Matthew-ku 24:3-14; Markaku 13:3-13)*

⁷ Kaya kutjupa tjutangku palula tjanapinu, “Nintilpai, wanyulanya tjakultjura! Yaalaña nyanga alatjiriku panya nyuntu kuwari timpula pilukatinytja wangkangi? Ka nyaa nganmanyapa utiringkuku nganaña nganmanyaptju nyakula kulintjaku?”

⁸ Ka Jesulu wangkangu, “Ngulu nyangamaya kutjupangku nyuranya wangkara ngunti kurantjaku-tawara. Panya anangu tjuṭa pitjaku ngayulu iyantja-palku wangkara munuya ngunti wangkaku, ‘Ngayuluña panya paluru, Jesunya Christanya!’ Munta tjinguru kutjupangku wangkaku alatji, ‘Tjin̄tu panya wirkanu, anangu tjuṭa wankarunkunytjaku.’ Palu kuliraya wantima palunya tjananya wañalwiyangku ngunti kurannyangka. ⁹ Munu nyura tjinguru kuliklu anangu tjutangku tjananku pikangku pungkunyangka ilatjangku munu pararitja tjutangku kulu. Palu pika nyanga palunya tjananya kuliraya nguluringkuwiya nyinama, panya nyanga paluru tjana utiringkunytjaku ngaranyi alatjitu, palu tjin̄tu malatja kuwaripatu ngaranyi ilaringkunytja wiya.”

¹⁰ Munu Jesulu tjanala pirukku wangkangu, “Panya ngura kutjupa kutjupangka tjaultji

tjułangku pikangku pungkuku nguraku mayatja tjułangku wituwitunyangka. ¹¹ Ka ngura tjułangka manta pulłka uriku. Ka ailuru pulłka ngaraku, ka mai wiyaringkunyaŋka anangu winki paltjatjiratja nyinaku, ka pika kutjupa kutjupa tjuła utiringkula anangu tjuła pikatjararingkunytjaku palyalku. Ka piruku ilkarłingka kutjupa kutjupa pulłka tjuła utiringkuku anangu tjułangku nyakula pulłkara nguluringkunytjaku.

¹² “Palu nyanganpa utiringkunyaŋja kuwaripangka anangu mirpantju tjułangku nyuranya witilku ngayunya wañannyangka. Munuya nyuranya anaña kuraña pungkuku munuya nyuranya katira wali inmatjangka ngaratjunkuku kuutpangka wangkanytjaku, ka mayatja tjułangku nyuranya ngurkantara tjailakutu iyalku, nyura ngayuku mukuringkunyaŋka. Munuya nyuranya wati mayatja pulłka tjułangka kuranyu ngaratjunkuku tjanala miñangka nyuranya kuranmankunytjikitjangku. ¹³ Palu nyara palula ara nyura uti tjukurpa ngayunyatjara tjanala tjakultjunama.

¹⁴ “Munuya nyuranya kuutpaku katinyangka alatji kulilwiyangku wantima, ‘Nyaanatju wangkaku ngayunya tjinnyangka?’ ¹⁵ Panya ngayulu alatjtju nyuranya wangkanytjaku unngu nintilku. Kaya nyurampa mirpantju tjułangku pułtu kulilkku nyuranya ngapartji wangkanytjikitjangku. ¹⁶ Ka nyurampa malpa tjułangku nyuranya wati mirpantju tjułangka nintilku witira katinytjaku, tjinguru nyurampa mamangku ngunytjungku, tjinguru kułangku

tjinguru walytja kutjupangku nyuranya tjanala nintilku, kaya nyuranya witirā katiku munuya nyuranya kutjupatjara iluntankuku.

¹⁷ “Uwa, aŋangu winki nyurampa kuraringkuku nyura ngayunya waŋannyangka.

¹⁸ Palu pika nyanga palu purunyṭju nyuranya puṭu Godalanguru maŋtankuku. ¹⁹ Palu nyura titutjarangku ilunytjakutu-wangkara ngayunya tungun-tunguntu waŋannyangkampa Godalu nyuranya wankaru kanyilku palula tjungu titutjara nyinanytjaku.

Jesulu Wangkanytja Jerusalemania Ngula Wiyantjaku

(Matthew-ku 24:15-21; Markaku 13:14-19)

²⁰ “Ka nyura wati warmala winki mulapa Jerusalemala para-arintara ngaranyangka nyakulampa kulimma panya tjanaya pitjangu ngura palunya wiyanṭikitja alatjitu. ²¹ Ka nyura manta Judeala nyinanytjatjanu uti ngulu wirtjapakanma pułikutu. Ka palu purunypaṭu uti nyura Jerusalemala nyinanytjatjanu pakara wirtjapakanma ngura kutjupakutu. Ka nyura ngura tjukutjuku tjutangka nyinanytjatjanungku Jerusalemalakutu ankunytja wiyangku wantima. ²² Panya nyiringka iriti walkatjunkunytja ngaranyi pika nyanga palu purunypa ngula Judeala utiringkunytjaku.

²³ “Ka nyara palula ara panya kura pulka mulapa ngaraku minyma ititjara tjutaku munu iti tjukutjukutjara tjutaku kuļu. Ngaltutjara! Panya tjana tjinguru wirtjapakara ngururpaṭu pakuringkula wiyingkuku. Panya mulapa

ngura nyanga Israelta winkingka pika pulka mulapa ngaraku aŋangu tjutaku, panya mulapa Godanya palumpa tjanampa pulkara mirpaŋariku Israelkunu tjutaku. ²⁴ Kaya kutjupa tjuta warmala pitjaku ngura kutjupa kutjupa tjutanguru munuya tjara kutjupa tjula pulkangka wakara iluntankuku munuya tjara kutjupa witira katiku ngura kutjupa tjutakutu. Munuya Jerusalemanyā piluntara wiyalku aŋangu ngura kutjupitja tjutangku. Munuya ngura palunya rawangku kanyilku malikitja tjutangku ngura kutjupa kutjupa tjutanguru pitjala. Munuya tjintu malatja waṭalpi ilaringkunyangka kutju wantikatiku Jew tjutangku piruku ngura walytjangku kanyintjaku.

*Jesunya Małaku Pitjanytja
(Matthew-ku 24:29-31; Markaku 13:24-27)*

²⁵ “Ka tjintu munu pira kuļu kutjupa kutjuparikuku, ka kililpi tjuta punkalku. Ka manta winkingka uru pulkara urira rurkulku. Kaya aŋangu tjutangku nyakula nguluringkuku munuya puṭu kulilku kutjupa kutjupa palyantjikitjangku. ²⁶ Panya Godalu ilkarīngka ngaranytja tjuta pulkara uritjingalku. Kaya aŋangu winki nyakula pulkara nguluringkula tjititingkuku munuya puṭu kulilku, ‘Nyaaringanyi kuwari?’ ²⁷ Munuya palulanguru ngayunya nyakuku Watiku Katjanya ngangkalīngka pitjanyangka witulya pitalytji pulka alatjiṭu. ²⁸ Ka nyanga uwankara alatjirinyangkampa nyura uti nguluringkunytja

wiya ngarama munuya raparingkula kulinma, ‘Munta nganañanya wankarunkunytjikitja pala pitjangu.’”

*Jesuku Tjukurpa Ti̊tutjara Ngaraku
(Matthew-ku 24:32-35; Markaku 13:28-31)*

²⁹ Munu Jesulu tjukurpa ara kutjupatjara tjanala piruku wangkangi alatji, “Kulinmaya puñu panya nyalpi punkara wiyaringkupai wariringkunyangka.” ³⁰ Munu panya puñu nyara palula piriayakutu nyalpi kuwaritja piruku pakalpai, ka pakannyangka nyakula nyura nintingku kulilpai, ‘Munta-uwa, kuli waṭalpi ilaringanyi.’ ³¹ Ka nyanga palu purunypatu pika panya paluru tjana utiringkunyangka nyakula nyura kulinma panya tjintu waṭalpi ilaringanyi Godalu palumpa walytjapiti uwankara mayatjangku kanyintjaku.

³² “Uwa, tjukarurungkuña nyurala wangkanyi, panya nyanganpa uwankara utiringkuku anangu nyanga kuwari nyinanytja tjuṭa wanka nyinanyangkatu.” ³³ Panya ngula manta ilkarí uwankara wiyaringkuku, palu tjukurpa ngayulu wangkanytja titutjara alatjitu ngaraku wiyaringkunytja wiya.

Ti̊tutjaraya Ala-alá Paṭanma

³⁴⁻³⁵ “Uwa, nyura uti rawa kulil-kulilpa nyinama watarkurinytja wiya. Munuya mai pulka ngalkula waina pulka kulu tjikira pukularinytjikitjangku kulintja wiyangku wantima munuya mantatja kutjupa kutjupa tjuṭaku pulkarä mukuringkula kulintja wiyangkuwantima. Panya nyura rawa

alatjirinyangkampa tjintu panya paluru mapalku wirkankuku, ka nyura pulkara urulyaralku watarku nyinanytjatjanu. Panya watingku kuka witintjikitjangku pitj tjawara tjutura wantipai. Ka kuka kutjupa watarku pitjala karalukatipai pitj panya palula, ka iluntankupai. Palu purunyapa anangu kutjupa watarku nyinara pu tu wankaringkuku tjintu malatjangka. Panya tjintu nyara paluru wirkankunyangka anangu uwankarangku nyakuku manta winkingka. ³⁶ Ka uti nyura rawa ala-alal nyinama munuya rawangkutu Godala tjapilkatima nyuranya ngalkintjaku pika nyanga kutjupa kutjupa tju tanguru. Munuya palula tjapinma nyuranya ku npuntjaku, ka nyura titutjarangku ngayunya tjukarurungku wa nanma ngayulu Watiku Katjanya nyurampa pukularinytjaku tjintu malatjangka.”

³⁷ Jesulu tjukurpa nyanga palunya tjananya timpulangka wangkangi anangu tju tangka tjintu kutjupa tjintu kutjupa, munu wangkara wi yaringkula paluru mungartji ankupai ngura panya puli Alipatjaralakutu munu nyara palula ngaripai. ³⁸ Kaya anangu tju ta mungawinki kutjupa mungawinki kutjupa ali pakara pitjapai timpulakutu paluru tjukurpa wangkanyangka kulintjikitja.

Jewku Mayatja Tjuṭangku Jesunya Kukany-mankunytja

(Matthew-ku 26:1-5,14,16; Markaku 14:1-2,10-11; Johnku 11:45-53)

¹ Ka tjintu watalpi ilaringu tjintu pala palula mai panya pilytja ngalkula ara panya irititja kulintjaku ini panya Katuwani Ankunytjanya. ² Kaya wati tjukurtjara kuranyitja tjuṭa munu Moseku tjukurpa nintilpai tjuṭa kulu Jesunya iluntankunytjikitja mukuringangi, palu tjana anangu tjuṭaku nguluringangi kulira, “Tjinguру tjanala mirangka witinnyangkaya nyakula palunya ngalkilkdu. Kala yaaltjingara palunya kampangkaṭu witilku?” ³ Ka tjintu nyara palula mamu Satannga Jesuku nintintja kutjungka tjarpangu ini panya Judas Kariyatala. ⁴ Ka Judasalu ankula kampangkaṭu wangkangi wati panya tjukurtjara kuranyitja tjuṭangka munu wati timpula atunymankupai tjuṭangka kulu. Alatji paluru wangkangi, “Yaaltji nyura kulini? Ngayuluṇa nyuranya alpamilalku Jesunya witintjaku?”

⁵ Kaya paluru wangkanyangka kulira pukularingu munuya palunya kalkunu Jesunya tjanala nintinnyangka mani ungkunytjikitjangku. ⁶ Ka tjana wangkanyangka Judasalu palyanmanu munu palulanguru kuliningi, “Wanyuyawi anangu uwankara ngurangkari, kana tjanala kampangkaṭu nintila Jesunya witintjaku.”

Tjapa Małatja Ngalkunytjaku Palyantja

(Matthew-ku 26:17-25; Markaku 14:12-21;

Johnku 13:21-30

⁷ Ka tjintu panya paluru wirkanu mai panya palunya ngalkuntjaku munu lamalama kulu iluntankula para ngalkuntjaku. ⁸ Ka Jesulu wangkangu Peterla pulala Johnta, “Ankula pula mai kuka riti palyala nganaña ngalkuntjaku.”

⁹ Ka pula tjapinu Jesula, “Yaaltjingka riti palyantjakun mukuringanyi?”

¹⁰ Ka Jesulu pulanya Jerusalemalakutu wangkara iyanu, “Nyupali walingka ma-wirkara nyakuku wati war^karipaingku piti minatjara tjalira katinyangka. Nyara palunya pula wanara nyawa walingka tjarpanyangka.

¹¹ Munu pula nyakula wali pala palulatu matjarpara wati waliku walytjangka wangka alatji, ‘Nintilpaina mukuringanyi nyuntu ngalila nintintjaku ruuma yaaltjingkala mai panya Katuwanu Ankunytjanya ngalkuku.’ ¹² Ka wati nyara paluru nyupalila nintilku ruuma katutja taipula kutjupa kutjupa tjutatjara. Ka pula nyara palula nganampa mai nganmanytu palyala.”

¹³ Ka Peternya pula Johnnga anu tjananya wantikatira munu pula mulapatu nyangu Jesulu panya wangkanytjitja uwankara. Munu pula mai kuka uwankara riti palyanu ara panya Katuwanu Ankunytjanya ngalkula kulintjikit-jangku.

*Tjapa Malatja Ngalkunytja
(Matthew-ku 26:26-30; Markaku 14:22-26; 1 Karintjaku 11:23-25)*

¹⁴ Munuya mungartjirinyangka pitjala taipulangka para-ngarira arintanangi Jesunya munu palumpa iyantja tjuta kuļu mai ngalkuntjikitja. ¹⁵ Ka paluru tjanala wangkangu, “Ngayulu pulkara mukuringanyi nyurala tjungungku mai nyanga katuwanutja ngalkuntjikitja ngayuku pika ngaranytja kuwaripangka. ¹⁶ Panya ngayulu mantangka nyurala nyinara mai nyanga katuwanutja piruku ngalkuntja wiya, palu ngula kutjuña nyurala tjunguringkula ngalkuku tjintu panya malatjangka Godalu palumpa walytjapiti uwankara mantjira mayatjangku kanyinnyangka.”

¹⁷ Munu Jesulu walpayata wainatjara mantjinu munu Godala wangkara walkunu, “Wirungkulanyan waina nyangatja ungu.” Munu tjanala wangkangu, “Mantjilaya walpayata nyanga wainatjara munuya uwankarangku tjikila. ¹⁸ Panya ngayulu mantangka nyurala nyinara piruku waina nyanga palunya tjikintja wiya, palu ngula kutjuña nyurala tjunguringkula tjikillku tjintu panya malatjangka Godalu palumpa walytjapiti uwankara mantjira mayatjangku kanyinnyangka.”

¹⁹ Munu Jesulu mai pilytja mantjinu munu maiku pukularira Godala wangkangu, “Wirungkulanyan mai nyangatja ungu.”

Munu palulanguru tjananya kaṭantara palumpa nintintja tjuta ungu munu wangkangu, “Nyangatja ngayulu puntu nyurampa pikatjararingkunytja. Mantjiraya ngalkula,

munuya ara nyanga palunya rawangku palyanma ngayunya kulintjikitjangku.”

²⁰ Munu ngula maingka malangka piruku walpayata mantjinu wainatjara munu palu purunypatu Godanya walkura tjanala wangkangu alatji, “Nyangatja ngayulu milkali nyurampa tjutinytja, panya nyanga paluru nintini kalkuntja kuwaritja Godalu aŋangu tjutaku palyantja.

²¹ “Palu kulilaya! Kuwari nyanga nyura ngayula tjungu nyinanyi ngayuku malpa uwankara taipulangka nyanga. Palu nyuralanguru wati kutjungku ngayunya mirpaŋtu tjutangka nintiku tjana ngayunya witintjaku. ²² Uwa, ngayulu Watiku Katjanya mulapa iluku panya alatjirinytjaku nganmanytju alatjiŋtu wangkangu. Palu pika pulka mulapa ngaraku wati panya palumpa, panya ngayunya tjanala nintintjtjaku.”

²³ Kaya palumpa nintintja tjutangku alatji kulira tjananku ngaparku tjapiningi wangkara, “Nganalu wanyu alatji palyalku nyanga palumpa?”

Nintintja Tjutangkuyanku Ngaparku Tjapintja Pulka Nyinanytja-tjiratja

²⁴ Munuyanku mirpaŋ-mirpaŋtu ngaparku wangangi alatji, “Ngayulu uti kuranyu nyinama nyurala waintara.”

²⁵ Ka Jesulu tjananya paira wangkangu, “Kulilaya! Panya aŋangu tjutaku mayatja tjutangkuya tjananya tungun-tunguntu kanyira pauntjingara wituwitulpai, munuya walytjangku

tjananku mirawañira wangkapai alatji, ‘Nyawa, nganaña malpa wirungku anangu uwankara wirura kanyilpai.’ Alatjiya wangkapai wati mantatja tjutangku. ²⁶ Palu tjananya kulira arkalwiyangkuya wantima. Nyuntu tjinguru pulka nyinarampa utin walytjangku kulira kunṭaringama, munta tjinguru nyuntu mayatja kuranyitja nyinarampa utin tjaruringkula wati war̄ka purunyarima. ²⁷ Palu anangu tjutangku ara nyanga palu purunypa kulipai wiya, panya tjana uwankara mayatja pulka nyinanytjikitja mukuringkupai, munuya anangu kutjupa tjuta tjanampa war̄ka palyantjaku mukuringkupai tjananya witura. Palu nyura uti kampa kutjupa kulinma munu ngayunya purunypa arkara nyinama, panya ngayulu nyurampa mayatja pulka nyinara nyurampa rawa pulkar̄a war̄karingi.

²⁸ “Uwa, nyura panya ngayula tjungu titutjara nyinangi munuya mirpañtu tjutangku ngayunya kurara pungkunyangkani wantikatinytja wiya alatjiitu. ²⁹ Kana palulanguru kuwari nyuranyalpi tjunanyi ngula anangu tjuta mayatjarira kanyintjaku, panya Mamalu ngayunya mayatja tjunu anangu uwankaraku mayatjarinytjaku, nyara palu purunypa. ³⁰ Ka ngula nyura ngayuku ngurangka ngayula tjunguringkula ngalkula tjikilku. Munu nyura mayatja tjuta tjiya wirungka kutju kutju nyinaku anangu panya Israelkunu tjuta mayatjarira kanyintjikitja.”

Jesulu Ngañmanytju Wangkanytja Peternya

Palumpa Ngurparingkunytjaku
(Matthew-ku 26:31-35; Markaku 14:27-31;
Johnku 13:36-38)

³¹ Munu palulanguru Jesulu Simon Peterla wangkangu alatji, “Simon, Simon, kulilani! Panya Satantu tjapinu nyuranya uwankara kutju kutju arkantjikitjangku panya mai kañilpai purunyntju, panya añañgungku uninypa kanira mai wiru mantjilpai munu kura tjuta tjarara wanipai, palu purunyntju Satantu nyuranya arkara nyakunyntjikitja mukuringanyi. ³² Palu Simon, ngayulu nyuntumpa Godala tjapinu nyuntunya arkannyangka anga-kanyintjaku nyuntu ngayuku ngurparingkunytjatjanu ngayunya wantinnytjaku-tawara. Ka ngula nyuntu malaku ngayula tjunguringkula tjananya ngapartji kuñpunma ngayuku walytja tjuṭa.”

³³ Ka Peterlu wangkangu, “Wiya, Mayatja, tjinguruya nyuntunya witira tjailangka tjarpatjunkunyangka ngayulu kuļu nyuntula tjunguringkula tjailakutu ankuku. Tjinguruya nyuntunya iluntankuku, kaña ngayulu nyuntula tjengu iluku.”

³⁴ Ka Jesulu wangkangu, “Peter, ngañmanytuñanta wangkanyi, panya tjintu pakantja kuwaripangka tjułpu panya tjuki wangkapai, ka munga nyanga kuvari tjułpu paluru wangkanytja kuwaripangka nyuntu ngayuku mañkurara ngurparingkuku.”

³⁵ Munu Jesulu tjananya tjapinu, “Panya ngayuluña nyuranya mungatu maralpa iyanu yakutja wiya, mani katinytja wiya ankunytjaku munu tjinatja kuļu wiya, ka nyura wanyu ankula

kutjupa kutjupa tjułaku mukuringangi nyara palula aṛa panya?”

Kaya wangkangu, “Wiya alatjitu. Nganana palya pukulpa anangi.”

³⁶ Ka Jesulu tjanala wangkangu, “Palu kuwari kutjupa ngaranyi, ka nyura uti yakutja manitjara kanyirampa katima, munuya yakutja kutjupa mantaratjara kanyirampa katima, munuya tjułula pulka kanyintja wiya ngarala nyurampa ulytja tjara kutjupa tjalamilala munuya mani mantjira tjułula pulka payamilala. ³⁷ Panya nyiringka iriti walkatjunkunytja ngaranyi nyanga alatji, ‘Palunyaya wati kuralpai-palku kulilku.’ *

Uwa, tjukurpa nyangangku ngayunyatjara tjakultjunangi, ka tjukurpa nyanga paluru mulapa kuwari utiringanyi.”

³⁸ Kaya palumpa nintintja tjułangku wangkangu, “Mayatja, nyangatjala tjułula pulka kutjara kanyini.”

Ka Jesulu nyakula wangkangu, “Wiya, palya wanti!”

Jesulu Mamangka Tjapintja Ngura Apu Alipat-jarala

(*Matthew-ku 26:36-46; Markaku 14:32-42*)

³⁹ Munu palulanguru Jesunya pakara anu ngura panya apu Alipatjaralakutu panya ngura nyara palulakutu paluru rawa ankupai, kaya palumpa nintintja tjułta palula tjunguringkula anu. ⁴⁰ Munu nyara palula wirkara Jesulu tjanala wangkangu, “Godalaya tjapinma

* **22:37** Aitjayaku 53:12

nyuranya anga-kanyintjaku mamungku nyuranya kurantjaku-tawara.”⁴¹⁻⁴² Munu paluru tjukutjuku paṭu nguwanpa anu munu tultjun-garakatira Godala tjapiningi alatji wangkara, “Mama, wanyu tjananya mirpantju panya tjuta markula ngayunya pungkunytjaku-tawara. Palu wiya, nyuntu mukuringkula palya tjananya wantir’iyala ngayunya pungkunytjaku, kaña palula tjanalanguru kumpintja wiya, panya ngayulu mukuringanyi nyuntu mukuringkunytja kutju palyantjikitja.”

⁴³ (Ka mapalku angelpa ilkarunguru palula utiringu palunya kuŋpuntjikitja. ⁴⁴ Palu Jesunya kurunpa uliringkula akuri-akuriringu pulkara alatjitu Mamala tjapira tjapira, ka milkali akuringka tjunguringkula mantangka punkaningi.)

⁴⁵ Munu paluru tjapira wiyaringkula pakara malaku anu palumpa nintintja tjutakutu. Munu tjananya nyangu kunkunpa alatjitu ngarinyangka panya tjituru-tjituru pułkaringkulaya pakuringu. ⁴⁶ Ka Jesulu tjanala wangkangu, “Nyaaku nyura kunkunpa ngarinyi? Pakaraya tjapinma nyuranya anga-kanyintjaku mamungku nyuranya kurantjaku-tawara.”

Jesunya Witintja
(Matthew-ku 26:47-56; Markaku 14:43-50;
Johnku 18:3-11)

⁴⁷ Ka Jesunya tjanala ngarala wangkanyangka anangu tjuta pitjangu, panya nintintja kutjungku tjananya ngalya-katingu, Judasalu.

Munu paluru ilaringkula Jesunya mitamita kutjara nyunytjuṇu.

48 Palu Jesulu wangkangu, “Judas, nyaakun mal pangku-palku ngayunya Watiku Katjanya nyunytjura nintini witintjaku?”

49 Kaya palumpa nintintja tjutangku nyangatja kulira kuliningi, “Kuwariya witini Jesunya.” Munuya palula wangkangu, “Mayatja, pungkukula tjananya tjula nyanga pulka kutjarangka?” **50** Ka mulapaṭu nintintja kutjungku wati tjukurtjara pulkaku war̄karipai tjula warangka pungkula pina waku kaṭara punkatjinganu.

51 Ka Jesulu wangkangu, “Wantima alatjingga ntja wiyangku!” Munu paluru wati panya warkaripaiku pina pampunu, ka mapalku palyaringu.

52 Munu Jesulu wangkangu wati tjukurtjara kuranyitja tjutangka munu wati timpula atunyman kupai tjutangka munu Jewku mayatja kuranyitja tjutangka kuļu, “Nyaaku nyura tjulatjara tjutinypatjara kuļu pitjangu ngayunya wati kura-palku kulira witintjikitja? **53** Panya ngayulu nyurala tjungu alatjitu nyinangi timpulangka rawa mulapa, ka nyura panyatja nyaaku ngañmanyiju nyara palula aratu witiliwiyangku wantingi? Wiya, nyura kaļala wantipai munu nyura mungangka kutju kumpilpa nyanga palu purunypa palyalpai mamungku wituwitunnyangka. Nyangatja nyurampa ara.”

*Peternya Jesuku Ngurparingkunytja
(Matthew-ku 26:57-58,69-75; Markaku 14:53-54,66-72; Johnku 18:12-18,25-27)*

54-55 Kaya Jesunya witira ma-katingu tjukurtjara pulkaku walikutu. Ka Peterlu palunya malawanungku wañarinangi palula tjanala ilaringkunytja wiyangku. Kaya wirkara wali unngu ma-tjarpangu Jesunya katira. Kaya kutjupa tjutangku urulta yaatangka ngarala waru tilingka yunpa rawangku nyanggangi munu wangkangu, “Wati nyanga paluru kuļu palula tjungutja.”

57 Ka Peterlu wangkangu, “Wiya, ngayulu ngurpa wati nyara palumpa!”

58 Ka ngula aŋangu kutjupangku ngapartji nyangu Peternya munu wangkangu, “Mulapan panyatja, nyuntu kuļu palula tjungutja.”

Ka Peterlu wangkangu, “Wiya! Ngurpaña!”

59 Ka piruku ngula palula malangka kutjupangku ngapartji nyangu palunyaṭu munu wangkangu, “Mulapa wati nyanga paluru palula tjungutja, panya paluru wati Galileenya ngurara wangka Jesunya pula tjungu.”

60 Ka Peterlu wangkangu, “Wiya, ngayulu ngurpa wati palumpa! Puṭuna kulini nyuntu wangkanyangka.” Ka Peterlu wangkanyangka tjulpu panya tjuki mirangu.

⁶¹ Ka Mayatja Jesulu malakukutuṛa Peternya nyangu. Ka Peterlu kulinu Mayatjalu panya wangkanytja alatji, “Tjułpu wangkanytja kuwaripangkatjun nyuntu man̄kuraṛa ngurparingkuku.” ⁶² Ka Peternya uṛilkutu ankula pułkara alatjiṭu tjituru-tjitururira ulangi.

⁶³ Ka wal̄i panya unngu wati timpula atunyman kupai tjuṭangku Jesunya witira kanyiningi munuya palunya anara wangkara pułkara pungangi, ⁶⁴ munuya ngalypangalyparingkula palunya kuru patinu raikingka karpiṛa munuya palunya pungkula ngunti tja piningi wangkara, “Tjukarurungku wangka, nganalunta panyatja pungu? Panya nyuntu kunyun wangkatjarangku nintingku kulilpai.” ⁶⁵ Munuya palunya rawangku kurara pungangi kura tjuṭa wangkara.

*Jewku Mayatja Tjuṭangku Jesunya Tjapiṛa Ngurintja
(Matthew-ku 26:59-66; Markaku 14:55-64;
Johnku 18:19-24)*

⁶⁶ Ka tjintu pakannyangka wati tjukurtjara kuranyitja tjuṭa munu Moseku tjukurpa nintilpai tjuṭa kulu mitingiku tjunguringu, kaya timpula atunyman kupai tjuṭangku Jesunya katira tjanala kuranyu ngaratjunu. ⁶⁷ Kaya palula tja piningi, “Nyuntu mulapa Christianity Wankarunkupainya panya Godalu kalkuntjanya? Wanyulanya tjakultjura.”

Ka Jesulu tjanala wangkangu, “Tjinguru ngayulu nyurala tjakultjunkuku ka nyura ngayuku mulamularingkunytja wi yangku

wantiku. ⁶⁸ Munu ngayulu nyurala tjapinnyangka nyura ngapartji wangkawiyangku wantiku. ⁶⁹ Palu kuwaringuru ngayulu Watiku Katjanya Godala witulya pulkangka itingka mayatja pulka nyinaku.”

⁷⁰ Kaya piruku uwankarangku tjungungku Jesula tjapinu, “Palu wanyu nyuntu mulapa Godaku katja?”

Ka Jesulu tjanala wangkangu, “Tjukarurungku pala nyura wangkangu.”

⁷¹ Kaya wangkangu, “Ala palatja! Wanyula wanti kutjupa tjuta altintytja wiyangku pitjala palunya wangkara kuranmankunytjaku. Panya kuwari nyangala nganana alatjitulo kulinu palurunku walytjangku Godaku katjanmankunyangka.* Utila iluntankunytjaku katima.”

23

*Mayatja Pilate-alu Jesunya Tjapintja
(Matthew-ku 27:1-2,11-14; Markaku 15:1-5;
Johnku 18:28-38)*

¹ Munuya palulanguru paluru tjana uwankarangku pakara Jesunya ma-katingu Pilate-alakutu.

² Munuya palunya Pilate-ala mirangka kuranmankula wangkangi nyanga alatji, “Nganana nyangu wati nyanga palunya anangu tjuṭa kurara katinyangka. Panya paluru tjananya wituwituningi nyuntunya munu nyuntumpa mayatja nyara Rome-ala

* ^{22:71} Moseku tjukurtu pulkara pailpai anangungku walytjangku Godanyanmankunytja wiyangku wantintytjaku. Nyawa Exodus 20:2-7.

nyinanytjanya wantinytjaku. Munu paluru alatji wangkangi, ‘Uti nganaña Rome-aku mayatja mani ungkuwiyangku wantima paluru ngatjinniyangka.’ Mununku nyangangku walytjangku wangkangi paluru kunyu Christanya Wankarunkupainya Godalanguru nganampa mayatja pulka.”*

³ Ka Pilate-alu tjapinu Jesunya, “Nyuntu wanyu mulapa Jew tjuṭaku mayatja pulka?”

Ka Jesulu wangkangu, “Uwa, pala wangkanyin.”

⁴ Ka Pilate-alu wangkangu wati panya tjukurtjara kuranyitja tjutangka munu anangu tjuṭangka kuļu, “Ngayulu wati nyanga palunya puṭu kura ngurkantananyi pungkunyjtikitjangku.”

⁵ Kaya piṛukuṭu wangkangi, “Palu wati nyanga paluru anangu tjuṭa rawangku wangkara kuraningi munu paluru para-wangkarinangi ngura tjutangka Judeala munu ngura uwankarangka. Paluru ngura nyara Galileela rawangku parangarala wangkangi munu kuwari nyanga ngura nyangangka ngapartjilta kuraṇi.”

⁶ Ka Pilate-alu kulinu tjana alatji wangkanyangka munu tjapinu, “Wati nyanga paluru wanyu mulapa Galileenya ngurara?”

⁷ Kaya uwanmanu. Ka paluru kuliningi, “Utiṇa

* **23:2** Alatji tjana wangkangi Pilate-ala panya tjana ninti palumpa mayatjaku ini Tjiitjaku. Nyara paluru mukuringangi anangu uwankarangku palunya kutju pulka walkuntjaku mayatja pulka Godanya puṛunypa. Munu kunyu paluru pulka nyararingkupai anangu tjuṭangku mayatja kutjupa wal̄kunnyangka.

palunya Iratalakutu iyanma ngura Galileeku mayatjakutu panya paluru kuwari nyanga nyinanyi Jerusalemala.” Munu paluru mulapatu ma-iyanu Jesunya Iratalakutu.

⁸ Ka Iratalu Jesunya nyakula pulkara pukularingu, panya paluru Jesunya kutjupangku tjakultjunkunyangka kutju kulilpai nyakunytja wiyangku munu rawa mukuringangi palunya nyakunytjikitja. Munu paluru mukuringangi Jesulu palula mirangka kutjupa kutjupa witulya pulkangku palyannyangka nyakunytjikitja. ⁹ Munu Iratalu Jesunya rawangku tjapiningi tjukurpa kutjupa kutjupa tjuṭa, palu Jesunya wangka wiya alatjiṭu ngarangi. ¹⁰ Kaya wati tjukurtjara kuranyitja tjuṭa munu wati Moseku tjukurpa nintilpai tjuṭa tjungu ngaranytjatjanu pulkara mirpañaringi munuya Jesunya puntura wangkara kuranmanangi. ¹¹ Ka Iratalu munu palumpa tjaultji tjuṭangku kuļu Jesunya anara wangkangi munuya mayatja pulkaku tiritja purunytja wara pulkangka tjarpatjunkula malakungku palunya iyanu Pilate-alakutu. ¹² Palu panya ngañmanypa Pilate-anja pula Iratanya pikaringkupai, palu tjintu nyara palula arā pula kalyparingku munu pula malparingu.

*Pilate-alu Palyanmankunytja Jesunya Punu
Kaṭakutjarangka Utitjunkunytjaku*
(Matthew-ku 27:15-26; Markaku 15:6-15;
Johnku 18:39—19:16)

¹³ Ka Pilate-alu altingu aŋangu panya tjuṭa tjunguringkunytjaku wati panya tjukurtjara

kuranyitja tjuṭangka munu Jewku mayatja kutjupa tjuṭangka kuļu. ¹⁴ Munu paluru wangkangu tjanala, “Panya wati nyanga palunya nyura ngalya-katingu ngayulakutu munu nyura wangkangu alatji, ‘Wati nyanga paluru aŋangu tjuṭa wituwituningi nyuntunya munu nyuntumpa mayatja Rome-ala nyara nyinanytja wantinytjaku.’ Palu ngayulu panya palunya tjapinu kuwari nyanga nyurala miṛangka, munuña palumpa kura puṭu ngurkantananyi nyura panya wangkanytjitungka. ¹⁵ Ka Iratalu kuļu palunya puṭu kura ngurkantara małakungku iyanu ngayulakutu. Nyawa, paluru kura kutjupa kutjupa palyantja wiyaṭu kala nyaaku palunya iluntankuku. ¹⁶ Palu palyana tjaultji tjuṭangka wangkanyi palunya wiipangka pułkara alkantjaku munuña palulangurumpa malalta wantir’iyalku. Palya?”

¹⁷⁻¹⁸ Palu aŋangu uwankarangkuya mirara wangkangi, “Wiya, wati nyanga palunya iluntara munu Parapatjanya walatjura.”* ¹⁹ (Wati nyanga paluru kunyu ngañmanytju wati kutjupa tjuṭangka tjunguringkula kamantaku pikaringangi Rome-aku tjaultji tjuṭaku munu panya wati kutju iluntanu, kaya palunya witira tjailangka tjarpatjunu.)

²⁰ Ka Pilate-anja mukuringangi Jesunya walatjunkunytjikitja munu piruku tjanala tjapiningi. ²¹ Kaya aŋangu tjuṭangku

* **23:17-18** Wati kutjupangku kunyu verse 17 walkatjunu munu mała tjungunu Luke-aku tjukurta alatji *Tjaka kunyu inma nyanga Katuwanu Ankunytjala Pilate-alu wati kutju tjailanguru walatjunkunytjaku ngarangi.*

rawangku mirara wangkangi, “Wiya, puṇu kaṭakutjarangka wakāra utitjura! Puṇu kaṭakutjarangka wakāra utitjura!”

²² Ka Pilate-alu tjanala pīruku tjapinu, “Palu nyaanguru? Kura nyaa wanyu paluru palyaṇu? Palunyaṇa kura puṭu ngurkantananyi iluntankunytjikitjangku. Palyantiṇa tjaultji tjutangka wangkaku palunya wiipangka alkara wantir'iyantjaku.”

²³⁻²⁴ Palu pulkaraya mirara palunya wituwituningi Jesunya puṇu kaṭakutjarangka wakāra utitjunkunytjaku. Ka Pilate-alu puṭu wangkara palyanmanu paluru tjana mukuringkunytja. ²⁵ Panya tjana mukuringangi Parapatjanya walatjunkunytjaku. Ka wati panya miriputju palunya Pilate-alu wangaṇarangku tjailanguru walatjunu, munu Jesunya wakāra utitjunkunytjaku palyanmanu aṇangu tjuṭa mukuringkunyangka.

Jesunya Puṇu Kaṭakutjarangka Utitjunkunytja

*(Matthew-ku 27:31-44; Markaku 15:21-32;
Johnku 19:17-27)*

²⁶ Ka tjaultji tjutangku Jesunya witira katingu. Ka nyara palula arangka wati kutjupa ini Simonnga kuwari kutju ngalya-tjarpangi walikutu ilytjinguru. Wati paluru ngura ini Tjairininya ngurara. Kaya tjaultji tjutangku wati nyanga palunya witiṇu munuya puṇu kaṭakutjara palula piningga tjunkula wangkangu tjalira katira Jesunya maławanungku waṇantjaku. ²⁷ Kaya aṇangu tjuṭa mulatu palunya waṇaningu

minyma tjutangku kulu munuya pulkara tjiturutjitururira ulangi.

²⁸ Palu Jesulu małakukutura nyangu munu wangkangu, “Minyma Jerusalemania ngurara, wantima ngayuku ulawiyangku munuyanku nyura walytja ulama munu nyurampa tjitji tjutaku kulu. ²⁹ Panya ngula nyurampa tjituru-tjituru pulka mulapa ngaraku.* Ka nyara palula arangka nyura tjiturutjitururira pulkara ulaku munuya alatji wangkaku, ‘Pukulpayanku nyinanyi tjitji wiyatjara tjuta munuyanku pukulpa nyinanyi iti ampura kanyilwiya.’ ³⁰ Munu nyara palula arangka nyura wangkaku apu murpu pulka tjutangka, ‘Punkala ngananaala katu munulanya puruntara.’ Munu nyura piruku apu tjukutjuku tjutangka kulu alatji wangkaku, ‘Punkaralanya tjutula.’ ³¹ Panya nyanga kuwariniya ngayunya tjukaruru nyinanyangka iluntananyi. Palu nyura ngayunya purunyapa palya mulapa wiya, kaya nyuranya wanyu wantiku? Wiya, ngula tjituru-tjituru pulka mulapa nyurala utiringkuku waintara mulapa. Ka nyura uti walytja ulama, ngayuku wiya.” Alatji Jesulu minyma tjutangka wangkangu.

³² Kaya nyara palula ara tjaultji tjutangku

* **23:29** Nyangatja Jesulu nganmanyaju wangkangi ka ngula panya Jesunya ilkarikutu małaku ankunyangka małangka yiya tjuta nampa 50 ngarangi, ka nyara palulanguru warmala Rome-anja ngurara tjuta mulapa Judealakutu pitjangu munuya Israelkunu tjutaku pulkara pikaringkula tjananya pungkula wiyanu alatjitu munuya wali tjuta kulukulu minya-minyanu.

wati kutjara kutjupa kulu Jesula tjungu katingu iluntankunytjikitjangku, panya kura kutjara.
 33 Munuya ngura ini Kata Tarkala wirkara Jesunya punu katalogutjarangka wakara utitjunu munuya wati panya kura kutjara kulu punu kutjupa kutjarangka wakara utitjunu palula tjungu, kutju kampa wakungka munu kutju kampa tjampungka.

34 Ka Jesulu tjaultji tjuta walunyakula kulinu munu palumpa Mamangka wangkangu, “Mama, nyanga tjanampa ngalturingkula tjananya kaly pangku wantima, panya tjana ninti wiya munuṇiya ngurpangku nyanga alatjinganı.”

Kaya tjaultji tjuta palumpa mantaraku punu nampatjara katu wanira inkangi kutjungku kutjungku winamilara mantjintjikitjangku.

35 Kaya aŋangu tjutangku ngarala nyangangi Jesunya, kaya Jewku mayatja tjutangku palumpa ikaringkula anara wangkangu, “Nyara paluru panya kutjupa tjuta ilunyangka wankanu. Nyangamala wanyu kanku palurunku wankala, panya paluru kunyu Christanya Wankarunkupainya Godalu ngurkantankunytja.” 36 Kaya tjaultji tjutangku kulu palunya anara ikaringangi munuya wama kurakura tjaā patja-patjalpai mantjira katura palula nintira wangkangu, “Nyuntu wama nyangatja tjkintjikitja mukuringanyi?”
 37 Munuya palulanguru piruku wangkangi, “Nyuntu Jew tjutanku mayatja pulka nyinarampa nyuntunku walytjangku wankala!”

38 Ka walkatjura utitjunkunytja palula katangka katu ngarangi alatji,

Nyangatja Jew Tjutaku Mayatja Pulka.

39 Ka panya palula itingka wakara utitjunkunytja kutjungku palu purunypaṭu Jesunya anara wangkangi alatji, “Nyuntu panyan Christanya Wankarunkupainya? Utinkun walijtjangku wankanma ngalinya kulu.”

40 Palu wati kutjupangku puṇu kaṭakutjara kutjupanguru palunya painu munu wangkangu, “Wantima! Nyuntu uti Godaku nguluringama panya nyuntunya nganañanya wakara utitjunu ilunytjaku. **41** Ngalinyaya kura palyannyangka utitjunu, palu wati nyangangku kura palyantja wiya alatjitu, kaya ngunti palunya iluntananyi.”

42 Munu wati panya paluru wangkangu Jesula, “Jesu, ngula ngura ilkaritjangka ngayunya mayatja pulkangku ngaltunytjungku kulinma.”

43 Ka Jesulu palula wangkangu, “Wiya, kuwari nyanga alatjitu nyuntu ngayula tjunguringkula nyinaku ngura nyara wirungka.”

Jesunya Ilunytja

(Matthew-ku 27:45-56; Markaku 15:33-41;
Johnku 19:28-30)

44-45 Ka palulanguru tjintu panya katuringkula katu ngaranyangka ngura uwankarangka maruringu munu munga purunypa ngarala mungartji-mungartji kutju tjintungku piṛuku irnyaningi. Ka maru ngaranyangka

mantara panya timpula unngu waraly-waralyngaranytjanya tjlpirarara kutjararingu.*
46 Ka Jesulu pulkara mirara wangkangu, “Mama, kurunpani mantjila.” Munu nyanga alatji wangkara ngaalypa wiyaringkula ilungu.

47 Ka wati tjaultji tjuṭaku mayatjangku nyanga alatjirinyangka nyakula Godanya wal̄kunu munu wangkangu, “Wati nyanga paluru palya mulapa kura palyantja wiya alatjitu.” **48** Ka anangu panya tjuṭa mulapa nyara palula nganmanyapa tjunguringu Jesunya ilunyangka nyakunytjikitja. Munuya uwankarangku ilunyangka nyakula ulatjarangku tjananku pilpirpa punga-pungangi tjituru-tjituru pulkangku, munuya palula malangka ngurakutu anu.* **49** Palu palumpa panya malpa tjuṭangku nyara palulaṭu ngarala nyangangi patunguru, munu minyma tjuṭangku kulu panya palula tjunguya pitjangu Galileelanguru.

*Jesunya Puntu Kulpingka Ngaritjunkunytja
 (Matthew-ku 27:57-61; Markaku 15:42-47;
 Johnku 19:38-42)*

50-51 Ka wati kutjupa nyara palula ngarangi wati ini Josephanya ngura Arima-tjiyanya ngurara. (Arima-tjiyanya panya tawunu tjukutjuku Jerusalemala itingka.) Wati nyanga paluru wirura nyinapai tjukaruru mulapa. Munu

* **23:44-45** Mantara nyanga paluru panya timpulangka waraly-waralyngarala anga-kanyiningi ngura ruuma milmilpa mulapa, kaya ngura pala palula anangu tjuṭa tjarpapai wiya. Nyawa Iipuru Tjuṭaku Lita chapter 9. * **23:48** Tjakangkuyanku tjituru-tjituru pulkaringkula pilpirpa pungku-pungkupai.

paluru rawa pañaningi Godalu añangu tjuta walytjanmara mayatjangku kanyintjaku. Paluru panya wati kantjula nyinangi munu Jewku kantjula kutjupa tjutangka mitingiku tjunguringkupai. Palu paluru tjanala tjungungku palyanmankunytja wiyatū tjana Jesunya iluntankunytjikitjangku wangkanyangka. ⁵² Munu wati panya paluru anu Pilate-alakutu munu palula ngatjinu Jesunya puntu mantjintjikitjangku. ⁵³ Munu palyanmankunyangka paluru ankula Jesunya puntu puñunguru mantjira ukalilyinu, munu karpinu mantara piranta munu kulpi kuvari nyarkara wantintjitetjangka palunya katira tjunutjunu, panya añangu kutjupaya nyara palula ngañmanytju tjunkunytja wiyatū. ⁵⁴ Ka tjintu nyanga paluru panya Friday Jesunya ilunytja-ara. Ka panya tjirirpi ma-tjarpanyangka Saturday-ringu tjintu panya pakuwiyaringkunytjaku.

⁵⁵ Kaya minyma panya Galileelanguru Jesula tjungu pitjanytja tjutangku Josephanya wañanu Jesunya puntu kulþikutu katinyangka. Munuya kulþingka wirkara nyangangi Jesunya puntu ngaritjunkunyangka kulpi unngu. ⁵⁶ Munuya nyakula wiyaringkula malaku anu ngurakutu pañti wiru nyitilpai ngañmanytju mantjira riti palyara tjunkunytjikitja.* Munuya tjintu tjarpanyangka nyinara pakuwiyaringangi tjintu panya Saturday wirkankunyangka, panya Moseku tjukurtu alatji pakuwiyaringkunytjaku wangka-

* **23:56** Wiru pañtipai tjutaya miritjina purunypa miringka nyitilpai uñaringkunytjaku-tawara.

pai.

24

Jesunya Ilunytjatjanu Wankaringkula Pakantja
(Matthew-ku 28:1-10; Markaku 16:1-8; Johnku 20:1-10)

¹ Ka Sunday mungawinki mulapa minyma panya tjuta pakara kulpi kutu anu nyitilpai wiru tjutatjara. ² Munuya ma-wirkara nyangu apu panya pulka kulpi tjaanguru unturnawañara wañintja. ³ Munuya unngu tjarpura Jesunya puþu nyangu. ⁴ Munuya ngarala puþu kuliningi, “Yaaltjiringu?” Ka mapalku wati kutjara tjanala utiringu mantara piranpatjara munu wanangara purunypa irnyaningi. ⁵ Kaya pulka nguluringkula pupakatira yunpangku pampuningi manta. Ka tjanala wangkangu, “Nyaaku nyura añaangu wanka ngurini nyanga miriku ngurangka? ⁶ Nyura ninti panya paluru nyurala nganmanytju wangkangu Galileela panya nyinalralpi. ⁷ Alatji paluru wangkangu, ‘Mirpanjtju tjutangkuya Watiku Katjanya ungkuku wati kura tjuta, kaya palunya puþu kaþakutjarangka wakara uitjunkuku. Ka paluru ilunytjatjanu tjintu kutjara wiyaringkunyangka piruku wankaringkula pakalku.’ Alatji panya palurunku wangkangi nyurala.” ⁸ Kaya minyma panya tjutangku mulapatu kulinu paluru panya nganmanytju wangkanytjitja munuya anu ngurakutu.

9 Munuya ngurangka wirkara nintintja panya 11-ta munu kutjupa tjutangka kuлу tjakultjunu uwankara panya tjanala angeltu wangkanyangka kulintjatjanungku. **10** Minyma paluru tjana panya ini nyanganpa, Mary Magdalene-any, Tjawananany, munu Marynya Jamesaku ngunytju munu minyma kutjupa tjuta kuлу. **11** Uwa, minyma nyanga paluru tjanaya iyantja panya tjutangka tjakultjunu, kaya putu mulamularingangi tjana ngunti wangkanyangka-palku. Munuya tjananya kuliningi kawakawaringkunyangka-palku. **12** Palu Peternya pakara wirtjapakału kulpikutu, munu paluru kułpingka wirkara nyirkira nyangu mantara kutju ngarinyangka Jesunya panya karpintjtija. Munu paluru puťu nyakula ngurakutu ankula iwarangka kulirinangi, “Nyaaku nyangatja alatjiringu?”

*Nintintja Kutjara Ngura Imayatjalakutu Ankunytja
(Markaku 16:12-13)*

13 Ka tjintu pala palula Jesunya wañalpai kutjara Jerusalemalanguru pakara anu ngura ini Imayatjalakutu, panya ngura nyara paluru tjukutjuku paťu nguwanpa ngarangi, tinanguru ankula mungartji tjarpanytjaku. **14** Ka wati panya paluru pula iwarangka ankula wangkarinangi pula uwankara utiringkunyangka nyakunytjatjanungku. **15** Ka pula wangkakatinyangka Jesunya pulala wañara tjunguringu munu pulala tjungu anangi. **16** Palu pula wati kutjupa-palku kuliningi, panya Godalu

pulanya kuru kampa kutjupanu puṭu palunya ngurkantankunytjaku.

¹⁷ Ka Jesulu pulala tjapinu, “Nyaa nyupali wangkaṛinanyi?”

Ka paluru pula tjapinnyangka ngarakatingu yunpa tjituru-tjitururira. ¹⁸ Ka wati kutjungku ini panya Kuliya-patjalu wangkangu, “Palu nyuntu kutjun ngurpa nyinanyi? Ngura panya Jerusalemalan wanyu kuwari panya nyakunytja wiyatū?”

¹⁹ Ka Jesulu pulala tjapinu, “Nyaa nyupali wangkanyi?”

Ka pula wangkangu, “Panya Jesunya Nazarethanya ngurarali wangkanyi wati panya wangkatjara Godalanguru pitjanytja. Panya aŋangu uwankarangku kulilpai paluru kutjungku tjukurpa wiru mulapa wangkanyangka munuya nyakupai kutjupa kutjupa tjuṭa kuļu witulya pułkangku palyannyangka. ²⁰ Ka panyaya nganampa nyanga mayatja tjuṭangku wati tjukurtjara kuranyitja tjuṭangku kuļu Jesunya iluntankunytjaku wangkangu munuya palunya ma-ungu puṇu kaṭakutjarangka wakara utitjunkunytjaku. ²¹ Palu nganaṇa paṭaningi Jesulu nganaṇanya Israelkunu tjuṭa ngalkintjaku. Palu kuwari nyanga wiyaringulta, panya palunyaya iluntanu, ka nyangatja tjintu mankuraringu.

²² “Palu minyma tjuṭangku nganaṇala wiru tjakultjunu panya paluru tjana mungawinki mulapa kułpikutu ankunytjatjanungku.

²³ Munuya kunyu miri panya ngarintjatjanungku nyangu munuya pitjala nganaṇala tjakultjunu

alatji panya tjana kunyu angelpa maŋkurpa nyangu, kaya kunyu tjanala tjakultjunu alatji, 'Jesunya wankaringkula pakaŋu.' ²⁴ Kaya kutjupa tjuta nganaŋalanguru ngapartji anu kulpikütu munuya palu purunypaṭu puṭu nyangu panya minyma tjutangku wangkanyija purunypa." Alatji pula wangkangu.

²⁵ Ka palulanguru Jesulu pulala wangkangu, "Nyupali ngurpa munu nyupali puṭu mulamularinganyi uwankara panya ngaŋmanytju wangkatjara tjutangku wangkanyijitjaku. ²⁶ Panya tjukurpa iriti nyiringka walkatjunkunytja ngaranyi, panya Godalu Christanya Wankaɻunkupainya pikatjararingkula ilunytjaku iyalku, ka nyara palulanguru kutju paluru ilunytjatjanu wankaringkula pakalku Godala tjunguringkula mayatja pułka mulapa tiṭutjara nyinanytjikitja. Alatjiya wangkatjara tjutangku iriti walkatjunu."

²⁷ Munu palulanguru Jesulu pulala utira wangkangu uwankara panya iriti wangkatjara tjutangku tjukurpa palunyatjara walkatjunkunytja, panya Moselu tjana wangkatjara malatja malatja tjutangku kułukułu.

²⁸ Munuya ilaringu ngura panya Imayatjalakutu, ka Jesunya nguwanpa ma-waintaringu.

²⁹ Ka pula palunya markunu wangkara, "Wanyu ngalila nyina. Mungartjiringu nyangatja ka tjintu wat̄alpi tjarpangi." Ka paluru mulapaṭu wantira nyinangu munu pulala tjungu tjarpangu walingka nyinanytjikitja.

³⁰ Munu Jesunya pulala maiku tjunguringu taipulangka munu mai mantjiṛa Godala

wangkangu, “Wirungkulanyan mai nyangatja ungu.” Munu palulanguru pulanya mai katantara ungu. ³¹ Ka Godalu pulanya kuru alaŋu ka pula nyakula ngula kutju kulira ngurkantanu, “Mulapa nyangatja Jesunyaa alatjiitu.” Palu pula ngurkantankunyangka Jesunyaa mapalku arkayiringu. ³² Ka pulanku wangkangu, “Panya Jesulu ngalila iwarangka pitjala wangkanyangka ngali kurunpa unytjunaringu, panya paluru mulapa ngalila Godaku tjukurpa tjuṭa utira wangkangi.”

³³ Munu pula mapalku pakara malaku anu Jerusalemalakutu munu pula ma-wirkara nyangu Jesuku panya nintintja 11 munu anangu panya kutjupa tjuṭa kulu tjunguringkula nyinanyangka. ³⁴ Kaya tjana wangkangi, “Mulapa Jesunyaa ilunytjatjanu wankaringkula pakanu. Paluru utiringu Simonta.” ³⁵ Ka wati panya kutjarangku ngapartji pitjala tjanala tjakultjunu Jesunyaa palula pulala iwarangka utiringkunytja munu paluru pulanya mai nyuma katantara ungkunytja. Munu pula palunya mała kutju ngurkantankunytjatjanungku tjakultjunangi tjanala.

*Jesunya Nintintja Tjutangka Utiringkunytja
(Matthew-ku 28:16-20; Markaku 16:14-18;
Johnu 20:19-23; Acts 1:6-8)*

³⁶ Ka paluru pula kuwaripangku ngarala tjakultjunkunyangka Jesunyaa tjanala ngururungururpa utiringu munu tjanala wangkangu, “Pukularimaya!” ³⁷ Palu tjana urulyarara

pulkara nguluringu munuya ngunti kulinu kurun-kurunpa-palku.

³⁸ Ka Jesulu tjanala wangkangu, “Nyaaku nyura urulyarañi? Nyaaku nyura puṭu mulamularinganyi? ³⁹ Nyawañiya mara munu tjina kuļu, panya ngayulu alatjičuña. Pampulaninya munuya mulamulariwa. Ngayulu panyaña. Nyanga aŋangu alatjičuña ngaranyi, panya kurun-kurunpa puntu nyanga ngayulu purunypa wiya.” ⁴⁰ Munu wangkanytjatjanungku tjanala nintinu palumpa mara munu tjina kuļu.

⁴¹ Kaya palumpa panya nintintja tjuta pulkara alatjiču urulyarañu munuya pukularingu kulira, “Munta mulapampal nyangatja wankaringkula ngaranyi?”

Ka Jesulu tjanala tjapinu, “Kuka nyura kanyini?” ⁴² Kaya palunya kuka antipina warutja ungu. ⁴³ Ka paluru tjanala mīrangka antipina panya mantjira ngalkuningi.

⁴⁴ Munu tjanala wangkangu, “Panyatja nyura kulini, panya ngayulu nganmanytju nyurala nyinara wangkanytja? Panya Moselu tjana wangkatjara kutjupa tjutangku tjukurpa ngayunyatjara walkatjunu, munu Psalm tjutangka kuļu Davidalu tjana ngayunyatjara walkatjunu. Ka panyaña nyurala nganmanytju wangkangu tjukurpa nyanga paluru tjana uwankara ngula utiringkuku.”

⁴⁵ Munu palulanguru Jesulu nyiringuru tjanala wangkara utiningi tjana tjukurpa tjukarurungku kulintjaku. ⁴⁶ Munu paluru tjanala wangkangu alatji, “Ngayulu panya Christanya

Wankarunkupainya, ka panya nyiringka iriti walkatjunu tjukurpa ngayunyatjara alatji, ‘Ngula Godalu Wankarunkupainya iyalku ka paluru pikatjararingkula ilunytjatjanu tjintu mañkurarira wankaringkula pakalku.⁴⁷ Kaya palunya wanalpai tjutangku anangu tjutangka tjakultjunkuku ngayunyatjara tjana kuranguru piwiyingkula kampa kutjuparintjaku, ka Godanya tjanampa kalyparingkuku munu tjananya kura palyantjitunguru kalypangku pungkuwiyangku wantiku. Paluru tjana tjukurpa nyangatja Jerusalemala-warara wangkaku munuya palulanguru ngura winkikutu ankula tjakultjunkuku.’

“Uwa alatji nyiringka iriti walkatjunkunyta ngaranyi.⁴⁸ Ka nyura panya nyangu ngayulu ilunyangka munu ilunytjatjanu wankaringkula pakannya ngaka kuļu. Kaña nyara palulanguru nyuranya iyanī anangu tjutangka ankula tjakultjunkunyntjaku uwankara nyura nyakunytjatjanungku.⁴⁹ Palu kulilaya munuya ngura nyanga Jerusalemala nyinara paṭanma Godalu nyuranya ilkarิงuru witulyankunyntjaku. Panya ngayuku Mamangku nyurampa iriti kalkunu, kaña kuwari kalkuntjija panya palunya nyuralakutu iyalku.”

*Jesunya Ilkarikutu Katinytja
(Markaku 16:19-20; Acts 1:9-11)*

⁵⁰ Munu palulanguru Jesulu palumpa nintintja tjuta ma-katingu Piitjanilakutu, munu ngura nyara palula itingka wirkarā ngařangu, munu mara katurā tjananya wangkara pukulmanu.

51 Ka paluru wangkara pukulmankunyangka Godalu palunya katura katingu ilkarikutu.

52 Kaya palunya pukultu walkuningi munuya wiyaringkula malaku anu Jerusalemalakutu pukulpa mulapa. 53 Munuya palulanguru tjintu kutjupa tjintu kutjupa timpulangka tjarpara Godanya rawangku mirawanira walkuningi.

**Tjukurpa Palya
Portions of the Holy Bible in the Pitjantjatjara
language of Australia**

copyright © 2019 Bible Society of Australia

Language: Pitjantjatjara

Translation by: The Pitjantjatjara Bible Translation Project, Wycliffe Bible Translators and Bible Society Australia.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2020-04-23

PDF generated using Haiola and XeLaTeX on 11 Nov 2022 from source files dated 22 Nov 2019

b29b7786-0954-5b75-82cb-3657182b63d6